

鐘祥縣志

熊道琛署

鐘祥縣志

熊道琛署

中華民國二十六
年二月刊於首都

鍾祥縣志卷之十九

先民傳

國於天地必有與立推至一鄉一邑所恃以納民軌物維人心風俗於不敝者亦必有人焉漸之摩之陶之淑之涵濡而鼓舞之斯潛移默化歷久而益昭鍾祥襟江帶漢屏蔽荆襄山川靈淑之氣蟠鬱苞孕隨時而一洩其奇恒於人焉鍾之自周末以迄有清之季耆德碩秀接踵而生蔚爲淳厚敦龐之俗由來久矣惟舊有諸志標列名目界說頗易出入或一人兩見如程志於蕭希曾旣入孝友又列文苑之類頗貽後人口實是編本舊志所載參以採訪所得略依時代先後爲次第其後嗣可考者即依次附列以明世系至世系無考而事實相同如割股廬墓輸財辦賑與夫良醫美術以專門名家者仍仿台傳之例俾以類從統稱爲先民傳云

周

宋玉楚郊郢人師事屈原原弟子著籍者有唐勒景差之屬而玉之詞賦獨工至以

屈宋并稱於後世當懷王時原遭讒被放玉作九辨以述其志賦招魂以致其愛後因其友見於頃襄王王無以異也玉讓其友友曰薑桂因地而生不因地而辛女因媒而嫁不因媒而親也玉曰不然昔者齊有良兔曰東郭斲蓋一旦而走五百里於是齊有良狗曰韓盧亦一旦而走五百里使之遙見而指屬雖盧不及斲若躡迹而縱縹斲亦不及盧也他日其友又曰先生何計畫之疑也玉曰君不見夫玄蟻乎當其居桂林峻葉之上從容游戲超騰往來悲嘯長吟龍興鳥集及其在枳棘之中恐懼而悼慄危勢而蹟行處勢不便也夫處勢不便豈可量功效能哉玉嘗侍襄王游蘭臺作風賦游雲夢作高唐神女二賦唐勒及登徒子妬其能短於王王問玉曰先生其有遺行與何士民衆庶不譽之甚也玉對曰唯然有之願大王寬其罪使得畢其詞客有歌於郢中者其始曰下里巴人國中屬而和者數千人其爲陽阿薤露國中和者數百人其爲陽春白雪國中和者不過數十人引商刻羽雜以流徵則和者不過數人而已是其曲彌高其和彌寡故鳳鳥絕雲

庚 蔣 州

霓負蒼天翱翔乎杳冥之上夫蕃籬之鷄豈能與之料天地之高哉鯤魚朝發崑崙之墟暴鬻於碣石暮宿於孟諸夫尺澤之鯢豈能與之量江海之大哉非獨鳥魚爲然聖人瑰意琦行超然獨處世俗之民又安知臣之所爲哉一日同唐勒景差從襄王於陽雲之臺王曰能爲寡人大言者上座唐勒曰壯士憤兮絕天維北斗戾兮泰山夷景差曰校士猛毅皋陶嘻大笑至今摧桀愿玉曰方地爲車圓天爲蓋長劍耿耿倚天外王曰未也有能小言者賜以雲夢之田景差曰載氛埃兮乘飄塵唐勒曰館蠅鬚兮宴毫端玉曰超於太虛之域出於未兆之庭視之渺渺望之冥冥王曰善賜之以田玉休歸以著述自見後世哀錄所作有集三卷

宋

蔣雍字仲和郢州人賢而有文右丞范致虛嘗以經明行修薦之

黎亨繼郢州人政和五年進士上疏陳時務帝嘉之賜同狀元恩例舊傳南門大街有狀元坊遺址

別之傑字宋才郢州人嘉定元年進士嘗知建康府事端平初魏了翁開府京湖辟之傑充參謀官旋了翁奉詔入京乃奏除之傑京湖制置副使權正司職事時金亡元興趙范駐師襄陽南北軍將麇集麾下范失於撫馭北將王旻李伯淵焚城郭倉庫相繼降於蒙古而南將李虎等復乘火大掠百年重鎮遂成灰燼由是順襄而下雲夢孝感與神林澗口以逮於漢陽無不受賊兵之蹂躪之傑移司江陵檄諸將應援率多觀望乃結約鄉民以爲收復之計牒申了翁略云襄陽一變司存大壞帑庾空虛公私赤立經理之初富有以大慰輿望如修城壕治器械招軍民賑流離必有錢有米然後可以運掉未容以空言集事督府雖已結局必有支遣餘貲如告命度牒金銀交會等物乞申備朝廷據現在之數撥付本司以備目前窘急之用了翁據申轉奏量撥官告銀絹付之傑專充收復襄陽經理江陵費用并謂制閫之初費用百出請將趙范所請科降銀錢及省劄留寄江州者一并發行俾經理上游并蔽諸道當此艱危衆不敢嚮而之傑存心國體毅然前往在

朝廷所當扶持獎激云云先是之傑官江陵久兩任副使軍民之情素洽自京湖諸郡殘破以來鄉民屯聚相保者往往樂爲所用時有劉廷美者糾集丁壯收復樊城之傑遣使臣鄧雲賚榜劄誥命給廷美軍前廷美號召之餘遂得四萬人而都統江海與廷美廷輔又以督府旗榜於南漳縣老鴉山等處招收寨民莊農與潰兵散卒會合夾擊遂復襄陽當是時城郭邱墟室廬焚蕩計京湖一十八郡殘破者七被兵者三其僅存之八郡又皆竭於供億困於守備之傑多方綏輯量爲籌畫俾垂斃之民得舒喘息而雄鎮旣復卒能支持晚宋數十年之殘局厥功亦云偉矣淳祐元年詔之傑措置戰禦二年入覲言邊事拜參知政事顧爲史嵩之所阨未獲久於其位太學生劉時舉王元野黃道等上書劾嵩之奪情有云別之傑號爲忠厚每事必問本末假託而擠之使去其爲當時所引重可知七年授同知樞密院事并權知政事乞歸田里寶祐元年卒特贈少師之傑性至孝當官湖北鎮撫副使時嘗奏陳親年八十乞祠歸養謂庶幾君親之義兩全從之著述散

金 一 卷 一 一
佚今可攷者有蜀鑑跋一篇

元

趙仁甫郢州人伯顏南征時平章政事姚樞副之嘗夜鼓瑟軍中仁甫避兵草間因往謁樞與言知其隱而有德者薦諸元戎仁甫謝不受

詹正

一作玉

字可大別號天游郢州人至元大德間官翰林學士喜吟詠尤工樂府與

趙功可童龔天滕賓彭元遜之屬時相倡和遇物興感悉遇黍離之思著有天游

詞一卷

明

王福元末人父里寶洪武初太祖平定荊襄福從征一日太祖遇賊追急前阻山溪馬不能渡福以身爲梁掖太祖馳去回與賊鬪賊斷其首明日太祖求其尸鑄金爲頭贈忠勇將軍葬紗帽山之陽封里寶爲太子太保金鎗王子玉爲後軍都督僉事玉卒於洪熙元年贈昭勇將軍御賜祭葬孫勝數傳至紹先世襲昭勇將軍

職紹先早卒妻陳死明末流寇之亂詳列女傳

姚善初姓李字克一安陸州人居魚寨爲諸生時區讀書所曰待旦軒會稽唐志淳爲之銘洪武甲子舉人乙丑成進士始復姚姓歷祈門丞同知廬州重慶所至有聲三十年擢蘇州知府太祖以吳俗奢僭欲重繩以法黠者更持短長相攻討善爲政持大體不爲苛細訟遂衰息吳中大治好折節下士敬禮隱士王賓韓奕俞貞木錢芹輩以月朔會學宮迎芹上座請質經義芹曰此非今所急也善悚然起問芹乃授以一冊視之皆守禦策先是芹自守甚高善欲見不可得貞木以明經重於善一日饋菜貞木吏誤送芹所芹受之吏詣貞木告貞木曰錢先生不苟取與今受不辭必仰府公之賢善聞之欲往候芹乃使人先導意芹對使者曰芹誠願見然芹民也禮不可往見於庭苟明公宏下士之風請俟月朔會於學宮屆期芹至遂授守禦之策時燕兵已南下善乃密結鎮常嘉松四郡守練民兵爲備薦芹署行軍斷事會朝廷以燕王上書貶齊泰黃子澄於外善言不當貶遂復召二

人建文四年詔兼督蘇松常鎮五府兵勤王兵未集燕王已入京師時子澄匿善所約共航海起兵善謝曰公朝臣往號召圖興復善守土義當與城存亡子澄去善爲麾下許千戶縛以獻燕王詰曰若一郡守乃敢舉兵抗我耶善厲聲罵不屈死時年四十三子節發戍賀千戶所繼兒給配旂手衛指揮張旭家使令保兒頂兒送工部習匠後有沈魯者以詩弔之曰倉卒勤王五郡兵南風無力北風鳴精忠自託巴山月穢史何曾說杲卿正德十三年楚撫秦金奏祀鄉賢祠弘光中追贈太僕寺卿諡忠厚清乾隆四十一年賜諡忠烈

但元行安陸州人洪武中知武陵開荒田興水利建公署民咸賴之

姚名善字克修安陸州人洪武十八年以歲薦授監察御史永樂間建都燕京漕運未通名善首倡議疏河開運遂命協平江伯陳瑄相地度勢築壩引泉及諸閘啟閉籌畫之功居多功成詔進五品服色加俸給卒配食平江伯祠

梁用安陸州人洪武三十一年以人材貢授戶部主事出知重慶府政善民安丁母

憂奪情復任卒於官郡人遮道哀送如失怙恃子堅孫東俱歲貢生

李浩字德廣安陸州人少時父嘗病疽浩吮之而愈以正統丁卯貢生入太學稽版籍有宣城人受誣饋金六十兩請白其誣却之初拜兵科給事中英宗見其儀狀偉甚擢南京工部侍郎勅總京儲兼理屯政處置咸宜後轉貴州布政司適苗蠻爲患拜副都御史往撫治之四川大壩蠻亂帥兵征之所向克捷致仕歸卒諡忠肅或曰浩即死靖難蘇州知府姚善後身也

周正安陸州人景泰庚午舉人除滁州知州歷大同知府卒居鄉豪民奪其田竟不赴愬賢著中外鄉評重之從祀滁州大同名宦及本府儒學鄉賢祠子憲

憲字時敏弘治癸丑進士除刑部主事進員外郎十七年坐事下詔獄謫兗州通判正德初復故官隨擢大理寺轉江西副使會饒州賊亂流劫徽浙而華林馬腦賊尤剽悍總督陳金檄憲剿之憲憤厲練兵入賊巢平馬腦岩及仙女雞公嶺諸寨先後斬獲千餘人賊窘遣諜詭言飢困狀憲信之移檄會師夾擊他將多觀望

憲攻北門賊稍却策馬先登伏發矢石如雨馬蹶被執怒罵不屈賊支解之仲子幹素驍勇從戰憲被執奔救不及亦同死事聞詔贈憲按察使予祭葬諡節愍蔭一子旌幹門曰孝烈嘉靖二年江西巡撫盛應期請與黃宏馬思聰并旌詔附祀忠烈祠後從給事中李鐸言命有司歲給其家米二石帛二匹

從龍字雲峯安陸州人爲諸生時有學正朱輝卒於官龍扶櫬還鄉俟安厝乃歸成化乙酉舉人官富順知縣尋陞麻哈州時州人未嫻禮儀龍聘鄰邑諸生訓子弟以詩書遂成衣冠文物之俗歷任五年民立生祠祀之擢懷慶知府會逆瑾求賂遂三疏乞休獲允仍月給米四石以獎恬退家居時嘗捐貲以廣學地世宗即位進階朝列大夫壽九十一終鄉人稱剛正者每以龍爲首云初正統時有名絃者篤好黃老之術游嵩華遇異人授大還藥丹成仙去鄉人傳其事甚奇另附仙釋內然從本望族由龍而後領鄉薦者若學若行己若行知貢成均者若規若佑率能稟龍之教而學行最著者曰仲奎

仲奎以試卷受知興藩賜大紅一襲應正德十年貢任績溪訓導升邛州學正篤志陽明之學爲諸生講解不倦以子某貴封工部員外郎其後又有名所向者殉難崇禎間以忠節著

所向字南溟萬曆己酉舉人任江西玉山縣擢刑部主事廉靜有守性甘恬退致仕後灌園自娛終日危坐一室手不釋卷注易未就遭癸未流賊之亂罵賊不屈子士默同死清乾隆四十一年賜諡節愍

劉洪字希範安陸州人成化戊戌進士知陽穀縣有惠政擢監察御史巡按兩浙力剔鹽務諸弊旋晉浙江副使毀庵寺立鄉塾陞貴州巡撫時普安賊婦米魯初平其餘黨竄踞別寨者尙衆洪次第翦除城其險要轉四川巡撫平松潘祁命族列柯空龍二寨并奏祁命族八長官司所攝官衆多至三十寨少亦二十餘寨環布松潘兩河其土官已故子孫自應承襲今宜察勘有原降印信者方許襲報可正統三年進右都御史巡撫兩廣倭斬潮惠諸郡劇賊及彬桂流寇入掌南京都察

院事會北寇猖獗豫修水戰之具悉備因上疏論嚴武臣黜陟求將才責時效諸事時論違之尋以繼母喪歸卒於家贈刑部尚書洪志存體國無所私曲性儉素家無餘蓄喜讀易春秋有奏議詩文集若干卷子槩渠臬俱進士槩舉人時稱石城五鳳

槩字平甫正德辛未進士授行人抗疏諫武宗南巡受廷杖卒時年四十六嘉靖初贈監察御史遣官諭祭蔭嗣子燮太學生官詹事府錄事弘光初補諡忠質槩著述散佚有七古一首云昔年曾作瀟湘客憔悴東秦歸未得西窗或見好溪山如何尙有楚鄉憶詩書誤人四十年有時自把闌干拍錄之以著其概

渠字清甫正德辛巳與弟臬同成進士歷官至都御史辛丑巡撫雲南沐國怙勢多不法渠嚴爲約束令行禁止安南苗情告急設方略安反側居三載頌聲徹遠邇後貴州鎮守銅仁麻哈告警悉爲剿撫時嚴嵩富國忌其功尋落職歸築別墅漢南讀書談道自樂以壽終

臬字憲甫初授刑部主事改監察御史值雲南土苗安鳳反詔選風力老成御史往按之臬至明罰勅法寇氛底定歷官都御史巡撫山西時邊備久弛臬修葺有方尋謫戍貴州隆慶間復官

孫交字志同安陸州人成化辛丑進士授南京戶部主事爲尙書王恕所知弘治初恕入掌吏部薦授稽勳員外郎歷文選郎中居吏部十四年於善類多所推引遷太常少卿提督四夷館大同有警命經略黃花鎮諸邊增垣塹廣樹藝制敵騎馳突永樂時歲遣隆慶諸衛軍採薪炭其後罷之令歲輸銀二萬兩軍重困交奏免之正德初擢光祿卿三年進戶部右侍郎提督倉場改吏部尙書張綏附劉瑾交數規切綏怒調之南京瑾敗召拜戶部尙書時征討流寇調度繁急仍歲凶正賦不足交區畫適宜四方告飢輒請捐租還賑以故民不至甚敝而小人用事者皆不便之帝欲以太平倉賜倖臣裴德雲南鎮守中官張倫請采銀礦南京織造中官吳經奏費乏交皆力爭八年五月與禮部尙書傅珪並致仕言官多請留不報

歸隱九華著述自娛頗爲興藩所重嘗割陽春台址以益其宅世宗在潛邸知交名甫即位召復故官首請帝日讀祖訓言動悉取準則經筵日講寒暑勿輟帝褒納焉議遷顯陵天壽山交言山陵事重太祖欲遷仁祖於鍾山慮泄靈氣而止具載皇陵碑事乃止武宗侈汰之後庫藏殫虛交裁冗食定經制宿弊爲清然事涉中官帝亦不能盡從也中官監督倉場者初只數人正德中增至五十五人以交言罷撤過半其後復漸增帝已罷三十七人交欲盡去之並臨清徐淮諸倉一切勿遣帝令自今勿更加而已守珠池中官詔勿得預守土事而安川黃緣復故交劾川命如前詔正德中上林苑內臣至九十九人侵奪公私地無算帝即位命留十八人如弘治時已復傳奉至六十二人交乞汰如初且盡歸侵奪地報許又論御馬監內臣宜如祖制毋監收芻豆並令戶部通知馬數杜其侵耗不從錦衣百戶張瑾率校尉支俸通倉橫取狼籍主事羅洪載欲按之瑾給請受杖奏洪載擅笞禁衛官帝怒逮下詔獄謫外交與林俊喬宇先後論救不納御馬監閻洪乞外

豹房地交言先帝以豹房故貽禍無窮洪等欲修復以開游獵之端非臣等所敢聞詔以地十頃給豹房餘令百姓趙愷等佃如故奉詔上各官莊田數視舊籍不同帝詰其故交言舊籍多以奏請投獻數多妄報也新籍少以奉命清核田多除豁也帝意稍解令攷核弘治間籍以聞交年已七十連章乞罷帝輒慰留遣醫視療請益力乃許之手詔加太子太保馳驛令子元侍行有司時存問給食米輿隸復賜道里費卒年八十諡榮僖交言論恂恂不以勢位驕人清慎恬慤終始一致初在南京僚友以事簡多暇相率詠諧飲奕爲樂交默處一室讀書不輟或以爲言交曰對聖賢語不愈於賓客妻妾乎嘉靖初嘗奏安陸乃發迹舊都民貧役重每歲有起運錢糧乞改爲存留以培根本上嘉納之其後中官言孫尙書侵陽春台地帝曰此先皇所賜吾敢奪耶著有安陸州志荊門州志國史補遺晚節園集各若干卷元正德甲戌進士授編修歷官至四川副使謹厚有父風孫麟

麟字伯馭崇禎辛未進士初交遺焦尾琴一金星硯一付子孫曰一文無也還留

硯四壁肅然莫賣琴至麟時琴硯已不存惟奉遺訓力學晚成由會稽令累遷廣東參藩所至有惠聲世以爲克繩祖武云

王大本字立之京山籍爲諸生時與景陵魯文恪鐸齊名學使薛公嘗曰景陵魯生京山王生並湖湘奇士也薛按縣稽核諸生誦習輒使大本代臨之其見愛重如此弘治壬子領鄉薦爲穎上令有善政百姓德之日進諸生論說古今恥以簿書期會見長未幾謝歸囊琴襪被不携官中一物自言吾居官三年使士民呼我爲清白吏所得多矣穎上頌其德歷久弗衰

沈文華字崇實安陸州人聰穎絕世爲諸生時巡撫韓某嘗延之教子欲分給屯田百畝資之文華力辭人服其雅操弘治乙卯鄉薦第二人丙辰登進士己未授刑部主事上疏直學士程敏政主考之寃壬戌陞員外郎總管本科掌三法司事奏多平反京師爲之語曰有疑有難必問沈反歷官陝西提學嚴立科條振作士氣八郡之風翕然以變尋以忤權貴左遷浙江參議遂謝政歸隱龍化山足迹不履

公府嘗捐資以廣學宮纖毫無費於有司自撰廣學宮記以志其事卒祀鄉賢祠
黎爽字師召京山籍父永明字光亨景泰甲戌進士官順德知府郡治前建清風樓
人以爲無忝後有中貴恣橫永明撻數十懲之事聞械至京師謫夔州通知卒於
官時爽甫七歲折節讀書登正德辛未進士拜禮科給事中彈擊無所避治李夢
陽獄還奏稱旨遷南京通政司參議時喬宇官南部與之友善及喬執銓政爽一
無關請轉工部侍郎督顯陵工事集不擾既畢遷兵部左侍郎京山舊隸安陸州
嘉靖十年升州爲承天府設縣治稱鍾祥爽遷居鍾祥子遵義遵訓遂世爲鍾祥
人

遵訓號漢門由進士授南戶部主事歷官知潮州府調松江府所至有聲松江故
事太守升堂民日以一絢爲守坐具遵訓嚴禁絕之後遂無敢設者擢雲南副使
卒於官崇禎時有東明者以節義著

東明邑諸生子之俊亦游庠序有聲崇禎時謝賊應龍據郢東明潛有復城志語

泄舉家慘死東明臨危慷慨罵賊人咸壯而惜之

蕭綬字文卿別號竹窗其先江西新淦人祖孝先改籍北京彭城衛父鳳海選充興府校尉隨興藩之國遂隸安陸州籍綬少好學興藩嘗賜金勉之弘治戊午領鄉薦就四川新都教諭新都故僻陋綬明於易新都習易者十之九綬爲之解其疑難析其旨歸日課月試凡六年以易登乙榜者得四人新都咸歸功於綬俸滿升長寧知縣旋改威遠知縣有惠聲未幾沒於官子九成九韶九德嘉靖中門人張

漢表其墓

郭秀字本清別號質菴先世河南鞏縣人以役遷順天弘治甲寅隨興藩之國安陸隸籍羣牧所遂家於郢世宗踐祚改隸錦衣衛因授錦衣衛小旗仍供事舊邸安陸俗樸實自改府後中紹之氣充斥郢門聲習日奢秀敦本尙實不與時偕改號質菴申其志也子三禎祥祺卒年六十四易東孔起嘗銘其墓

張漢字濯之安陸州人父錦充興府書辦隸軍籍初軍丁周莊欲入儒學肄業長史

以軍丁難之興藩特令入學於是漢與蕭綬李景達張景達諸人均由軍籍發跡漢中正德甲戌進士歷官至兵部左侍郎愰幅無華守劇郡有循良風及佐邦計慎出入提兵雲朔才猷甚壯先是翟鵬任宣大總督爲言官所劾詔漢以兵部左侍郎代鵬嗣復命漢專督畿輔河南山東諸軍漢條上選將練兵信賞必罰四事請令大將得專殺偏裨而總督亦得斬大將人知退怯必死自爭赴敵帝不欲假臣下權惡之兵部言漢老邊事言皆可從帝令再議部臣乃言漢議皆當而專殺大將與會典未合帝姑報可會考察拾遺言官劾漢剛愎遂械繫詔獄謫戍鎮西衛後數年邊警迭至御史陳九德薦漢帝怒斥九德爲民漢居戍所二十年輿論稱冤其居鄉敦倫重誼以清白教子孫嘗作儉說以化鄉閭隆慶初贈兵部尙書裴椿字永年安陸州人績學工文不悅纖麗爲諸生時攷取當收廩讓於謝生曰此生貧乏年且過予於是督學嘉其行特優獎之領正德丙子鄉薦授丹徒教諭嚴渠範課行業士人多所造就歷陞延平知府恤民隱解宿弊公明正直平反冤獄

多賴全活士民感慕舉祠名宦

商大節字孟堅安陸州人嘉靖二年進士授豐城知縣始爲築城捕境內盜幾盡擢兵科給事中京察竣復命科道互相劾被謫鹽城縣丞三遷刑部郎中出爲廣東僉事撫緞猺獍遺其子弟習禮學宮期年而蠻俗變海南黎叛督檄分哨凌水搗其巢俘斬千餘人增秩賜金幣累官山東按察使擢右僉都御史巡撫保定兼提督紫荆諸關慮俺答內侵疏請重根本護神京居四年召理院事俺答果大舉薄都城詔城中居民及四方入應武舉者悉登陴守以大節率五城御史統之發帑金五千金命便宜募壯士屢條上軍民急務比寇退復命兼管民兵經略京城內外訓練鼓舞軍容甚壯擢右副都御史經略如故所募民兵已四千請以三等授餉上者月二石其次遞減五斗帝亟從之時仇鸞爲大將軍盡統中外兵馬惡大節獨統一軍不受節制欲困之乃請畫地分守以京西四郊委大節大節言臣雖經略京城實非有重兵專戰守責者也京城四郊利害鸞欲專以臣當臣節制者

只巡捕軍鸞又頻調遣奸究猝發誰爲捍禦哉所爭甚晰而帝方寵鸞不欲人撓其事責大節懷奸避難立下詔獄法司希旨當大節斬嚴嵩言大節誠有罪但法司引律非是幸赦其死戍極邊亦不聽時三十年四月也明年八月鸞死大節故部曲石鏜孫九思等數百人伏闕訟冤章再上兵部侍郎張時徹等言大節爲逆鸞制肘以抵於法乞順羣情赦之帝怒鐫時徹二秩明年竟卒於獄隆慶初復故官贈兵部尙書諡端愍鄉人立商端愍碑以旌其忠祀鄉賢祠

曾遜字克讓號東莊安陸州人應正德丙寅貢辛巳任四川金堂縣老成凝重初遠民多逋賦不奉約束或以事捕至輒拘繫憊於獄遜至嘆曰民不信有司之過也遂下令與民更始吏不得禁無辜自是輸賦者如期至戶給稅帖升台有稽民得其便嘗修濟留倉積穀數千石雖旱不爲災獨以直忤當路當路巧詆之遂浩然歸子輝舉人孫璠進士初遜去金堂諸生祀遜學宮越四十餘年建專祠萬曆初遜曾孫省吾巡撫四川買祀田蜀人共嘖嘖循吏有後云

璠字子玉嘉靖丁酉舉人越壬戌成進士時子省吾捷南宮已六年矣初爲比部郎治獄有聲久之擢陝西布政使參議以省吾官太僕未期月請老歸角巾竹杖選勝看山間借詩文自娛萬曆初廬陵劉禹謨守承天用堪輿家言改郡巽宮樞星門璠作改修學門記鋪陳文化與所以勉諸弟子員之意至深且厚後省吾以江陵故被劾歸璠處之裕如卒年八十四著有詩文集藏於家

省吾字恪菴嘉靖丙辰進士隆慶六年歷官右僉都御史巡撫四川明年蜀土司都掌蠻叛省吾奏請發兵征討都掌蠻者居四川叙州戎縣介高珙筠連長寧江安納溪六縣間古瀘賊也自成化以來迭煽亂端至是其酋阿大阿二方三等據九絲山剽遠近其山修廣而四隅峭仄東北則鷄冠領都都寨凌霄峯三岡峻壁數千仞省吾率總兵官劉顯等平其亂而茂州刁農諸蕃亦皆率部落內附拓地四百餘里得諸葛銅鼓九十三銅鐵鍋各一帝優詔褒賚省吾不敢自專其功具疏云都蠻種分孟獲號西南桀鷲之夷地阻夜郎賦豺虎貪殘之性阿大雄據九

絲翼以方之等囚愈加煽逆勢吞六縣近將敍瀘諸地亦罹阡危撫勦相尋猖狂益甚僭稱王號生殺一方屢抗官兵驚震三省屠殺則膏骸徧野繫擄則男女成羣戮及嬰兒又貫擗叢炊以博戲剽施孕婦乃焚尸掘墓以淫威罪稔惡盈鬼怨神怒奈以高山大善既自負巢穴之難窺而彼逸我勞亦誠苦樵蘇之莫繼豈知地險本不足恃天網竟復難逃屬英主御極之元年奮赫怒安民之大勇任幃幄以運前籌自廊廟而決勝算謂茲寇不可玩其法在所必誅是以猛將桴鼓以折衝勁卒控弦而敵愾糧糗浮江而下麗甲列山以屯首夏試兵而凌霄即拔於三日中秋列陣而九絲旋破於三旬既西克都都岩以除腹背之虞又北搗鷄冠嶺以絕咽喉之阨一掃零星小寨速如燎毛悉俘獯獍大隊勢如破竹計首功數逾四千焚墜而死者無算約田地畝盈十萬米鹽所產者甚饒番夷震讐童叟謹呼即今已空彼巢穴列陣於吭背之嶺以次當集我兵戈雜耕其肥沃之野以洩幽明之憤永清巴蜀之氛惟是上憑朝廷寵靈下藉文武匡濟本因人而成事敢貪

天以爲功所有是役効勞員弁應請分別議敘以昭激勸云云奏入劉顯等以下各升擢有差省吾遷兵部侍郎旋擢南京右都御史召拜工部尙書省吾嫻將略善治邊夙爲江陵張居正所契江陵總攬朝綱裁抑倖進身後遭沒籍之禍凡修怨江陵者必欲多方羅織江陵子敬修不勝刑誣服寄三十萬省吾與王篆家省吾爲之破產時論寃之崇禎時有殉難廣濟學署者曰發祥爲省吾從孫

發祥字戩毅別號岫嶼山人以明經任廣濟教諭課士校文精於藻鑑居平倦倦以忠義訓士崇禎乙亥陞富順知縣未蒞任值流寇陷廣濟發祥曰嘻吾死也吾職司教士此不死誰爲死所遂與賊鬪死僕奚囊佐鬪亦死賊焚其尸於明倫堂邑諸生相聚哭有黃河清者泫然曰先生爲國事死予且爲先生死也亦死之清

乾隆四十一年祀忠義祠

蔡鑰安陸州人其先世從太祖征討攻城陷陣必呼回回以其狀類復忠且勇可信任也軍中目爲回將軍亦因以自名洪武初封昭勇將軍子孫蔭指揮僉事興藩

封郢調衛安陸及鑰應襲顧以世重科目不肯就讓侄孫胤孝應賢等已則肆力稽古嘉靖丁未成進士任南京戶部員外郎歷官有聲鑰性英敏慷慨好義有祖果敢風其於文字則卓然成家郢太守吳惺有善政郢人於其去也繪留寫圖以識去思鑰爲之記曰菴塘吳公惺浙之餘姚人也由進士敷歷中外凡六載而來守郡越嘉靖癸卯三年矣公在郡時其規畫措注與民休息從顧司空之後而宣力於大工者不可縷指乃其上書纂輯郡志使數百年之典章永永不忘者則公之功也至於被天子寵命擢河南按察司副憲逾月行凡公之同寅下吏郡大夫士咸餞焉鑰執鞭左右屬父老若干人遮道臥轍至壅格不能行鑰諭慰之曰懷仁存德吾民私悃顯忠遂良朝廷懿矩也不聞夫尺澤非神龍所潛枳棘非靈鳳所棲耶言訖父老有持簞食進者曰公以平易仁恕之德惠養吾民之飽公德久矣願公噉此藿食以迓天祿可乎已有持壺漿進者曰公以沾沃醇和之澤涵濡吾民之醉公德久矣願公飲此旨酒以介眉壽可乎已又有持韋策馬而進

者曰公以禮義教化訓迪吾民俾蹈之爲道履之爲義行之爲宜民之駿龐於公德久矣願公乘此馬以綏福履可乎鑰作而歎曰美哉公之德可以觀感微哉父老之言可以觀應矣夫祿以養此德也壽以延此德也履以培此德也父老可不謂善於報德者哉曷圖之公撫然思闔然傷酌卮酒而飲焉已而父老輻輳並進取公寫以去於是始得間行矣明日郢人有善丹青者繪爲圖屬鑰記之鑰蔡氏公之門下士也其他著述甚夥兵燹失傳孫應衡

應衡任俠樂施予凡地方公益事皆引爲己任如太平廟砂石橋馬殿橋及茶菴道路各費數十百金略無顧惜意年九十九猶能據鞍上馬顧盼自雄矍鑠如少年一旦無疾逝時稱爲人瑞云

錢錞字鳴叔先世以功授荊州衛百戶徙護顯陵遂居承天嘉靖庚戌進士知江陰縣時倭亂浙東錞度賊必西向亟請繕城城成賊果入犯鄉民奔入城者萬計兵備道王從古不納錞曰民死不救守空城何爲遂開門縱之入而身自縛戰於斜

橋三戰却之。諱意賊復來，預營華墅而陣。賊果復合常熟賊三千人來，析其半寇靖江而餘逼江陰。城諱先領檄援靖江，得報亟還。江陰賊已渡大橋，攻城城守固。賊移營焚掠四野，烟燄蔽天。諱從城上望之，嚙指誓曰：「煎屠烈矣，奈何！與此賊俱生，乃提狼兵戰九里山，薄暮雷雨大作，伏四起，狼兵悉奔。諱戰死，邑人求其尸於雜莽間，輿歸殮之。事聞，詔贈光祿少卿，世蔭錦衣百戶。諱無子，以弟銖襲。

李得春字元甫，嘉靖癸丑進士。由推官擢禮科給事中，時嚴嵩專國，得春兩疏極諫，謫尉秦興，轉石埭縣令。丈量民田賦役公平，尤加意士類，民祠之仙壇宮。陞雲南僉事，以內艱歸。杜門絕請託，遇地方利害直言多所裨益。

劉庠字養吾，嘉靖己未進士。由推官選御史，歷升應天府府尹、貴州巡撫。進南京兵部右侍郎，恬靜馴謹，胸中不設城府，待人無疾言厲色。所至中外有聲，居鄉人稱長者。卒年七十七。子文熙。

文熙，邑庠生，尚氣節，矢口不忘忠孝。崇禎末，流賊陷城，文熙先置櫬曰：「早辦一死。」

耳因罵賊賊取其櫬旁之曰汝死尙欲保骸骨耶文熙罵愈厲賊斷其舌剖其腹而死

孫應元字體仁嘉靖壬戌進士歷官雁門巡撫卓有治績居里門謹恪自守人稱先輩典型

戴經字伯常號楚望先世湖州德清人父文潤爲興府良醫家安陸州郭外其後遂隸籍爲鍾祥人文潤卒時經甫七歲夫人徐年二十九家貧克勵清操以拊其孤世宗踐祚經補錦衣衛環衛積功勞至指揮使顧性獨好學師事秦和歐陽崇一學益進其所交親者如毘陵唐應德太平周順之富平陽子修并一時海內高名之士至如安成鄒謙之吉水羅達夫未嘗識面而以書札相往來大抵從陽明之學往復辨論必期於自得非苟爲名者錦衣之職於上十二衛最親貴兼領詔獄士大夫被逮者多見掠奪經恂恂然爲人尤仁恕凡被繫者親視食飲湯藥衣被常保護之御史楊爵給事中周怡員外郎劉魁禁繫累年三人已赦出相謂曰微

戴君吾等安得生至今日乎至聶尙書豹以兵書被繫經更從受書獄中以故中朝士大夫籍籍稱其賢而樂與之交謝都御史存儒巡撫河南以師尙詔反經奉駕帖往逮行數千里衣破敝謝以一縑贈之却不受其不苟取予率類此初經父文潤遭親喪以毀滅性郢中人題其廬曰終慕故有終慕之堂及母茹苦撫經終日淡泊郢中人又題其廬曰高節故有高節之堂經追念先德恒思有所樹立願以直道時與當途忤乃以著書自娛與崑山歸有光時相過從所著文集百卷及詩集若干卷有光各爲之序且立傳以張之俱載震川集子樞襲錦衣職又文潤同時有名景春者亦戴姓湖州德清人以善製香隨興藩之國隸籍鍾祥里中少年有毆母者景春欲執付有司少年叩頭流血請改許之其後卒爲善士江陵張居正嘗銘其墓所稱素菴戴公墓誌銘是也

胡守上字天衢父灝有學行性至孝守上亦孝孺慕終身年屆九十猶論經義不輟

子景文貴州教授憲文萬曆丙子舉人并以父老請終養不仕

守上一作守正

饒鳳翔郡諸生事父母竭力逮喪晝夜哀寢柩側三年既葬廬於墓哭奠告面一如生前依土成坵墓木有卑枝烏巢之越六年始歸朔望尤步往祭泣雖雨雪不廢不赴宴會服衰麻終身

張琰字雲岫萬曆乙未進士自筮仕歷官大參有賢聲做范文正遺法建祠堂置義田祭祀婚喪族之貧者咸取給焉著有永言志子繼登紹登

垣字雲五琰從弟萬曆丁未進士歷官戶部郎中介性清操宦橐蕭然惟圖書數篋而已

李正芳字養實萬曆庚子舉人知涪州平白蓮妖賊之亂遷饒州府丞有惠政及民呂隆字仲昌萬曆丁未進士任戶部主事處煩劇能恬淡涉獵經史百家工詞賦有文名隆父頌德隆慶丁卯舉人子承亮崇禎丙子舉人秋闈皆坐呂字一號又皆出瀏陽縣房三世不爽亦科名中佳話也

張第字鳳塗萬曆癸丑進士公恕謙謹與人無忤歷守潞安瓊州二府保障潞澤惠

行海外致仕歸居室毗連縣署子弟僕從出入循禮若不知爲鄉大夫者里人建坊以旌之

向日升字青橫萬曆癸丑進士少負文譽卓犖有奇志初授梁山令調丹徒後備兵思石值安苗肆逆日升應機撫勦指授方略皆奇中遂平其亂陞陝西藩司有惠政其奏疏多可採間有見於明史實錄者文集散佚可考者有重修曾家橋路記王綏和字青嵐萬曆乙卯舉人性耽閒靜不務榮利與竟陵譚元春友夏相友善尤工書求其蹟者無虛日任工部郎修築都城特被殊獎官至雲南按察使

盧楚傑字西陵萬曆丙辰進士博雅淹通文名動一時母張氏建坊旌節褒誥有教子一經慰夫百歲鵬鷲旣漸目前冰蘖足怡泉下等語弟夏起以忠節著

夏起原名楚鈞因避神宗諱易名字嗣嫩年十二即受知學使葛屺瞻先生補諸生萬曆戊午副榜崇禎丙子舉賢良方正初判廣西橫州署崇善縣任貴州貴陽府通判所至有廉能聲闖賊陷承天同母張氏罵賊死著有歷代君臣譜編年制

度紀略粵游草倦還草大易集說諸書

鄭哲字閩塢萬曆戊午舉人廉靜力學寡交游不營生產著有易經講義兼通陰陽術數之學

徐起陸字伯起萬曆己未進士特召代光宗執杖授肥城令政教備舉時白蓮教倡亂奏議十二條熹宗嘉其侃侃不羣勅准備防

蕭希曾字魯菴家貧性至孝父病數月不敢一夕解帶每嘗糞甘輒痛哭父亡苦塊甚苦三年酒肉不入口萬曆間由明經爲岳州教授訓士以孝義爲先講析理學著有經書解郢士多出其門公舉孝行祀鄉賢

黃卷字蘭輝天啟辛酉舉人庚辰會試不第懷宗召廷試策御批嚴氣正性賜同進號士授呈貢令性至孝在官布袍疏食與上官語不合即歸養聞賊陷京師冠帶望闕泣拜不食經旬死清乾隆四十一年賜諡節愍

賀運和字仲文荆門籍天啟甲子舉人家世孝友謹循禮法直指使以其品行薦之

上曰真孝廉奉部甄叙云數椽永矢棲遲一足不履公門翛然自愛僅見此生

劉彥字心蓼天啟乙丑進士知太倉州遷刑部員外郎輦轂稱無冤民守泉廬二郡人懷其德明亡隱居不問世事竟陵胡承諾石莊贈詩云龐馬襄陽舊陳荀汝內賢兩鄉近吾里遙襁復依然屬籍金閨引高名畫省懸人文尊累洽國體重蕃宣婁水元洲側筍溪幼海邊三江趨震澤二嶠越龍川任昉羣書古虞愿片石堅分憂無亂緒報政有安紓淮浦攀歸鞍瀉峰卷去旃小山歌獨樹大隱樂迴淵布帽林端迴柴車谷口偏醉宜中聖日詩紀義熙年塵垢離劉裴門閭表鄭玄雪間窺鶴警霞上拍鳶肩丹竈方松羨奇齡友偃佺銅人撫摩意不啻仰雲泉彥之清操亮節爲時所重可以覘其梗概矣年八十餘以壽終

劉諫字言伯天啟丁卯舉人補汶水縣丞性剛烈酷嗜酒醉後侮上官辭歸崇禎壬午除夕闖賊犯承天城外火光燭天家人爭避諫曰何處是乾淨土去將焉往於是閉門獨坐城破賊掠至諫方酣飲賊脅降痛罵之目光閃閃如電賊驚逸去繼

復大至諫大怒鬚髯戟張罵更厲并大呼殺賊賊怒縛諫手足案脚置火於盆炙其腹腹將稿死一日矣家奴福慶歸救之少蘇尙能飲奴飲之得不死聞甲申之變北向痛哭絕口不飲者數日訣家人曰吾生爲男子不能捍君父之危一死何足塞責屏去棺殮以志吾罪遂不食死

姚文蘅官商水知縣崇禎十四年前令王化行守城被害文蘅代甫數月賊復陷城携印赴井死清乾隆四十一年賜諡節愍

胡永仁字清泉荆門籍孝友誠篤爲繼母廬墓甘貧讀書朔望必肅衣冠拜先師司訓湖口旋致仕歸著有匡山讀書錄易經井觀

王時啟字卜省崇禎庚午舉人以孝友聞尤嗜學詞章典茂所纂有五經類語性鑑
集要諸書

李世芳字參嶺崇禎癸酉舉人讀書山寺經年不履市城與人相對有蕭然物外之意明季避亂深山詩文自娛賊強以官堅臥不起

李向中字豹韋號立齋崇禎庚辰進士授長興令別弊鋹奸士民得所調秀水大革
漕弊益著廉聲內遷車駕司主事疏陳楚省安危略云臣鄉湖廣窮民散亂軍旅
空虛萬一逆賊窺武昌則江南豈得安堵臣謂荆襄兩處宜速設重鎮與淮鳳諸
處相犄角賊不得馳驟漢黃庶可保障江南且襄陽而下漢黃而上爲承天陵寢
重地豈可使賊出沒其間乞早爲整頓至左鎮駐劄武昌隱有虎踞在上之勢而
撫臣何騰蛟一腔忠義千里干城小民依之將士信之近聞有陞遷別省之說乞
仍令照舊撫楚臣思保江南不在逼處江干而在扼其要領則荆襄最爲急矣安
臣省者拒賊猶後而馭兵爲先則知撫臣其不可更矣云云無何北都亡福王即
位南京進職方郎中巡視浙西嘉湖兵備副使尋調蘇松甫至而南中又亡松江
沈猶龍夏允彝起兵向中預之兵敗走入浙方王用事棄之入閩唐王授上寶司
卿而鄭氏專政未幾浙閩相繼亡乃奉父之樞母傅氏避處海濱雒城山中丁亥
諸軍次長垣劉中藻起兵招之同朝魯王監國即拜兵部侍郎巡撫福寧中藻善

治兵時開府福安向中監其軍扼沙堤中藻以一旅之卒激發忠義屢戰屢勝已而清兵攻福安兵少不能援城破向中以振威伯涂覺襄武伯章義二將之師護監國入浙次於三盤尋與定西侯張名振取建跳諸所清兵圍之蕩湖伯阮駿來援再戰再捷遂奉監國都翁州晉尙書兼掌都察院事悍帥迭起向中知事不可爲歎曰此所謂是何天子是何節度使者也嘗問左右絕糧幾日可死曰七日曰何緩也舟山破慨然語家人曰先帝以治行拔向中不得死難華亭之役不與沈夏諸公俱死偷生七載亦希得一當以報先帝今已矣先大夫在殯老母在堂向中不可死然不死則辱不如一決之爲愈也我死幸投我海中以志恨清兵召之不至捕之縲經入見清帥呵曰召汝不來捕即來何也向中從容答曰召恐諭降捕就戮耳翔武而出越日死之行刑者乃其舊部遂投向中於海時年四十有一長子善毓從死而太夫人傅氏夫人蔣氏及次子善隲有義士匿之或告之提督田雄亦服其義弗究也其後歸里相繼歿無後清乾隆間向中列祀定海成仁祠

賜諡忠節光緒三十一年其妻蔣氏妾某氏并增祀具詳定海縣志

按忠節昆季三一名向上一名向陽向陽於崇禎十六年殉闖賊陷城之亂其他行事雖不可考而成仁取義實開忠節之先至向上子孫綿延世承先澤今庠名文冕字性初者實其八世孫特附著篇末俾考遺獻者知善人之有後云

陳纁字紘公崇禎庚辰進士由兵部車駕主事歷榆林道壬午端王避闖賊亂自漢中來纁奮身出護四川巡撫陳士奇請纁以關南副使帥三千騎鎮重慶癸未闖賊奪佛圖關陷涪州纁與賊相持未幾城陷被執全家死之清乾隆四十一年賜諡節愍

孫瑋字公之由明經授蘄水訓導崇禎癸未賊陷蘄水瑋袍服坐明倫堂罵賊而死清乾隆四十一年祀忠義祠

余化龍明貢生敦尚明節初仕蘭谿丞稍遷四川都司經歷以流賊充斥未赴任崇禎癸未賊破郢城化龍被執脅之不從乘間逃往東山適僞典史以素隙憐慮賊

帥領兵至山縛而殺之全家數十口同日被害

蔣爾檢字修伯郡庠生後避懷宗諱改名爾簡篤於宗教有再從子杰少孤撫育之飲食婚娶一如己子杰補諸生崇禎末賊破城爾檢同長子焜慷慨死難次燹亦庠生鄉黨重其端嚴

張大任字○當號星伯師事京山李維禎本寧於書無所不窺李深契之通武略以氣節自許崇禎壬午賊陷郢誘以官不屈脅以刃奮起罵賊乘間投水死潛江莫與先誌其墓

王幹邑諸生家素裕平日有伉爽聲闖賊入郢幹從容命家人七口以繩繫指相牽同赴元佑塘水死越七十年邑人胡作柄以詩弔之序云予苦次伏處不復預外事每追念昔人類多幽芳亮節無由傳之身後心竊憫之若吾郢王幹者在諸生中慷慨自負植明末郡城失守悲號不已率妻子投水而死是非忠義根於性生欲自植節於人間者而能之乎郡邑志偶軼之予紀以詩不過憶彼芳踪觸我感

歎云爾而一時諸君子喜相賡和遂已成帙史遷有云閭巷之人欲砥行勵名者非附青雲之士烏能施於後世信哉今集諸君之才思實足闡揚潛德而七十年之王生庶藉以傳不朽乎則予之一言亦私幸為嚆矢也已詩曰不登仕版不登壇誰責書生死義難累世田園成敝屣一門談笑下飛湍日星終古懸霄漢編輯何人託史官試把微吟當青簡可能傳向後來看當時和者甚衆幹之大節遂傳

播於後世云清乾隆四十一年祀忠義祠

按胡作柄序云一時和者成帙今可攷者僅曾曉周慈永將佇昌三律特分注

於下會詩云巖巖一士勝千官慷慨損軀大節完白浪游魂何日散青衿汶幾時乾須知骨朽名難朽縱使水寒心未寒同葬江魚長瞑目忍將故國向誰看周詩云捐軀端的是男兒義魄忠魂死不離城破應悲從國破天知豈必待人知剛腸恥為饒資戀止水聊同明鏡窺九泉沈宋如相遇拍手惟歌漁父詞將詩云蕭條白首嘆支離事屬前朝有所思水遠山高風未改家亡國破勢潛移九重天子無為日三閣親臣鎮靜時寒責書生先一死到今忠義幾人知

劉斗垣仇善羅星皆縣民崇禎癸未正月朔闖賊陷城八月斗垣善星糾義復城甫至鐵牛關兵馬烏合與賊渠偽都尉陳老虎戰不勝被執罵賊賊碎磔死之

陳王孫邑諸生高峯貢生闖賊陷城於士之知名者強授偽職王孫峯屢召不屈削

髮逃深山避之

熊叶夢祖早字環江嘉靖間以江西舉人任鍾祥知縣有惠政罷官後留家焉傳至叶夢篤行誼歎吟詠與竟陵譚元春友夏相善遭時亂離避門不出命家人具食道旁以給流民之飢困者隱姓字不令人知子永慶永錫俱敦善行不怠橋梁道路多所修葺云

包維忠家饒好施崇禎末歲飢捐粟賑濟修葺祠宇道路卒年八十餘

薛兆麟以勇略自負明季流寇充斥保障鄉里一方安堵當事欲特薦用之辭不就華氏兄弟一名龍一名虎居華家湖湖形如釜周圍皆淤陷崇禎末數千人避難湖中兄弟挺長矛扼要路賊不敢逼後或薦之授守備職皆辭

張繼舜脫略不拘挾琴書遨游吳楚間動淹歲月工草蟲花卉尤精醫術平居溫雅酒間即豪放脫幘酣飲人比之孫太初

盧維烈工畫屏幃尺幅疏密有法尤善琴曾同友人至瓊州阻颶風泊孤島中見海

水瀨洞山林杳靄取琴一彈有移情之歎生平喜寫雞綃幅掛堂中雞見之輒鬪張應極伉爽不羈喜酒工棋游金陵白門國手王亭玉平崖亦遜其精

應宿應極弟飲不勝一蕉葉其興浩落在善飲上工棋善琴亦能詩性甚和藹人稱其琴棋二絕

李世貴早歲善丹青有古意耄年更精進子心華復工山水大小皴皆有家數人物典染工緻以重聽恒謝客灌園

王安所平生相人輒奇中明末有令遍相當事者歎曰何皆亡國之器也人笑其狂癸未城陷果如所言

王愛溪精內外醫術有時名嘗老醫錄丹方謂神仙可學乃餌藥石清靜寡慾年八十餘輕捷如少年

黃裳字天錫縣北馬頭砦人有勇略明季流賊起年方十八馬頭五龍兩砦推爲首流賊過天星竄至率衆抵禦殲賊無算最後闖賊至多方防堵兩砦俱賴以安

李大成陝西高陵縣人天啟末官荊門千戶勦賊於黃峪坑陣亡賜葬張家灣其地
因名千戶林其後子孫繁衍聚族而居遂稱爲李家塢云

鍾祥縣志卷之二十

先民傳二

清

賀運清字疏林號嵩螺荊門籍順治丁亥進士曾祖德劭爲諸生時故貧路拾遺金二百堅守以待失者至予之其人願分酬揮之不瞬由歲貢仕修武知縣清操惠政祀名宦運清承其家學服官有守初由興化知縣報最擢戶部主事轉吏部歷任興泉兵備道十載慈廉懋著歸郢之日年已耄而敬德日崇樂育不倦鄉邦咸叨其庇陰康熙初與鄭茂泰等纂輯縣志年八十餘卒祀鄉賢子于朝

于朝字枚臣閉戶教子門無雜賓家不設戲具足不踐歡場試輒優等終慳一第貢春官未仕卒子廊佐

廊佐字渭占和厚純雅鄉黨稱端人正士少補諸生英英有文譽工染蘭石筆墨森秀嫻琴理淵淵出金石每靜夜一弄猿鶴皆應意致飄然至其周卹三黨囊橐

不吝尤豁如也晚年與同里杜敬菴李淡圃諸公日夕洽會每以孝友文學啟迪後進時比之洛社司馬人倫坊表云子長庚

長庚字眷西乾隆二十七年由監生授雲南霑益知州陞景東同知擢補永昌府知府時大軍進勦緬甸永昌爲咽喉地一切備糧糗集馬匹倥偬繁擾長庚經理裕如大府薦爲雲南官吏第一旋任迤南道因公誤落職大府惜其才仍保任之降補同知擢授普洱府知府再任迤南道晉雲南按察使調陞貴州布政使

古通今字非博號約菴順治戊子舉人官攸縣教諭遷衡陽久之陞岳州府教授品望端方諸生愛敬吳三桂之亂岳州垂陷通今夜懷印縋城馳至綏遠將軍蔡毓榮營中繳印蔡公當具題有臨難不屈忠貞可嘉之褒事平還任兵燹之餘士子蕩析勞來安輯俾肄業如常甫一載卒官子燧貢生孫澧雍正庚戌進士由平利知縣陞興安知府

周一熊字小涓號章巒二齡失怙母盧苦節撫之一熊穎敏力學順治乙丑成進士

授旌德知縣愛民如子適旱跣足步禱天大雨歲飢賑活數萬人邑多盜惑以至誠許盜魁立功自贖羣盜化爲良民丙辰方奏最旋卒歸櫬士民泣送百餘里

龔鯤字扶萬順治乙未進士歷官寧國府知府鯤少有異才奇貧無家依僧寺有老儒設學寺中鯤代其弟子爲文老儒大驚遂以師席讓之晚歲告歸文筆益蒼渾有排闥自騁之概弟維衡

維衡字星五邑諸生攻書史耽吟詠其友人見過感賦云三千客散黃金盡五六年來白晝閒閑居云無田久斷催租吏有病常逢賣藥人其貧約瀟灑之致見於言外早年遽卒其同族知名者曰弘禧弘祉弘祐弘祉弘祐均不永年而弘禧以篤行著

弘禧字阜宜康熙庚子副榜天資英敏性復渾厚與人言以篤行爲本尤急公義嘗捐資造船以爲義渡往來便之官光化訓導啟牖諸生不倦一日見齋夫私揭架上書問曰若解乎答以少曾習此因試之喜曰尙可爲也遂日與講論歲餘補

弟子員其成就人才多如是在職十年歸諸生無不垂涕送別

高登先字于岸順治己亥進士初任山陰知縣除火耗息爭訟築塘修閘育嬰掩骼
惠政不可勝紀吳之變諸暨向克忠乘隙倡亂征之不克登先單騎抵其營諭
之遂投戈解散撫軍范承謨薦於朝去任之日民立祠紀碑稱爲高衆母云遷江
南常熟知縣請減浮糧督軍餉多體卹治獄雪其冤牽轉涿州知州旗民雜處鉏
強扶弱恩威并著涿之混河有怪常爲民害登先詣水濱草疏焚之怪遂絕初登
先失怙早事母至孝明季流寇充斥母卒未殯賊適至欲掠之去環先登尸慟哭
賊義而釋之且爲稿葬淺土其至性感人如此康熙三十八年請老優游林下十
餘載卒年八十餘祀鄉賢

楊佐國字荊湖荆門籍順治辛丑進士初任陝西咸寧知縣時軍需孔急佐國周卹
民隱咸人勒其善政於石遷商州甫三月吳三桂之變圍城竭力拒守賊退猶出
沒無常佐國巡歷山谷多方擒捕四境以安擢刑部員外有貴家殺人同官多瞻

徇佐國獨持正尚書魏象樞亟稱之卒從其議轉禮部郎中典試廣西授廣東驛鹽道絕苞苴益著清望攝南韶道招撫花山賊改立花縣兩署臬篆內陞京堂歷太僕少卿卒於官性至孝每歷一官輒痛哭以不及祿養爲恨友愛諸弟教之有成子毓健鳳陽知府毓元候補主事毓惠貢生

陸毓芝字石繡崇禎壬午副榜順治初爲沔陽州學正振興文教捐給寒士膏火人爭頌之子光祖

光祖好學敦行雍試注縣職授安溪知縣痛革陋規循凋瘵以疾解組未竟其用厚菴相國李光第每稱其賢而惜之其後有名生芝與遇芳者皆知名

生芝邑諸生善書尤長於琴擅一時之韻遠近無與比指法者風月佳夕輒冷冷在耳也

遇芳字蓮亭邑諸生陸氏自明以來至遇芳十五世世爲諸生遇芳幼聰慧好學工制藝臨摹古法帖深契精微家貧習醫術以妙手稱著有醫說待梓

王第魁字聚五順治初由諸生授荊州知府撫卹凋殘治績卓著調河南歸德知府歷至江西左布政疏請蠲積逋集流亡全活甚衆居家以孝友稱祀鄉賢子孟調仲調俱以學行著於鄉里孫濬

濬字平川守第魁家訓閉門績學鑽研經史文章醇雅一遵先民矩矱胡侍郎作梅重其文行每推轂焉繆湘芷給諫稱其雅量汪汪後僅以歲貢終子字樂宇大相繼成進士皆濬所指授而成者也

字樂字堯廣號怡亭雍正丁未進士授西和知縣早歲能文吮毫染翰有流水行云之樂致政歸猶嗜學不厭

字大字位中雍正壬子亞元乾隆乙丑進士補黃州府教授性方嚴文亦整肅不徇時好

鄭茂泰字自階號魯菴順治初英藩逐寇南下茂泰以諸生獻策當意劄授本府推官時當闖賊蹂躪之餘井里蕭條桑梓賴其撫集後歷官治稱嚴明而存心仁恕

嘗書座右曰寧陽舒無陰慘寧春煦無秋烈寧服念旬時無急遽一朝守衛輝時造士賑災濬河督漕諸政釐舉尤慎緝逃之案不使誣陷一人旋擢廣西右江兵備道致政歸請於郡邑當事肇興文昌書院又與賀運清等纂輯縣志鄉邦文獻實攸賴之子裔薰密薰岷薰均貢生密薰尤知名

密薰字聚岩以歲貢任歸州學正士樂親教已而厭歸地僻險辭歸日坐斗室惟以圖書自娛達官要人求一面不得晚年偶出門外驅驢者衝之仆悶絕及醒見鄰里繫其人歎曰彼豈有心縱不救亦命也揮之去後竟坐疾不瘳無追咎之語其生平雅度多類此年七十九卒子四埏堪堪城

邱業字厥修別號郢山順治初以諸生從經略洪承疇進攻滇黔論功授安寧知州陞平遠知府尋轉寧波知府以簡靜爲治痛懲告訐訟獄衰止時寧波教授沈增及知縣朱士傑率兩庠士砥勵品行每朔望則講解經義評論異同業必親詣講席互有質明又聘萬斯選萬斯同趙時贊及闔郡知名之士纂輯寧波府志由是

教化大行郡南大嵐山地連寧紹菁莽巖巉夙爲盜藪會值耿精忠之變渠魁龔
萬里聚衆萬餘據險出沒抗不受撫業躬擐甲胄并台諸戎帥兵分道夾攻深入
險阻萬里出不意進退無所窮蹙請降業立命斬之士民無不稱快浙人胡宣作
平寇序略云吾浙自用兵以來江東八郡其壁壘不及第供輸輓者祇寧紹兩郡
紹處八郡之中視他郡爲安危惟寧偪郊關之險爲全浙門戶其動靜乃全浙安
危所係綢繆未雨所賴於良二千石者匪淺鍾祥邱公來守三年廉敏公愼五邑
士民我喜我生頌聲洋溢十一郡俱以師表目之然當地方無事稍事拊循優於
德者類能之未足爲公異自八閩倡亂溫台衢處悉爲危疆大兵雲集分地攻守
親藩提鎮督兵數萬守章安仰食寧郡其時運籌轉餉使兵無脫巾之譁民無悉
索之苦皆公一人之力也公經營况瘁方慶輓輸不及而於越諸山中羣盜竊發
流及四明白晝焚掠村落俱墟漸將窺伺城郭燎原枝蔓識者憂之僉謂賊勢猖
獗必乞各鎮大兵始可剪滅且恐公以文吏不嫻武備未便輕詣賊巢公毅然曰

大兵分地攻守方秣馬蓐食以期尅復何得以小醜分氣將以我爲各屬倡于是畢集府中之胥吏并其副授之器械教之坐作即以是檄各屬得兵千許佐以城守弁卒親詣賊巢者數次爲山界兩郡越旅興則賊據寧峰寧師出則寇依越嶠東征西逸屢煩徒御公遂與監司許公決定兩郡會勦之策殲渠魁散脅從一出而羣醜悉平不惟寧郡借公保障而全浙亦恃以無恐云云至業旣卒後寧波兵民祀業名宦復由史大成撰遺愛碑立於通衢其實惠及民可知矣子學宓候選知縣學崑孫渾康熙癸酉舉人官仁壽縣知縣

吳士鯨字青要號烟湖先世有諱俊者由宣德歲貢歷官思南石阡分守道數傳至士鯨生而英偉性尤篤孝明季流賊陷郢負老母匿山中遇賊家衆奔散士鯨牽母据伏地啼泣賊義而釋之清初由貢生歷官保山知縣殫心民瘼兩臺有旣著慈祥更饒風骨撫綏有方仁風可掬考語吳三桂之變大江以南聞風響應士鯨與永順鎮田進學騰越參將周孟祥計圖恢復與三桂將張光先連戰六閱月援

絕糧盡田周戰死士鯨收拾餘燼再戰不支賊擄入營不屈賊將素聞其賢不忍加害旋自拔出三桂既平將軍賴某深加慰勞委署永昌力辭之時士鯨已老子江伯徒步重趼迎歸以壽終子三讓伯庠生撰伯貢士江伯其季也

江伯字岷水邑諸生學尙躬行力爲善士郢中稱爲篤實君子年逾八十子毓琛孫登青

登青字楚山天資英敏經史百家披覽殆遍童時一日成數十藝乾隆己亥舉人恬志仕進娛老親篤昆季伯仲歿二嫂孀居數十年不析爨調護維持俾得以志節著初登青家居課徒教授有方及主講文昌書院從游者益衆故列庠序及登春秋榜者大半皆登青弟子選授黃陂教諭先器識而後文藝門下士黃兆樞任儀封遣介執書諭曰教養爲王道根本昔予祖保山公在滇建義學立義倉人知孝弟力田其成效可覩生其勉旃其敦尙古誼如此著有集益堂文稿子涵潤涵字子海歲貢生喜施濟新市大水流民至邑中者數千人巨室皆閉戶不敢納

涵親立門外人給米一鍾以爲救災者倡大戶繼之以故年飢而人無餓者後爲來鳳訓導子世楹孫宗焯

宗焯字俊三邑庠生歷官廣東南雄嘉應等州勤政愛民爲一時循良之選嗣子德祖

德祖字慎先績學植行補諸生後科舉即停遂以課徒爲生授讀之餘究心著述尤留意鄉邦文獻卒年三十餘著有史鑑節要補編歷代帝王紀元中西對照表及日記七十餘冊

劉必選字青錢明季諸生遭亂抗志賊至衣冠危坐披覽自如賊脅以刃不屈傷其耳猶娓娓講順逆大義賊帥義之懸令旂於門而去必選有句云親友凋零盡蓬茅幾尙存野狼朝出道山鬼夜呼門自錄忠臣傳誰招戰士魂老夫殊未死血淚灑中原子洪俊轅俊

洪俊邑諸生弱冠騰蹕藝苑鄉試屢不得志遂退隱郢之西山足不踐城市口不

言簪纓與弟轅俊甚友愛白首怡怡教成子姪列膠庠者七人歲貢生澤宏其仲子也

澤宏字仁山由歲貢授東湖訓導平生守先志喜著述家訓一冊尤有先民矩範季子鍾慧最知名

鍾慧字亦魯邑庠生訥言篤行黽勉學問尤能循循啟迪後進設教數十年郢中名彥半出其門姪學池學漣皆鍾慧教育成之

學池字天漢號丹峯乾隆乙酉拔貢詩才俊振有女兒毓芸字晴窗能詩元夜懷學池長安詩有明月今宵同舊歲紅燈千里各新年之句學池答云梅花驛使怨南天土坑無香夢亦牽鴻雁不將鄉國信蠹魚空飽帝京篇傳柑下里思佳節走馬長安異少年却道金台收駿骨碎琴心事強留連又答晴窗來韻云俠腸自比奇男子醒事還如塞上翁老至不知心力怠苦吟多在錦機中學池篇章極富錄此以見一門風雅云

學漣字灤川號蘋浦別號聽雪乾隆乙酉舉人與兄學池舉貢同年性恬淡工吟詠兄弟姊妹風雨聯吟極一門之盛事選授恩施教諭訓課勤敏士林重之有日記錄凡起居動靜時事乘除無不備記及所著詩集并藏於家

何惺字君慄號象山生而慧年十五試冠一邑與兄欽同補諸生性孝友父病寢牀下三年母早逝事繼母得其歡心兄卒江南旅寓計至輒濡子泣其內行醇謹率如此初懷慕鄭莊陳同甫之爲人雅好客座上客常滿已而忽自悔謝絕一切交游杜門讀書文益雄崇禎末寇氛滿地鍾祥爲陵寢所在守陵璫橫亡賴者影附益虐民惺知大亂將作舉族先幾遁得免癸未元旦陷城之禍清初當貢春官時歲貢有起家別駕司李者惺隱居不出然里中有大利害輒挺身建白當途往往探其言次第施行或勒諸石以垂法後世鄉人頗利賴之晚精岐黃術全活甚衆年逾八十猶夜挑燈作蠅頭字里文士請益人人指授無倦容而酒酣對客嘗言某文當早貴某文當晚達若吾孫芬者庶吾家千里駒乎其後所言悉驗無或爽

者生平所纂輯有四書正義書經大指引蒙字說六經批釋楚騷明解綱鑑提要及武備指南本草歸一針灸圖保嬰摘要等書所著有考槃居集若干卷年八十三卒子方暢方亨皆庠生孫芬杞梅芬尤知名

芬字蘭室少從祖惺治尚書能得其傳康熙中廣濟金德嘉會公司鐸郢中以詩古文詞訓迪後學芬稱入室弟子嗣膺鄉薦選竹溪教諭地僻俸微益奮著志述康熙丁丑成進士授西寧知縣西寧故明順聖川西城清初屬蔚州衛自康熙三十二年始置縣屬宣化府設治之初諸務草創芬提挈綱領庶政釐然暇復哀輯掌故成西寧縣志若干卷芬以文學名一時惜所著多散佚其可考者僅有雜說

三篇

何山雋字小崑世居馬良山之麓馬良古內方地瀕漢父雲行雅好客構草堂其間樹可繫舟客停撓輒徑造壺觴縞紵人盡歡去山雋補郡學生尋食餼入成均為歲貢生遠近客日至或踰晦朔更寒暑左右周旋久彌篤雲行老山雋督家政家

益起客亦益多其內行亦益有聞弟山奇早歲補諸生旋卒其妻誓節山雋育其二孤女如己出笄適士族襄送特渥雲行卒喪葬一遵家禮歲稔則設糜以哺餓人而棺瘞其死者里人以緩急告則調之即倒廩垂橐無吝色守令聞其賢遇以殊禮山雋因時時條租庸徭役河隄諸務見諸施行然未嘗干以私也中年喜購書江漢間稱藏書者必曰何家子燦

燦字炯尙一字希蘧歲貢生天姿英敏博極羣書不設臬比而請業者相繼遭父喪號痛枯瘠邑令聞而弔慰焉平生慷慨好義在京師捐囊助滇黔遠省之艱資斧者不自爲歸裝計也他如瘞白骨施義田賑飢溺扶危難毅然行之而不以自功語人曰此承老母意也母家教素嚴僅燦一子自幼不稍姑息略不稱意輒予杖燦即跪而受杖畢嚶嚶作孺子啼呼之起乃叩首謝以起至頽白尙爾中年選

保康訓導以母老辭不就子其昌亦貢生

按康熙府志稱馬良舊隸荆門自明嘉靖中改隸鍾祥李杜諸志均仍之惟嘉

現在區域馬良隸非鍾祥所屬關於山川古蹟及人物凡屬馬良者未便登載然何氏世居馬良自山雋以下列畧序入成均者均係鍾祥籍實屬一種疑案再攷何象

山藟誌有葬內方山祖塋之側句象山居馬良南湖屢見
衛鶴洲詩集其祖孫亦均稱鍾祥籍附著梗概以俟詳攷

何士譽字令聞世居縣北豐樂鎮父孔源邑諸生用周易授生徒從游者衆士譽早
慧文藝脫稿輒驚人先人書籍遭世亂多散佚崇禎末左良玉兵北上焚掠甚於
寇促書生負擔士譽在掠中弱不勝任孔源則跳墜石塹下死時夏五月士譽藁
葬父骸馬馱山下亂稍定乃營厝成禮舉至祖塋祔焉亂兵倏踵至負母逃流離
瑣尾歷五六年當是時士譽學廢迨順治庚寅始出應試補諸生士譽家世治易
攻科舉文字會令甲廢八股策用論取士生徒茫然無以應士譽著易經通解後
生始獲津梁士譽事母孝與人交不輕然諾爲人排解紛難則洞中要領往往一
言出而兩造翕服以誠能動物也子效侃亦諸生

翟美如縣南白口人少任俠言人所不敢言爲人所不能爲嘗訟孝廉李某之冤白
口人咸稱其義善吟詠尤工駢體文廣濟金德嘉會公序其詩文集行世卒年八
十餘

鄭鰲字海巨號筆山父國經明季避亂雲霧洞賊蹤跡執之誘以降大罵不屈與其子烈熙杰俱被害適鰲以他往得免聞凶信慟絕復甦收遺骸以葬後由副貢授江陵教諭不樂仕進告歸以父兄二弟殉難隱疚於心終身言之輒哭著有靜海文集及傳家俗訓各若干卷

鄭之叔字敖澣郡諸生篤於孝友季弟之絃順治初爲本府知府大吏猥以誤軍需忝奏將陷大辟之叔奮身破產糾宗族力爲營救遂得昭雪鄉人稱之

王貞安其上世由江西來遷世以篤行稱里中父端衢及母氏遭明末亂皆喪於兵戈之際倉皇未獲成禮貞安終身隱痛茹蔬數十年每曰吾先人垂沒時火食尙不能繼吾忍御酒肉乎蓋非奉佛氏之戒也撫其兄之遺孤成立不忍別居詔之曰吾家世孝友若祖嘗以張公陳門之誼勉若父與吾爾時食指甚蕃有以析炊勸者若父敬謝之雖顛沛中舉火爲稀尊卑內外無忍獨飽者今吾與若相依爲家亦猶行前人之志耳居鄉恂恂尤善處人骨肉間嘗隱括古語作聯曰天下無

不是的父母世間最難得者兄弟鄉人競傳誦之子泰生早慧騰踔名場人以為
貞安慶益燄然語泰生曰士所當為者不止此泰生敬受教克守其家法焉

泰生字彙征號曉堂四歲就學七歲能文十三入郡庠康熙壬子拔貢湖南北第
一廷試復第一辛酉舉人選蘄州學正再任湘潭所至有河汾夫子之稱泰生性
孝友事兄如父飭躬清介避俗若仇足不蹈守令之門亟為當事所推著有詩輯
傳博採漢儒諸說不拘拘朱子詩傳其詩文名懷嶽樓集廣濟金德嘉會公序而
傳之

李作鹽字用調號肖巖荆門籍父守瑄遭明季亂來遷清初作鹽補弟子員食廩餼
事親善承厥志父歿返葬荆門歲時奔祭哀感行路弟作梅亦廩生愛之如左右
手出入必偕作梅亡後每獨行輒顧影痛哭而返其他善行種種人多稱焉子五
人孫十人皆有聲庠序間曾孫治運尤知名

治運孤詣工文歲科五試皆冠其曹旋卒鄉人惜之道咸間歲貢生鋒澗來鳳訓

導泰齊邑庠生泰然皆其後裔

從士黜字子昭歲貢生從氏爲明代右族士黜少承家學文筆淵雅卓有矩矱邑中
有大著作咸推士黜秉筆守令以上賓待之

傅先聲選貢士遠之父樂善好施清初見屍骨滿野捐資覓工收埋於城南瓦子灘
之高家坡立有百人塚碑記曰刀兵之役白骨暴露目擊心傷收埋茲土爲男爲
女在劫在數莫知姓氏莫知居處同歸三尺共安一堵爰立斯石以永終古康熙
中有梅質者因隄決冲塌古墓哀兩巨塚命子孫世世澆奠另於梅氏世系詳之
陳春河西陳明楫之僕也明季闖賊攻承天明楫偕妻王氏携子時新克新耀新棄
家逃避時新足腫春負之行賊突至掠時新去時新幼而慧眉目如畫賊愛之抱
馳歸營春號泣追至漢陽賊營山下每夜聞哭聲爲之怛然以時新付之返明楫
夫婦還三子皆失日夜飲泣晨起見鵲噪王氏祝曰脫兒得歸當刷羽吾盆中鵲
三下少頃春携時新至克新耀新竟不知所終時新子孫世世待春後人如昆弟

嘉慶間有周德富者義行頗與春同

周德富北鄉人田主魏姓僅一子白蓮教之亂舉家逃散子泣道旁德富負之走累日卒獲保全魏德之予田十餘畝弗受既沒魏氏設主祀之其後又有廖文虎徐正國均以義僕稱

廖文虎幼傭東門黃氏歷四世不易其守後主人名墳者官河南留文虎守宅宅後有田畝餘屬種蔬自給文虎於饗殮外所餘悉收儲不取一物里人義之

徐正國傭李錦春家勤勞忠順民七某日夜匪突至正國呼主人避之已獨守十六年匪較前尤烈正國請主人携物他走挺身與匪鬥竟被害

李思恒字克永號果齋五世祖端明時任新淦知縣以廉惠聞去任之日民劇金以餽笑却之舟輕載二石壓浪歸人以爲宦橐焉父岳績學不遇隱於鄉既歿母任氏年三十時流寇抄掠村廬家衆趣任避之任手劍大呼曰我孀婦將安往遂伏劍死思恒抱屍泣血不肯捨賊突至擁思恒去賊帥兒呼之思恒罵不絕口強留

賊營伺間脫走伏麥隴潛行百里投外舅龔氏年十五補郡庠生痛父母不逮養自奉儉而享祀極豐以數困棘圍四十外即屏去舉子業嘗謂諸子曰吾家新淦公以來一經相傳汝曹恪守清白而益光大之且以慰汝祖母於九泉則吾志也年七十六終子莊葛有聲諸生間蘇進士蓮舉人孫曾蔚起奕葉重光擇其尤者分著於篇

蘇字眉三號環溪康熙癸未進士授江都知縣制繁以簡暇與章縫唱酬於平山堂作吏甚風雅而抗顏上官秉正不回如減商民挑濬之夫役排開河遷閭之衆議皆當官所難能者時儀封張公伯行撫江南尤心重之張內召每語朝紳江南廉能之吏必推蘇爲首且稱其學有根柢義利公私之辨明而成敗得失不介於中也俸滿行取將補主事罷吏議歸蘇敦行績學孝友孚於族黨與人交重信義著述甚富所著環溪詩集章藻功序而行之年六十九卒於家易簣時口占一聯授弟蓮曰父生我母鞠我五官百骸全受全歸天覆吾地載吾白月清風獨來獨

往其胸次灑落如此

蓮字石湖康熙壬午舉人官南昌知縣有廉惠聲鄉闈得名士馮詠江右翕然稱之致仕歸究心著述文望巍然凡地方興舉事宜多以蓮一言爲重如開北門重建文昌閣皆蓮爲文發起至募修石城白衣菴疏其文尤娓娓動聽疏云郡西偏爲石城蓋晉羊叔子鎮襄陽時因山設險以阨東吳屹然稱漢上重鎮云城趾有二梯者是也樓久廢國初郡司馬黃公冠以亭顏曰巢雲官斯土者及鄉人十輒觴詠其中亦因以諮詢利弊講求民隱不但聽莫愁之歌解漢皋之佩流連光景已也久漸廢弛車騎罕過風韻頓歇冰燦上人鬪榛鋤莽漸復舊觀前年淫雨爲災壞民居無算而石城亦崩亭且壓菴亦波及懸崖危石欲下未下望者屏息時有覆壓之慮郡伯周公周視喟然謂邑侯曰保障哉胡聽其墮也爰購石鳩工百雉皆作而石城先完則有一屬目而可想見太傅遺風餘烈者冰上人用是益宏

其願力將走郡屬爲將伯呼屬予爲疏且告予曰佈施善果之說知儒者所不道獨以大士血性男子也乃現女子身低眉柔色以善氣薰人天以慈雲覆世界其普濟羣生靈異見於傳記者不暇數即如萬民之保障詎不在城郭哉何郢城之墮於積歲者向皆秦越相視而今郡伯乃一言振舉而萬民安堵安知非即大士現宰官身而大有造於郢民耶且菴獲鼎新則巢雲勝概應復開生面而士大夫之登臨憑弔發抒性靈暨漁父樵叟嬉游化日歌詠太平者胥于是乎在諸檀越未必不樂觀厥成也予以上人告予者告諸檀越不煩更贅吾言矣云云四方讀蓮疏者力襄斯舉菴得重建其文見重於當時多類是乾隆戊午邑令高世榮延纂縣志毅然以鄉邦文獻自任先是宋明以來舊志亂後失傳康熙初邑令程起鵬主修縣志書經衆手不過粗具規模蓮博綜詳核訂訛補闕而於先哲詩文凡關掌故及有當勸懲者搜羅不遺餘力尤以表章人物爲亟闡微顯幽燦然大備著述之餘耽吟詠兼工倚聲之學有漁浦集傳世子兆鈺

兆錫字南州年十七入邑庠試輒高等食廩鎮年例將貢會嫡母亡生母繼亡父亦旋卒歲大稔半菽維艱兆錫力舉三喪毫不問及兩弟先期或以時日不利於兆錫本命宜改者泣曰從父母於地下固所願耳葬後數十日除夕忽沐浴跣坐語家人以今日泉路侍吾親甚善吾早辦此毋罪葬期禍我遂瞑

兆鎮字方州雍正丙午舉人補鄖西教諭課士講學靡不悅服縣令赴省代理獄訟尤稱平允旋構疾諸生輪視湯藥及卒櫬歸士民緇素哭送百里外縣令尤哀痛不已兆鎮性純孝幼時母患乳癰兆鎮吮之敗膿淋漓殊無難色母問兒不懼腥穢耶應曰不過乳所化耳何懼爲比長父督之嚴小不稱意輒怒加撻兆鎮長跪帖受命之起乃起間有使令或非所能堪者亦必欣然執事不敢令僮僕代蓋自兒時至艾年如一日也績學工文見賞於吳荊山少宰其十二不道人傳云十二不道人者直隸諸生王承鼎也憤滇藩之變走荊州獻策軍門綏遠將軍懋道之拂衣長嘯如郢別駕程湛頗加敬禮將資之北歸鼎歎曰丈夫志不就即當蟬

蛻人間世耳何戀戀豆棧爲別駕送入元佑宮勸其拜貞一道人爲之徒齋笑曰
我與天爲徒耳拜天畢擇來鶴軒右僻室居之琴一劍一楸枰一書百卷室前隙
地以瓦石堆五嶽標諸名勝邱壑峯巒俱有靈秀奇拔之致環繞其階前僅留一
戶出入仍柵之終日靜坐若枯禪面壁時或起舞陶然如微醺者每朔必痛哭思
親風清月朗援琴而操皆古調霜雪凝寒則露臥不入室人與之食則食不與亦
不索食或浹旬經月不出人疑其病且憊微窺之殊怡然自得也其出東則必自
西返南則必自北返問何以爲答云看人忙耳鬚髮浩渺飄然塵表問其年則曰
可以死矣太守新安吳公厚遺之堅不受曰無所用耳一旦辭衆羽流云我當遠
游矣沐浴更衣端坐而化化後有人遇之參嶽下者呼之笑而不答迴顧已在絕
巖矣歸而問之即其化日也十二不者何不誦經拜懺不燒汞鍊丹不慶喜不弔
喪不入人家不謁官府病不服藥客至不送迎不受人贈遺不問人閒事圍棋不
那子喫飯不讓人另有八不不拜玉帝不拜天師不拜梓潼不拜真武或問故曰

經傳無玉帝之稱吾之拜天者謂是萬物同覆之天非敢指上天之主宰而僭爲拜也天本無師道陵之教非柱下道德意吾不必拜梓潼人指爲文昌焉敢不拜但世傳一十七世爲士大夫於周爲張仲果爾吾當拜其孝友又稱於宋爲張浚夫浚排李綱陷趙鼎妬岳飛殺曲端殃民酷吏孰大於是曾何足當吾之拜真武如爲北方玄帝吾焉敢不拜無如其爲燕王之像何則又非吾所宜拜其餘則靜坐不應人呼書不借外出陰事不爲人卜歿後不復用棺客有誚之者師名十二不矣又益以八不且溢於數外乎答云正恐歎於數中耳蓋順呼之爲十二不者逆呼之即爲不二十左右呼之亦二十不無此八不以實之寧不愧過情乎然則道人之爲人亦可想見矣郡人魏大壑先生贈之詩舉泰山徐洪客况之道人以爲知己云兆鎮他著作多散佚特錄此以存其概焉

兆鈺字北樓蓮子弱冠補諸生第一是年雍正乙卯與鄉試第一明年成進士入翰林爲人貌皙軀偉衆望之軒軒霞舉時婦翁涂天相焚菴爲工部尙書力能薦

引謝弗就也遷湖廣道監察御史因建言落職尋外補睢州牧治劇犁然丁艱去任服闋知江南海州境內蝗生捕之悉絕復因公被議制府尹公保留江蘇委用兆鈺性恢曠目無難事勇於公義而絲毫不染凡歷官輒不能自給而廉明仁恕所治之地輿誦歸焉卒年未五十弗竟其用當時惜之子潢

兆錦字淡圃乾隆丙辰舉人官徽縣知縣內擢太常寺博士兆錦爲文工組織藻韻之中骨力蒼勁詩才博麗儼然溫李同輩望之却步其白雪樓記云在昔天帝命素女鼓五絃琴爰製白雪曲厥後有客歌於郢中益以陽春調高和寡由來舊矣顧陽春有臺而白雪有樓則懷古情深者所建以誌不朽也年久樓廢不得與臺並峙近百年來惟存厥名間嘗過太傅之石城下有閣曰流雲上有亭曰巢雲石磴紆徐振衣其巔東望花峯紅紫閃爍南睇內方滄江縈帶北有象山羅立西有紫蓋對峙洵大觀也迨攷郡志即白雪樓遺址劉賓客所謂江山高樓十二梯梯梯登盡與雲齊者也夫郢中勝跡以雪名者夥矣孟亭之側詠雪在焉宋井右

又有聽雪然皆仿斯樓也而斯樓不復覩弔古者能無慨然或曰郢有白雪亭是亦足以代斯樓也不知亭非樓比登眺迴異斯樓如在當夫岸柳拖碧溪桃噴紅畦菜鋪黃則有來牟萬頃浪粼粼其掀舞也雲擁奇峯山雨欲來谿風滿樓披襟當之雖蘭臺何多讓焉若夫莫愁村樹葉以霜酣刺史客禽羽以漢濯登高而賦郢曲其猶存也條而繞郭琪花千枝如鏤抽空玉笋萬峯相排則白雪之所在皆樓之所收也亭其能無媿美乎吾竊更有望焉志載樓臨漢水舟楫往來裊風雅亦利民生奈江徙日遙而支河亦淤年來自敖河以下已漸次疏導然起衰振瘠必待非常之人以成非常之功安在此樓之舊觀不可復還而必借巢雲亭以彷彿其勝概哉

兆鉉乾隆戊午副貢辛酉舉人官南匯知縣

汧字金門善書摹率更體參以平原尺縑寸楮人爭寶之子桂字香雪亦工書以歲貢終

注字海門自幼摹古帖貫通各家翰墨與沂齊名

潢字雲門乾隆乙酉解元辛卯成進士由編修累遷兵部左侍郎以受和珅累降
編修潢負異稟讀書目十行下父兆鈺官海州牧被劾落職卒於蘇州潢年尙少
扶喪歸邑豪利其資誣陷潢入獄家人來視輒令取書一篋逾數日更取之以爲
常由是學益富雲南李公因培巡視湖北廉知潢冤出之即於是科領解五策尤
詳瞻主司歎賞梓爲多士式闡墨刻五策自潢始潢居詞垣益究心有用之學徧
通墳籍博洽爲海內冠當時爲之語曰南齊北紀不逮鍾祥一李齊天台齊召南
次風紀河間紀昀曉嵐也時和珅當國多方羅致潢不爲動額駙豐伸殷德坤子
也高宗問延師何人坤以潢名對已而使人以上意要仍却之潢母冷太夫人謂
曰汝名已上達庸得辭乎潢不敢違遂勉受珅聘及珅敗其黨皆獲罪潢居賓師
之位於公事絕無所干當時論劾亦無有及之者仁廟以是原之雖降官而仍以
翰林處之異數也潢旣以博洽著而於算學用力尤深所著九章算術細草圖說

十卷輯古算經注三卷續疇人傳稱其能發古人之真解與古人息息相通昌明絕學厥功甚鉅算術外并精音律之學當視學江四時履任之初聞鐘聲但有角音即告當途飭南新一縣曉諭居民預防火災未幾酒店失慎延燒數百家一時大吏無不歎服屢主文衡所取士如阮文達元等多爲名臣潢卒京師葬永定門外其銘墓者爲殿撰吳廷琛亦門下士也子祥麟兵部主事寶田光祿寺署正
棕嘉慶戊寅鄉試經魁官安化知縣

榛字西荅注子郡諸生性誠樸敦孝友不言人短家居非公事不謁有司著有聞見錄四卷詠史詩二卷

焞字育臣榛子少游京師師事費耕亭學日進道光己亥順天鄉試舉人官長山縣知縣陞用知府致仕歸主講文昌書院士林奉爲楷模

琛字楚卿焞子年十三入邑庠隨父官北方循例入國子監以便秋試旋議叙兵部主事改官知州候補直隸到省之初長官試羣吏於庭琛以策論合式得首選

時制軍爲新寧劉公藩司爲義州李公皆激賞之委署赤城知縣惜早卒未竟其
用子大鏞福建縣佐大釗諸生

胡振翼字羽六號可菴由荆門遷鍾祥父之明明季捍禦流寇保障一方年三十二
而卒振翼甫八歲事母邱太淑人以孝聞長子作梅貴杜門不出時啟鑰以納薪
水已巳歲大稔振翼爲當事策通詳上憲池各縣搬移之禁招巴蜀豫章之賈不
踰月米價大減癸酉新菴隄決議築六十萬夫愀然曰潰里許耳民力可閔當事
遽減三十萬少而髮白年旣壯反黑如漆美鬚髯吐音洪朗作梅迎養京師合肥
李相國見之曰道骨軒舉神采煥徹丹臺中人也子作梅作楫作相作柄自作梅
昆李起家科名子孫踵接鄉人論世族者每與李氏並稱云

作梅字修予號抑齋康熙壬戌進士改翰林戊辰充會試同考官所拔皆宿儒壬
午督學陝西著條約二十餘則振孤寒端士習請託一無所徇戊子進祭酒士服
其教有荆門夫子之稱遷詹事獨排廷議直張司寇廷樞之冤奏革敗行知府姚

堂晉內閣學士辛卯典試浙江尋升禮部侍郎復典試江西其勤慎公明如一日也每進奏必蒙溫旨上嘗召至瀛臺命著理學真僞論稱善賜表裏魚脯嗣每有召試輒嘉許賚予甚厚澤旺蠢動上命督餉軍前時已病脾衆勸之辭毅然曰王事也鞠躬盡瘁而已至軍前禁尅減懲侵蝕給散軍米溢於往日士馬歡騰未幾病亟猶強臥軍中清查米數周視營伍至夜半而徂遺疏有云臣當受命之日已絕還鄉之夢其國而忘家如此時康熙五十七年八月卒年六十五上震悼賜祭葬入祀昭忠祠作梅性孝友服膺宋儒之學教子姪有方督餉塞外時貽姪溫書云萬里關塞日望吾楚題名錄久之始得見吾三姪高踞一名名次年齡乃恰與吾戊午合天其將使姪直繼吾起步步相追耶爲之驚喜至於不寐旣而腸中輪轉念吾姪學行未能過人非分之獲可爲慌惕初猶喜懼交戰日踰一日喜去懼留矣吾先世六七傳代延忠厚讀書力田未有一掇科名著濫厠鄉薦乃至吾始惕極生哀聞報輒哭會城謁座師房師歸登岸復哭告墓日痛哭至不能起內自

循省吾里千數百家終年咕嗶者亦有矣讀書之報不於他姓而於吾門不於宗族而於吾身吾其何德以堪此是時大母邱太君年六十有四苦節數十載尙未表揚兩世高堂雞豚缺供心甚慚恨爲人子孫稍爲榮進輒飲食貪縱肥臙大嚼其若寸心何遂乃屏絕肉食茹苦自甘記庚申讀書古寺中或有議吾好詆佛何以得中解之者曰彼中後悔悟持齋已久吾亦不告以其故也時汝父十齡從學蕭寺不審猶能省憶否壬戌吾成進士列庶常每進一階有戚無欣天日在上吾終身曾無爲蝸名一開口笑者癸亥秋吾官京師久病纏綿形神漸瘁同人敦勸資肉爲養未踰月而母訃至痛心裂腸輒復斷葷壬午秋嚴君見背蔬食如故乙酉服闋念大母春秋高何心仕宦亟請撫軍咨部終養部文甫允而祖母壽終三年之內兩丁大故形銷骨立幾至不支秋七月汝父告汝伯母率諸子姪設位中堂涕泣固請諄諄以毀不滅性爲言予不獲已爲嘗一味自是歲以爲常每省朋宴會箸或他及至於日用自奉蓋實未嘗兼及非忍自刻苦誠恐德薄消受良難

耳自吾通籍復越戊子至今汝兄汝父汝叔及汝四登賢書此自祖德垂裕所致
貪天功以爲己力鬼神其肯許我乎汝質性頗浮宜自猛省昔周處少行不羈里
老患之曰三害未除處問故里老曰南山虎長橋蛟并子而三處乃射虎斬蛟折
節修行生爲名臣沒享廟祀處可謂善改過矣吾書法素拙從未污紙今更擇好
紙挑燈呵凍手書示汝正欲汝裝成卷軸不時展玩庶幾古人書紳之義汝宜思
孝廉二字義如何取孝則不敢悖慢廉則不敢貪饕董子有言積善止身如長日
加益而不覺也積惡在身如火銷膏而不知也古人獨行顧其影獨寢顧其衾戒
之戒之此一札最足耐汝輩深長思矣時康熙五十六年除夕伯抑齋手書於塞
外之布顏圖郭爾讀者謂是書不獨訓一人兼可訓鄉國故備錄之著有聽真閣
集若干卷

作楫字濟川號誠齋康熙丁丑拔貢才敏絕倫凡經史百家音律象數之屬輒目
過心解嘗與人賭藝以日午爲限得二十餘首皆精細宏麗人研究不到者得南

宮帖移時即肖爲人氣豪而神靜視朋友若性命生有異相兩耳自扇手垂過膝
年三十五卒於京邸名公卿皆悼惜之

作相字代言號約齋康熙癸巳舉人性沉毅寡言笑不諧於人五歲入鄉塾日誦
數千言弱冠補諸生名籍甚金會公張石虹輩咸爲推服陳清恪公誥撫楚時評
次其稿浙江王中丞度昭鏤以行世其三峯軒詩古文集則諸孫德昌所錄屬其
友杜光德序而傳之也

作柄字謙持康熙甲午舉人官仁和知縣有惠政學博才高長於歌詠著述甚富
刻有荊門蒼舊紀略荊門舊聞蘼菱山房集行世

克寬字東易作梅子康熙戊子舉人由中書出知松江府松江歲修海塘舊多糜
費克寬綜核節省萬餘金悉通詳貯庫上海張某大吏以宿嫌誣其通洋罪不赦
克寬憐其枉請宥之大吏不懌弗計也後尙書張鵬翮奉旨鞫是獄竟從克寬議
會兩淮鹽運使缺出上命九卿保舉第一清廉官僉以克寬首進次則陳鵬年上

喜輒召之顧以年甚少恐未諳艱務仍補大理府事歲飢發屯米借民例請於上官克寬曰民且死旦夕吾任擅發之咎尋丁母艱去任卒年四十一嗣子奕昌以祖蔭補行人司歷夔州司馬

克俊原名溫作相子作梅示姪溫書即克俊也康熙丁酉舉人官簡州知州斤斤論文勉成後輩

克柔亦作相子歲貢生官均州學正文酒縱橫自喜灑然有高致

克毅歲貢生爲作相第四子孜孜學問垂老不倦一字之疑後進不恥問之和順端謹鄉黨稱佩凡有益地方學校必肩其事如鍾祥歲科試增撥府學二三名是其獨力請之當事沿爲定例者也子德昌亦高材生孫紹經更名宗簡

宗簡字伯常號楓林乾隆壬子優貢甲寅舉人由軍功保舉六品銜選授新城縣知縣歷任會昌貴溪弋陽等縣所至有政聲詳貴溪縣志宗簡耽吟詠以五七律爲最工書法趙吳興下筆飄逸而有沈著之勢子志章

志章原名承浩道光甲午優貢選鶴峯訓導援例籤分南河補海阜通判署震澤縣歷官總捕同知志章夙承家學文采風流傾動一時少愛讀莊周書於郭象注弗善也壯歲得句曲宣氏所刻南華經解稱爲數十年宦游一大快事晚益肆力於佛學所著詩名洗心室剩語合肥徐子苓易甫稱其涵澹停蓄不雕而工以暇益奇兼有同時葉澗臣孫芝房楊彝仲諸子之長蓋定評也其書則法董香光筆致蒼老子觀賜字述彭亦以善書名

吳先聲字石岑擅書法篆摛隸分草皆工鐫印章刻意摹古而泯其痕賞識家爭寶之著有敦好堂論印一卷先聲外以美術名家者或以畫或以書或以篆刻凡若干人類次於後

李恒修諸生能詩工畫迥越恒流筆有烟雲胸無塵濁得者爭寶之

馬俊性孤耿不屑干謁達官貴人邀之作畫事畢即引身自遠不至再也花卉人物識者擬徐熙仇英云

吳宗默工寫真不但形骸容貌之似風神意致呼之欲出然不肯爲俗子寫

三鼎者曰吳鼎曰鍾鼎曰陳鼎吳字右臣究心荆關不預外事索其畫者雖樵牧必欣然伸紙若貴人造請則謝之鍾好潔如倪雲林故畫亦臻能品比病日浣滌百十次至見骨而死陳字荆山事母至孝嘗訪胡太守克寬於松江偶以蘋菓貽之藏不食詰之肅然曰將歸奉母舉座皆笑次年夏歸家啟其笥果如新摘人以爲孝感所致太守父抑齋宗伯嘗舉其畫示王麓臺稱曰直造古人今之王翬項景襄弗及也

鮑鑑字冰士書法篆刻頗嗣吳先聲之妙善畫梅拳技尤精

尹禮字觀秩本姓李贅於尹遂因之性簡傲能詩尤工畫花卉人物點綴韶秀栩栩如生妙絕一時有故人宦北京招之往強索其畫貽上官乃逃去轉徙塞上竟客死子元祚愿弱人也數千里徒步奔之扶櫬歸

李又元字雪叟早年爲諸生性高雅不求聞達書傲懷素畫師營邱每犯寒自攜

餅餌步至江干望西山積雪竟日忘歸後有劉虎山者名臺慕雪叟爲人每稱述之虎山喜飲酒晚年爲詩擬陶冲然自遠隱於傭書縣令萬鍾傑禮招之竟不往也

劉坦號古雪能詩工畫每棄妻子居古廟中日攜竹籃岸然行市上買酒食不與人語晚年左手能作畫尤蒼蒨可愛年八十餘卒恒自署曰十里江梅外史兼雲鶴笛客

程德霖工畫法米南宮故號米山尤喜潑墨法所畫用潑墨二字小印子又山亦能做米家山水

陳題字品一以資雄多才藝凡爲戲弄之具皆精妙尤工畫真氣灑然官蘭州牧被議起復雲南賓川州罷任卒雲南人得其片紙珍如拱璧

閻正濟字平舟工書性恬退搜羅古甚帖富不輕爲人書得者皆珍藏之

姚時泰字勉齋廩膳生少有文譽習柳誠懸書學使某公按臨大加賞異試畢延

寫屏聯厚贈之子德俊字聖修歲貢生亦善書藏名人墨迹甚多

歐士瑄字白珍國子生性和厚與人無忤工翰墨摹古法帖於率更平原兼擅其長

鄧宗道字東山別號懺遲老人性兀傲不諧流俗嗜酒能詩尤善畫畫法米南宮後更兼做諸家識者推爲李亦山後一人四方方構求者踵至非其人不與卒後乏嗣友人張蘅儕經理其喪並爲立嗣孫星皆樊昌運表其墓

吳邦憲字岡樓書法古拙如硬弩枯藤見者震驚極端摹倣終弗效也

黃鳳翔一名房別號無心山人善畫工琴兼擅篆刻光緒中縣令劉秉彝創修博通書院邑人圖像以識紀念鳳翔摹繪石上神情酷肖見者皆稱爲絕作性恬靜讀書多神解晚築室準提庵東蒔花種竹額曰亦園卒年七十葬鄧東山墓左從其志也

王和育字煦生幼習畫出筆不俗久之詣益精喜畫羅漢每幅成形態各殊皆奕

奕有神致舊時府城隍廟兩廡各司所繪禽獸人物均極生動之致同治志所載各圖皆和育手筆鄉人咸歎服云

胡文煥字遠村善畫蘭竹蘭着墨不多一花一葉皆有生致竹則下筆蒼老風晴雨露情景逼真

馬如龍字棟臣善畫蘭筆酣墨飽搖曳多姿極夭矯之致

劉錫奎字壽魯郡增生工楷法與同里王俊逸齊名俊逸以善書充左文襄幕洵保知縣任陝西城固縣有聲而錫奎以諸生老論者惜之錫奎能於一粒米上作數楷字筆畫飛騰求書者輒珍如拱璧云

賀冠五善丹青松竹麻雀皆具特長尤工技藝所製瓦獅子燭台香爐等物彷彿古銅質間施彩色尤斑剝逼真子鳳鳴廩生鳳儀歲貢生

鍾祥縣志卷之二十一

先民傳三

王泰明字光宇性篤孝幼喪父母哀毀如成人墓在京山歲時造祭必痛哭雨雪無阻衰疾不輟也遭亂失學教子孫皆暗合古訓嘗因避亂迷失路遇一人救之留宿倉卒忘其姓字後家祭輒書無名故人設位奠之其篤厚多類此子文煥質先文煥字暉吉性孝友屢試不遇自憾未能以科目顯乃延名宿魏大壑訓其子全臣大壑負氣甚盛每多所陵轢文煥折節敬事大壑以此賢之留館者六七年全臣得成進士官至西安兵備道封如其官

全臣字仲山康熙甲戌進士由汲縣歷官至西安兵備道興利除弊勤求民隱所至尤盡力溝洫以開西北水利自任康熙四十七年官寧夏同知嘗開渠灌田無數當道錫名大清渠俾與漢唐兩渠並峙時巡撫某詢各渠情形及修濬利弊全臣狀云寧夏古朔方也黃河繞於東賀蘭峙於西相距或四五十里遠者亦不過

百餘里南至唐壩堡之分嶺北至威鎮堡之邊牆僅二百七十五里延袤不甚寬廣而所屬寧夏衛并左右二衛及平羅所共轄五十二堡約計田地九千八百二十九頃有餘其正供除麥饌等項納銀二千六百五十兩有零外田土之賦計納糧九萬八千三百八十餘石納七斤穀草并年例秋草共三十八萬三百餘束零納壩草六十一萬零納地畝銀八百六十餘兩其湖灘又納湖灘銀一千五百九十兩賦亦綦重矣况地大半盡屬沙灘必得河水乃潤必得濁泥乃沃古人於黃河西岸濬唐漢兩渠誠萬世利也職蒞任時春工方興親詣各渠細勘竊查黃河自南而北其入寧夏之處兩岸俱係石山名曰峽口河初向東北流入破不一二里出破破之盡處有觀音堂石山昔人於其麓開唐渠一道至明代寧夏道汪文輝於距渠二十里之唐壩堡建石閘一座外閘建石退水閘四座正閘下入渠之水以五寸爲一分只以十分爲率水小則閉塞退水閘使水入渠水大則開退水閘以洩其勢其正閘係六空西四空爲唐渠兩空爲貼渠每空各寬一丈唐渠自

閘以下分八段計共長三百二十三里其貼渠一道寬三丈五尺深六尺至郭家寺地方分爲兩稍一至漢壩堡稍止長四十里名舊貼渠一至蔣鼎稍止長五十里名新貼渠此因唐渠正閘東岸地土甚高故別築此渠雖閘分兩派實與唐渠同口蓋唐渠之附庸也渠兩岸之堤及堵水之壩俱名曰埝沿埝居民挖小渠引水入田名枝渠大或百餘里小或數十里及七八里不一各於埝上建大小閘以便蓄洩名曰陡口唐渠東西兩岸共陡口四百三十六道舊例有田一分者歲出夫一名計力役三十日納草一分計四十八束又納柳椿十五根此輸將定額也其或輸用紅柳曰次席其則於草內折收名曰顏料或石灰亦於草內折銀燒造其草曰壩草以備於險要處和土築埝及啟閉各閘堵壘渠口也椿曰沙椿或釘閘底或釘埝岸使土堅固也渠內水衝之處必用土草築一墩以逼水而外用紅柳白茨護之更釘以沙椿名曰馬頭席其則繩纜之具也或修理閘底亦必用紅柳白茨鋪墊而以沙椿釘之乃蓋以石條使無沖動之患每歲河凍之時將渠口

用草塞閉名曰捲埽至明年派撥夫役赴渠挑濬各官分段督催以一月爲期名曰春工至立夏日掣去所捲之埽放水入渠名曰開水開水之後田地澆灌其法先委官閉塞上流各陡口以逼水至稍其名曰封封之際於各陡口仍酌量留水一二分其名曰俵迨水已至稍乃稍上流各稍口任其澆灌既足又令至稍封與俵周而復始上流下稍皆澆灌及時也唐渠貼渠原灌寧夏左右三衛及平羅所共三十四堡田地六千二頃有餘衛所各官分段封俵一歲須輪灌數次乃獲豐收至於漢渠在唐渠之下左衛陳俊堡四道河口地方距唐渠口三十里地形低窪直近河流水勢易入其渠口寬三十一丈深七尺五寸汪文輝於漢壩堡距渠口十二里建石閘一座計四空每空寬一丈閘外建石退水閘三座分上中下三段共長二百三十八里渠東西兩岸共陡口三百六十九道原灌漑寧夏左右三衛所屬十八堡田地共三千八百二十七頃有餘後因開導西河水勢變遷何忠堡竟隔在河中各自開引小渠灌田三十餘頃今漢渠只灌漑十七堡田地共三

千七百九十七頃有餘其挑挖封俵與唐渠一例此渠得水甚易而又稍短田少所以通利如故比年以來惟唐渠淤塞過甚雖借助漢渠不過稍分餘瀝而漢渠亦因之受困職細按唐渠之大病有三一苦於渠口之不能受水也相傳先年唐渠口下河中有一石子沙灘障水之勢以入渠厥後灘漸消沒河流偏注於東而河口竟與河相背其入渠者不過旁溢之水耳水之入渠無力遂往往有澄淤之患一苦於地渠之不能通水也唐壩以下自杜家嘴至玉泉營盡係沙淤每大風起輒行堆積唐渠經由於此實爲咽喉向者以風沙不時旋去旋積遂相與名曰地渠蓋因兩岸無埒與地平等也此處自來不在挑濬之例因循既久竟致渠底與兩岸齊甚有渠底高於岸地者較唐壩閘底約高三四尺河水泛漲時入渠之水非不有餘乃自入閘以來至此梗阻由是旁灌月牙倒沙兩湖迨兩湖既滿然後溢於渠內徐徐前行不知費幾許水力經幾許時日乃得過玉泉橋也況有此梗阻水勢紆迴水未前行而挾入之濁泥已淤積閘底數尺矣一苦於渠身之過

遠也水之入口者原自無多而又苦於咽喉之不利以有限之河流三百餘里供數百陡口之分洩其勢自難以徧給若遇河水減落則束手無策矣唐渠有此三大病而又加以年年挑濬之法積弊多端如渠夫渠草除紳衿優免外豪衿地棍及奸胥猾吏肆意侵蝕每將百姓應納草束沙椿折收銀錢代爲買備輸納名曰包納草則多係朽爛椿則盡屬短小又巧立名色隱射規避若橋梁若陡口倘有損壞俱屬官修乃借稱須人看守每處免夫草一二分名曰看丁又曰坐免甚至徒杠亦有坐免有力盡爲看丁即曰陡口須人啟閉未聞天下橋梁俱須人看守也是渠夫渠草只爲奸棍之利窟而渠工已受病實多矣每年興工之時并不查明某處淤塞某處阻梗量度工程之輕重酌用夫役之多寡唐渠自口至稍只分三工五段漢渠自口至稍只分兩工三段如某工舊例用夫五百名年年撥給五百某段舊例用夫三百名年年撥給三百工輕之處夫多怠玩工重之處夫實短少且催納顏料之役必故爲遲延及時至工迫各段督工者即令挑渠之夫役採

取顏料兩岸園林莊柳任其砍伐微論只半供渠工半充私橐額徵銀料盡被乾沒而所撥三百五百之夫亦只虛有其數而已渠道灣曲之處東岸高者西必低西岸厚者東必薄以高厚者力逼水勢刷洗對岸也每年挑濬之法如夫一百名只有三四十名在渠內取土餘五六十名俱排列高厚岸上遞相轉運一畝之土經七八人之手而對面低薄之岸必不肯加帮尺寸謂低薄岸底必有刷洗深溝恐因加帮撒土填塞以致高厚者愈增低薄者愈減是以每年有冲崩之虞或由埤底鑽潰或水由埤上漫倒皆不肯加帮低薄所致也至渠夫則只由衛所經承撥派名曰安渠賊囑者派之路近而工輕貧窮者派之路遠而工重且將一段之夫雜派數十堡之人聽其自赴工所管工者莫知誰何中有逃者報官查册拘提往返動至半月而一堡之夫又派數處必遠至百里或二百里以外使之奔走不遑更將撥夫單內故意填寫錯亂使之赴各段自行查問總欲令民不得不致遲誤以便定取罰工及各管設立委管渠長等役俱係用賄鑽營者一到工所每

人包折夫役一二十名不等更有豪裕地棍指稱旁枝小渠請討人夫數十名官必如數撥給實無一人赴彼所請之處伊等竟折錢分肥是以額夫雖一萬一千有奇而在渠挑濬者僅可得半又率以老弱充數官司查渠只走大路委管渠長人等探知即僱沿途莊農人等應名點後即散甚且預知官司到來令人夫於渠內挖土堆積如塔形以堆土之高詐爲挑挖之深使高低莫辨官司去後夫役仍將所堆之土攤平渠內其運工高岸者不過數十畝其官司必由之處或挑挖數里其避遠不到之處亦夫役足迹之所不到也總因兩渠分爲八段每段至數十里無一定之責成無一定之程式而奸棍折去夫役因循延至一月遂相率而散其未經挑挖者雖有十之六七只謂工多夫少付之無可如何渠道之淤塞實由於此職蒞任之初巡視渠工見漢渠之上有一小渠名賀蘭渠寬數尺長十餘里乃前任寧夏道管竭忠據居民所請開濬者引黃河之水灌田數頃職上下相度見河水直衝渠口而第苦於口低身小導引不得其方莫能遠達乃請於本道欲

借此渠形勢另開一渠以助漢唐水力之所不逮本道謂此渠曾據士民呈請上憲委員勘驗形勢甚有裨益後以工程浩大約計用夫萬餘一月尙不能竣又慮修理閘壩需費不資遂爾中止職謂用夫不得其法雖數里亦覺艱鉅若量土以計工量工以計夫此數十里之渠計日可成渠若告成閘壩自易易也本道乃令職與都司役用額夫距舊賀蘭渠口之上三里許直迎水勢另開一口至馬家莊地方引入舊渠而擴之使寬行三四里至陳俊漢壩兩堡之交即舊渠而西引水由高處行以達於唐渠雖遠至數十里而莊園墳墓皆繞以避之毫無所傷其所損田畝盡爲除厥差徭居民莫不懽忻樂役凡興工僅七日而渠成不崇朝而徧注田間自來高亢之地一旦水盈阡陌婦女孩童咸出聚觀驚喜之狀若有意外之獲其渠口上距唐渠口二十五里下距漢渠口五里乃右衛唐壩堡所屬東西共陡口一百六十七道灌溉九堡田地共一千二百二十三頃至宋澄堡仍滙入唐渠本道以此渠閱數十年道旁之築者今告成於七日且相度形勢較王惠民

向所勘驗引水更易不覺喜形於色謂移此用夫之泔以修唐漢兩渠不難坐令各渠疏通也於是於四十八年竟以此渠閘之憲臺倡捐俸資於陳俊堡建石閘一座計兩空每空寬一丈閘外建石退水閘三座工既成蒙命其閘曰大清閘渠曰大清渠其規模竟與漢唐兩壩鼎峙矣此建閘之處乃舊貼渠經由之地貼渠較清渠高六尺有餘竟與清渠截斷職乃造木笕置諸閘後兩旁石牆之上中更有大木架之傍橋房之欄以渡貼渠之水自西而東笕寬四尺長三尺名曰過水此不特貼渠無傷而閘上閘下水流交錯波聲互應風景大可觀也彼陳俊等九堡田地乃素用唐渠之水者清渠既成則不須唐渠灌溉其入唐渠之水可使之直趨而下而所省灌溉九堡之水實足以補唐渠水利之不足不患渠身之過遠矣况清渠餘水匯入唐渠者又能大助其勢耶而唐渠之病去其一至於唐渠口則於黃河內築迎水埝一道用柳固數千內貯石子排列兩行中間用石塊柴草填塞上復用石草加疊過於水面更用大石塊襯其根基其埝寬一二丈高一丈

六七尺不等自觀音堂起至石灰窰止共長四百五十餘丈逆流而上直入硤內中劈黃河五分之一以爲渠口口寬至二十餘丈較舊渠口約高數尺挽河流東注之勢逼令西折入渠是迎水埤之力已能逆水使之高束水使之急吞噬洪流勢若建瓴不患澄淤矣而口又加寬受水實多渠內之水賴以倍增而唐渠之病又去其一歷年不挑之地渠則多用夫役挑濬使之低於閘底以通水路兩旁復立高厚其岸使渠流至此得以疾趨不至繞道於湖水行既急則沙隨水走莫能淤積而唐渠之病又去其一由是口內洋溢咽喉無阻向之唐渠以有限之水灌溉三十四堡田地常慮不足者今以有餘之水又省九堡之分洩只灌二十五堡自無不充裕矣不須借助於漢渠而漢渠亦并受其益矣至若奉委協助都司挑濬各渠則革盡從前積弊惟以新渠用夫之法爲例於清明興工前一月將漢唐各渠自口至稍逐細查丈更用水平量某高低如某處渠道淤塞應挖深寬若干某處埤岸低薄應築高厚若干某處工重工輕應用夫若干預造一工程冊於是

量工派夫每夫一口以挖方一丈深三尺爲率夫數既定乃自下而上挨堡順序至分界處即用彼堡之夫接工照各界限挑挖其夫即用本堡長督率挑挖之土俱令加疊低薄埝岸之處不許妄派多人致妨正工其枝渠之大者往歲於各堡中混派今則只令受水之民自行挑挖夫數或減於舊額而用工則不啻數倍至餘里及三五里之小枝渠即算入正渠工程之內一併挑挖不另撥夫役以杜隱射包折之弊職復每日於渠身內往返巡查如挑挖之不合法者即責究堡長工程無包折之弊夫役無遠涉之勞而逐段皆有責成皆有程式自相率盡力不敢怠玩又廉查壩草六十一萬不無侵漁特對半減免三十萬有餘民間有田一分舊例納草四十八束者今只納二十四束以是寧民踴躍趨事爭先恐後各渠疏通無阻埝岸又極堅固所以立夏開水之日黃河水不加增而每年開水月餘水不能到稍者今不過四五日稍末即澆灌偏足矣鎮城以北往往不沾涓滴者今日偏種稻稗矣寧鎮各渠之情形及修濬之利弊如此此皆差員王捷所目擊者

也獨是職革弊太盡立法太嚴委管渠長盡遭革除豪衿地棍勢難包折隱射之弊俱爲清出枝渠之安不能分肥而奸胥猾吏歲恃渠工以填豁壑者今且無所施其巧是數萬生靈雖云受利而積年奸究未免側目矣竊思古人之於渠務額設有夫力役有期物料有備分五工八段使各盡其力立法何嘗不善迄於今非徒無益而又害之總皆趨利之輩作弊於所忽壞法於不覺職何人斯安保其所立之法不即壞於旋踵耶伏乞嚴飭司水利者每年以去歲春工爲例而再爲神明變通於其間不使已效之法復致更張已通之渠復致淤塞則憲恩直與河流并永矣嗣擢平涼知府賢聲洋溢會大軍討澤旺奉調隨軍支放晉秩潼商道時師行日久餉不繼軍且譁全臣獨力貸商賈資濟軍事定司計者諱遲輓之罪以所貸爲全臣虧逮赴司寇一時文武皆自危全臣曰吾當籌畫顧濟時旱置軀命於度外肯令他人分過耶毅然自實其辟上以爲非他人侵肥者比特宥之令隨副都統范時繹往瓜州屯田瓜州地坦沃淪於大漠者數百年全臣遠引疏勒

河水大興屯種歲得軍食數萬既而土魯番回民舉國來歸議即安插瓜州授全
臣安西兵備道專肩其事於是分築五堡俾各止其所計口分地回民安業時長
子世奎從塞外死竟以馳驅王事不暇一視積勞致病卒於蘭州年七十三次子
世琬任戶部雲南司郎中

念臣字楓存質先子康熙己丑進士居家篤恩誼性開朗於人無忤歷官五邑得
士民心乾隆元年膺行取補吏部主事

个臣儻有大志與念臣同受業李石湖之門郢舊有官河繞城久淤石湖與兄
眉三倡議開浚个臣毅然任之請於知府張炯生遂創捐董其事冬雨雪晨往暮
歸不憚勞苦功雖未竟志存利濟鄉人咸稱之後筮仕金匱知縣卒於官

李應科清初由江西來遷時郢城經流寇之亂荆榛載途十室九空應科樂善好施
鄉里稱爲長者子巒以詩畫名海內次仙次亦密善承厥志有清一代其子孫登
賢書貢成均者後先踵接補學官弟子員者五六十人皆應科積累有以致之也

巒字亦山號秋池兒時僅讀論語因病較誦冠彌甚遇異人授吐納術神采日旺始折節讀書喜吟詠有會心處輒謂得畫家三昧因復學畫遂以畫名高安朱文端公軾巡撫浙江時嘗以巒畫貢內廷仁廟極爲賞識當世榮之李眉三大令蘇宰江都延巒往與王樓村顧俠君輩詩酒酬倡王顧爲梓其集行世巒天性純篤六十喪母哀毀骨立郡太守偉瑟以賢良方正薦辭不就卒年八十七著有快雨山房晚秋書屋邗上豫章等集

如珂字鳴玉仙曾孫仙生元紳元紳生盼世守一經如珂幼負奇姿不屑屑章句學年十五六請於父母曰吾家世習儒然無以詩書顯者願改習商何如父母姑聽之爰設肆逐什一利歲恆虧一日有相者過如珂注視久徐曰君將以財雄一鄉勉之其後遂由商務大起其家晚歲常慮子孫託名習商日趨紛華之途不知所以自振詔之曰而曹以而翁由商起家抑知商能起家亦能覆家乎而翁儒家子棄儒經商幸際昇平差免隕越人也亦天也然而翁固未嘗一日忘儒也性好

施予自三黨以逮一鄉之內倚如珂爲生者歲恒數十百人年八十餘卒子三人孫十人

如璽曾孫亦以商務起家其時稍後於如珂而推所有以濟人與如珂同子五人孫十二人

崇本如璽第五子性友愛與諸兄析產時以諸兄子孫衆多欲破按房分產之例改爲按人分產諸兄持不可崇本請益堅親族乃交稱曰兄弟多以爭產聞崇本獨請讓產可以風世矣遂從其議

灑字雲村如珂孫父崇盛灑幼嗜讀性穎悟塾師授中庸畢即恍然有悟誠之一字其後益肆力宋五十書而於濂溪通書尤拳拳服膺嘗謂通書者中庸之注脚中庸者大易之注脚易言大哉乾元萬物資始至哉坤元萬物資生萬物之資始資生者誠也中庸以誠爲本通書又從而闡明之凡以誠者天地之所以生人即人之所同受於天地而人卒有聖凡之別以聖賢認得誠字親切身體而力行之

彼蚩蚩者曷足以語此遂揭體誠二字以額其堂晚歲復作守真居士傳其辭曰
守真居士與予爲忘形交一日問酬世之道於予予應之曰當今之世宜圓勿方
宜柔勿剛圓乃滑滑斯潤矣柔乃媚媚斯順矣否則吾懼其將與世忤也吾懼其
觸時諱干俗忌將受人之侮也吾懼其踽踽叢叢獨來獨往人將莫與之伍也吾
交吾子有年矣吾子峨冠博帶矩步規行慄萬物之在抱慨四維之不張束身禮
教侈口倫常將欲黜邪存正抑陰扶陽是猶會冠裳於裸國陳詩書於互鄉其不
仆且僵也幾希矣居士曰嘻吾知過矣雖然吾亦行吾素耳非必標子子之名高
落落之概有所容心於其間也往者席先人之業蘧廬風雨左圖右書窮年兀兀
與古爲徒吾行吾素誠不知世態人情之爲何如旣而擁臯比於蒙惠之間口講
指畫吾道獨尊閒與二三友朋擘箋分韻剪燭論文吾仍行吾素焉所謂世態人
情者曾何足動吾之聽聞及夫赤眉肆虐海內騷然予乃度重嶺浮巨川東游齊
魯北抵幽燕所居恒二三年所結識者亦累百而盈千予方挾本來之面目與斯

世斯人相周旋而目笑腹誹與面折者已紛集乎吾前形形色色隨時變遷波譎
雲委莫測其端予始駭然驚驚夫世無常態而斯人之胡不情也予繼憬然悟悟
夫斯世之態斯人之情奈予故步自封而不知所以處之也予將如圓而滑者突
梯脂韋以圖潤乎寧行吾素以立吾之命乎予將如柔而媚者呢訾喔咿以效順
乎寧行吾素以率吾之性乎疇賦厥性惟天之命疇受厥命惟人之性惟命惟性
乃天乃人兢兢自守俾完吾真安能以身之察察受物之汶汶者乎於是歸而隱
去爰作歌以贈之歌曰世風愈下兮虛憍日張俗情難洽兮迂拙莫藏倘隨波而
逐靡兮寧隱曜而韜光嗟歲月之既逝兮羌故土而難忘翳衡門之在望兮樂泌
水之洋洋願素心以自矢兮終吾身而徜徉灑是傳殆借以自況也灑內行純篤
垂老弗衰以恩貢生終卒年六十九著有體誠堂詩文集子春藻諸生世情世照
均早卒弟廷彥歲貢生

樹植原名俊字育堂如璽孫父崇寬生子四伯萬青季鍾嶽均歲貢生鍾嶽官利

川縣訓導叔奠南郡庠生樹植其仲也道光癸卯亞元授河南林縣知縣歷署鄭平臨漳邾等縣知縣所至勤政愛民有循聲子五人孫八人

籲嗣字俊三萬青子少負文譽書法力摹率更咸豐辛酉以優行貢成均考取八旗官學教習選當陽縣學訓導

鏡蓉字芙初號績咸祖崇忠如璽長子父澤潤附貢生鏡蓉天姿英俊同治甲子舉人以知州分發湖南癸酉充湖南鄉試同考官所拔多知名士授道州知州署理新化縣篆卒於官

慶蓉字鏡人祖崇德如璽次子父漢珍邑庠生早卒慶蓉幼孤性穎悟弱冠補諸生旋食廩餼時黃西春太守翥先隨左文襄西征招慶蓉佐戎幕以軍功保同知銜選昌吉縣知縣赴部領憑卒於京師鄉人惜之

德馨字麗生樹植孫光緒甲午舉人兄弟三德馨居長次兆雲廩生次德培增生互相師友出入必偕其友愛實出於性生兆雲承世父祧舉所受產與德馨德培

同爨艱苦卓絕多恒人所難德培嘗割股以療親疾其卓行皆可傳

梅質性仁厚康熙十古五年隄決墓冲塌白骨漂露質負籠拾之買櫬另瘞成二巨塚一在教場旁一在吉祥寺左屬子孫每節澆奠子前瑗守其遺言後有調鼎者行詣尤著

調鼎字和羹廩生篤行誼乾隆戊子乙巳間歲大旱斗米值千錢調鼎竭施濟力所全活甚衆時有倡爲過劫說者聞之愀然曰行善孰有正於忠孝仁義者乎匪是則邪此奸人煽惑愚民以爲亂資耳出重貲計獲衍教頭目數人燬册籍切論利害悉令改悔調鼎沒教匪果猖獗伏誅改教者獨克保全所著有惹雲堂集藏於家繼調鼎者有族子運開

運開字齡亭少貧以勤儉致素封好爲義舉族黨中有困乏者必矜卹於老弱孤寡尤加意焉時有復初堂者隱姓名行善道光丙午丁未之歲就龍山報恩寺設義學五所無力子弟受業者二百餘人又助修蘭臺書院與廣慈閣道路運開皆

與聞其事孫傳瑞

傳瑞字符五咸豐辛酉拔貢朝考一等以七品小京官分吏部尋改知州分發山東即補歷任恩縣臨邑縣改署歸德麟務有清廉聲卒於歸德任所宦橐蕭然賴同官賻贈始克歸葬孫立中

立中字庸菴號晉鹿宣統己酉拔貢父歿數月始生幼慧年四歲塾師課孝經及四子書即朗朗成誦祖傳瑞卒歸德麟務任所立中甫八歲宦後孤貧幾不能自存稍長應書院課試博膏火助甕餐資未冠補諸生旋食餼遂借授徒謀生科舉廢後四方辦學務者爭相聘請曾任荊南道師範兼荊州府中學監學本縣勸學所長績學植行士林矜式性純孝事節母能曲承其歡當五六歲時遇母疾作輒依依病榻母或呵使就傅未忍或離迄壯老如一日鼎革後當途重立中名委任京山縣知事以母老婉辭其不慕虛榮如此

聶之翰字衆藻號陶菴由潛江來遷卓然負人師之望魏繼宗大壑王泰生曉堂皆

出其門之翰講學以六經爲主而於濂洛關閩條分縷晰俾學者有所依據康熙
癸卯舉於鄉選黃陂教諭化諸生之桀驁文行歸於和雅時于公成龍任漢陽府
甚尊禮之遷辰州府教授致仕歸居林下二十年猶誘掖後輩不倦年七十八子
本振

本振字伯詵歲貢生年十一即受知學使宜興蔣公永修勤學好問所植日厚試
輒冠其曹然終不獲一第家居課徒造就甚衆郢中良師稱本振爲最學士楊炳
孝廉李兆鎮皆本振教成之子聯開會開俱諸生

向兆麟字石村號雪麓世爲京山羊亭人父景伯慕蘭臺勝概遂家焉兆麟康熙己
酉舉人授武昌教諭殫心訓誨士習文風丕變方伯徐公惺甚重之丙子分校雲
南鄉試由永州教授擢補雒川知縣有清惠聲卒於官邑民祠焉兆麟詩古文流
播人口名震一時於詩尤長樂府足與楊鐵崖李西涯抗席又工畫仿王叔明而
出入郭河陽之間著有雪麓詩文集十八卷子學敏亦能詩以歲貢終

周昌字培公文龍荊門人明崇禎七年死流賊之亂母孫遺腹生昌乙酉闖賊掠孫里欲劫孫孫大罵抉面觸夫棺而死康熙十五年固原提督王輔臣叛大學士圖海視師西陲昌時以內閣纂修謄錄官從征進謀曰關陝天下之脊也吳逆不從川據陝而戀棧常岳間誠出下策今輔臣舉足重輕寔係天下安危雖因一時激變通吳耿二逆而心戀國恩猶盲之不忘乎視痿之不忘乎起也倘得能言之士諭之必復降圖首肯曰孰可往昌應之曰某願往且陳母孫氏殉節狀謂往而濟國家之福往而不濟願以身報國爲母請旌乃單騎入平涼七往返輔臣以軍降上嘉其績賜蟒服加布政司銜補授山東登萊海防道實支二品官俸旌母孫氏予祭一壇子家齋

家齊字二南少補郢西庠生以乙丑拔貢授定海知縣定海故舟山地新置縣家齊噢咻勞來城郭宮室之役數月竣工民不知疲躬循阡陌憫其地斥鹵苦旱澇創議開渠民利賴之海上多大風遇火民廬舍立燼一日城外火家齊馳救伏地

祝曰令有罪即焚令勿殃吾民赤燄繞身如電須臾風回亦無所苦邑多虎虔禱於神虎引去史所稱反風虎渡河者今再見矣當路方特薦以內艱歸再補烏城治行一如定海僅年餘疾卒士民環哭櫬歸皆縞素送之追繪其像於弘禧寺朔望禮奠焉子慈永甫二齡遺腹子恕永慈永踰十歲即補弟子員恕永亦以冠童子軍游泮學行并著惜俱不壽慈永子依仁貢成均代有聞人亦節母之報也

石佩玉生而英爽喜騎射吳三桂之變以百夫長從綏遠將軍蔡毓榮攻神龍關奮勇先登議叙把總歷陞至湖南提標中軍所至勤訓練覈軍實戢獷悍禮師儒自綏遠將軍以下皆推重焉子思璠官泉州游擊其後以征金川起家者有杜世忠王希章而道咸間勦賊有功者若程光大閔得元石學清之屬亦有可述焉

杜世忠字斗韓少跳蕩母戒之奮走貴州隨撫軍張廣泗破黃連菁關刀溪有功補千總乾隆十三年從征金川攻色底雙矚破之割賊首懸諸腰血痕糊衣方戰時賊鎗彈如雨世忠益挺身前進暮歸左乳下傷孔如錢始覺棄鞭而僵隨升守

備踰年瘡發卒

王希章少入行伍弓馬精強由本營外委仕至宜昌守備以征金川有功升湖南提標右營

程光大目不識丁而膂力過人咸豐初從軍有功授五品藍翎以勦賊中礮死賜卹承襲

閔得元由行伍補外委陞京山把總從軍浙粵蘇皖及湖南北諸省有功賞戴藍翎同治二年賊竄京山得元兵不滿百嬰城固守卒保危城士民感戴焉

石學清以勦粵賊有功補提標右營把總咸豐八年防堵隨州以功加游擊銜署守備後擊賊麻城之歧亭戰死

會明字長雲號望蓼明金堂縣知縣遜之裔祖發祥任廣濟教諭死流寇之亂其世系已詳前明性仁孝早年喪母蕭氏哀毀骨立杖而後起歷事繼母蕭氏張氏許氏王氏皆能得其歡心庭無閒言鄉黨尤以爲難康熙戊午鄉試亞元授沅州學

正整理士習修薛永清書院沉有先朝名臣滿朝薦後因祠產構訟年久弗決明奉檄審理一言開悟兩造悔泣而罷尋以目疾告歸更號樗逸叟作樗逸叟傳取莊子所謂知有用之用而不知無用之爲有用以鋪張其詞著有曾氏家風集尋樂堂集江行草樗逸晚集子涓歲貢生松滋訓導績學能世其家

楊亦溥字宏士號懋岑康熙辛酉舉人幼穎異十歲能屬文見賞於荆南副使王公長益力學壬子以拔萃貢成均越十年始舉於鄉官衡陽教諭腹笥便便著述甚富所刻有鳴鳴集與弟亦奇亦恭以孝友稱於鄉里

亦奇字恒士以廩貢官江夏訓導兄亦溥性豪邁廣聲氣歲費不資亦奇嘗潛爲部署俾無困竭而自甘粗淡公車之年亦溥日飲讌嘯歌不辦行裝亦奇預謀裕如卜期而趣之行值父歿兄弟哀毀骨立比葬數郡皆至時亦恭尙幼與亦溥同撫之如慈母教之如嚴父亦恭亦能循循祇恭與兩兄無間言丁亥邑大水兄弟捐米粥賑活甚衆子芊官北路同知

亦恭字寬士早卒子蕙太學生官絳州吏目

江鼎金字紫九號惺齋世居荆門康熙四十九年來遷父上峯績學有高行年五十始生鼎金教督甚嚴鼎金幼岐嶷能文章康熙乙丑進士初知高苑縣招集流亡出粟賑貸編審戶口查鰥寡貧絕者開除之時有我公減丁願公添丁之頌及擢刑部主事執爰書必詳慎全活宛平民王懋修等百人之獄督學陝西公明寬大士林頌之補口北道值禁旅西討督辦軍具調發轉運著有勞績歲飢請備倉穀資種捐俸以賑或以爲非監司事答曰民在水火豈能俟州縣文書需遲時日哉地震市棺掩斃建義於鷄鳴驛置田三百畝永作膏火公務暇即親身督課邊方之士登科目者日起以老乞休八府肖像以祀設位於宣化之三賢祠易名四賢著有問心堂詩集口北治行紀略子五曾福曾培曾城曾圻曾慶曾福字樹安績學自好由貢生爲蘄州江夏道州各學官訓士有方三邑懷之江夏去思碑則太史夏力恕作也

曾培字樹滋初任石首訓導廷試第一遷山東冠縣知縣有惠聲督運西餉盡瘁軍前膺卓薦丁父憂歸以弟曾城通判河陂之賙盡鬻已產代完之曾城得開復曾圻字樹震工書能文康熙甲午舉人以曾培鬻產助曾城乃鬻已產助曾培曾培卒獨撫幼弟曾慶成立率以身教一門孝友洵可風云

衛良佐字子弼號鶴州原籍山西曲沃明清之際其父避亂而南始卜築郢城良佐以康熙庚午舉人授會同教諭正文體端士習巡撫潘某以卓異薦授長樂知縣生平渾厚不露圭角及其爲政則精明嚴毅吏畏民安督撫每有疑獄輒委良佐讞決稱平允焉長樂舊俗親死多水葬遺骸遍野良佐用孟子上世不葬其親意編俗語數千言派員宣講朔望復親身演說聞者泣下水葬之俗賴以丕變九載致仕歸里依然寒素沒後子孫不免食貧著有隨寓堂詩集子淇貢生

張聯元字捷三號覺菴康熙辛未進士初令新城地僻民瘠撫卹如子再任曲陽俗健訟以德化之期年無片紙上公堂者大吏交章薦之擢主事歷郎中遇同官公

議不爭辯但和顏出片語折衷罔不帖服出守浙江台州府台文風久不振會課獎勵且延形家相學宮地勢捐俸建坊聳峙以益形勝自後科第果不絕台州離省遠舊例各邑幫貼夫馬每數百金聯元至立革之官民稱便後官欲復之卒敗事台人益頌張清德壬寅以疾告歸年七十三卒子三錦鏐銑鏐字健亭官無爲州知州

谷旦如字翼宸性冲夷與物無競而信義慷慨然諾不欺文章秀麗品格矜貴試輒高等沁州吳相國總制三楚賞其文有玉色金聲之目康熙丙子舉人官新化教諭勤于講藝捐資以修學宮資給單寒人多稱之著有詩文集藏于家弟暹如字岱瞻同年登武舉亦能詩

鄧州彥字倩升少英敏爲諸生試輒高等康熙乙未進士授四川黔江知縣黔土習極陋州彥勤會課講經藝文風頓振黔民不知種二麥刊樹藝春碾法戶給一紙始享來年之利黔介川湖土司間侵疆理盜樹畜州彥力杜苞苴申揚國憲土司

憚其清剛遂不敢犯境丙午充鄉試同考官得士公明入翰林者二人攝塾江二年悉如治黔督撫以守廉才長薦調西昌縣旋委運萬年吉木舟次山東濟寧病卒子鴻緒雍正己酉拔貢任侯官縣丞

高承淑字澤遠其上世居江西明嘉靖時有名鑿者始遷居鍾祥祖大椿父銓俱明諸生承淑少爲府學廩生試必高等康熙間循次貢春官廷試雍試皆第一授湖南辰州府麻陽縣訓導地界苗疆士染曠悍之習多方化導士習丕變成嚮學媿於中土復以餘力奉檄闢險以濟討叛禁旅功成不有致政歸郢中英俊質疑問難者無虛日守令每式廬諮詢地方利弊知無不言往往見諸施行而足跡不一至公府子文枻廩貢孫士熙

士熙字敬輿號密齋郡廩生雍正間貢春官歷官陝西鞏昌府知府以失察屬員虧空被議旋開復請終養歸里輯有湖北詩錄其自著曰春暉堂稿附詩錄後子

嵩

嵩字仰山以父士熙所輯湖北詩錄書成未梓復廣爲搜羅得若干首付劖劂以繼先志其自作村居詩四首一時和者甚衆數傳有啟字者以醫名

啟字字寰之好學善問楷法尤工嘗戲用同樣紙類書某字疊而爲一映日視之不爽毫釐其工整如此屢試不遇改習醫光緒時郡太守吳某及都司張某均因眷屬病危他醫束手啟字立拯之各贈扁額以榜其門由是名重一時子雲海諸生

王時來字遜修父宗聖官潮州府經歷信義慷慨有古烈士風時來由廩貢生筮仕得遂安縣丞以上考遷平涼知縣時征噶爾丹六師出塞經平涼供應浩繁時來籌畫多方軍民兩便繼任陽穀最久逢奇旱不俟詳請開倉以賑民賴存活長子能任宰肥鄉馳書諭之曰當國家有事而蝟縮奈公忠之誼何西征轉餉爾其任之能任遂毅然造軍門請令領萬石米出紫塞過青塚至拜帶里以濟軍餉事畢省時來山左第問邊事無慰勞語其教子嚴而有體率類此能任後擢刑部主事

次子能佑官南城副指揮孫敷賁東平州知州華賁葭州知州

楊柱國字含芳郡庠生居城南東港性內剛外和不爲峭厲絕物而里中佻達子弟自不敢近康熙丙戌丁亥連歲飢疫施粥施藥鬻田佐費雍正甲辰大水隄潰率家僮操舟拯溺屢瀕於危不輟子炳貴謙德彌崇與農夫野老處意油油然人亦忘其爲封君也卒年七十二

炳字蔚友號筠谷少英異力學工文門內之修惟謹雍正癸卯會元御批首卷甚奇卓識名言不獨優於諸卷即近科亦不多見殿試一甲第三名入翰林直南書房賜廬圓明園側累遷侍讀學士充日講起居注官己酉典試江西壬子典試直隸提督福建學政所取士如鄂制軍容安介尚書福英相國廉曹宗伯秀先陳太常兆崙趙侍御青藜皆一時碩彥得人稱盛炳念母老疏請歸養林下承歡二十餘年引杖板輿肫然孝子晚年每語人曰吾當日憾未能以經濟酬主知奈職難越俎至今耿耿言時目光猶如炬聲震座隅其願忠之心雖老不衰也炳鶴姿俊

采接鄉黨以和後生皆喜其議論而生平大節不渝忠孝卒年八十二子曰埭曰
埭曰垧

曰埭字伯岑號西巖乾隆丁巳進士知太和縣淡於榮利挂冠歸侍父林下優游
縱觀史書每風雨蔽窗咿唔徹夜不殊諸生攻苦書法秀勁成家文章典麗豐骨
玉立才品爲一時冠

曰埭字仲宣承父蔭以親老未之官嘗賦村居數律有愛日喜迎萱砌秀惜陰嘗
把唾壺敲移文莫厭頻頻讀免被山靈賦絕交句可以見其志矣

曰垧字叔平乾隆甲子舉人亦工詩登京師柏林閣律云層梯暗踏響流鈴撫檻
平臨老柏青西市腰橫雙鳳闕南山面對五龍亭傳僧滿壁沾宸翰鏤板迴廊漏
佛經恰聽鐘聲夕陽下飛奴無數遶朱樞他作工秀多類是諸孫踞奎吏部主事
魏繼宗字紫沆號大壑幼穎異點筆成章試冠童子軍名噪一時繼宗自視皎然益
肆力古人之學貫穿百家一軌於正學使蔣公永修評其文有三楚無雙之目并

索其詩古文副本珍藏行笥太史金德嘉任府學教授待以老友平生造就後學以德業文章蔚起者相望而繼宗顧自以青衿終所著張霄幄詩門人李蘇刻於江都王式丹讀之以爲奇作奄有明清諸家之長其制藝則黔撫何世堪爲之序門人李蓮授諸梓又漱沈卮詩集虹村文集各若干卷藏於家

李守軾字侔蘇歲貢生任桂陽州訓導在官十二年兩署州篆政通民和巡撫陳公廷弼甚器重之以老告歸去桂之日諸生立碑紀之有云宅心寬厚行己端嚴獄獄懷方不徇俗以卑道循循善誘能容衆而尊賢蓋實錄也

蔣應賓字克寧其上世有諱遇春者佐明太祖有功授指揮使洪武己巳調守安陸衛遂家焉子孫繁衍曰健曰濟川曰大用皆明舉人大用數傳至應賓恂恂好善舉步皆有規矩嘗捐資助修負郭兩大橋寒暑不怠子肇昌以諸生效力軍門有功任廣西永寧州知州姪佇昌

佇昌字占五號與堂郡庠生蕭灑簡曠不問家人生產爲詩如其人清不傷薄奧

不苦澀書法絕工直入右軍之室性喜飲客至必酌獨處亦醉名所居曰無悶計其生平蓋未嘗一日攢眉也子鴻騫鵬騫均有聲庠序間姪鳳騫尤知名

鳳騫字翔于號丹峯生八月而孤依母左右未嘗遠離康熙丁酉副貢雍正丙午舉人丁未會試踰數月始歸母子抱持而哭遂絕意公車自是晨昏色養孺慕殷殷母氏享高年而終族黨咸以至孝稱之性尤仁厚凡地方利弊惻怛相關時以文字動當途如因明代楚福田之貽累於民作楚田福田謠其詞曰明祚終真主出清四海蘇萬物前聖作後聖述輕徭賦舒拂鬱擬漢唐將超軼在往古唐虞匹利澤周民見休凡有病胡不瘳明藩亡禍尙留楚福封恩禮優一鄂城一中州向吾邑括田疇俾出粟養雞鶩折徵重今猶酷念前明社久屋何有楚何有福生盛世被遺毒百載中吞聲哭聖主恩等厚坤誰以此達九閭舉明燭照覆盆應動心沛恩綸減過半惠元元萬年害聽輿論又以漢水宜疏而不宜防隄防之患起於明世閩宦作長隄賦曰維漢江之東岸長隄屹峙而曲折雖云保障乎田廬寔則

爲禍之孔烈自有斯隄年將二百耳聞目覩時有衝決疏或一二十載隄則連歲壞缺永荼毒乎蒼生害十倍於淹沒當其江流暴漲蕩蕩洶洶內方西管水勢趨東隄身雖高沙虛土鬆加以連綿之陰雨助以猛烈之狂風蛟龍怒吼鯨鯢橫攻忽焉傾倒萬雷奔轟蜀江之趨瞿塘諒不過是黃河之下龍門差與此同近者廬舍之蕩析遠亦田禾之一空行旅胡避未弛擔而汨沒於洪流牧羣胡歸羌逐隊而浮沉乎波中載胥及溺數何有窮旣莫保夫軀命又安問夫農功其尤慘者家有未厝之屍棺野有久淹之骸骨忽與流而俱逝或當衝而起發漂散紛紜暴露顛越男婦老幼混雜而亂委溝壑孝慈子孫尋覓而罔能識別甚於終天之抱恨世世仰天椎心而泣血矧乃坦平之區俄成潭淵膏腴之產沙礫積焉國賦於何而措辦將受累乎年年凡有潰決莫不皆然竊憂數千百年之後并無所謂樹桑種麻之良田大災未平大役隨興工築所費數倍維正之供敲撲所施嚴於逋賦之刑民無寧日官有考成即當不潰之年歲修率以爲常亦不免於夫征俯仰與

慨推厥禍始無知妄作令人髮指故明正嘉以前未仗隄堰遏水支河分流旋來旋止縱有汎濫不入城市但淹禾苗不傷赤子死者永固其窀窆生者咸安其田里何有於潭淵之浩浩何有於沙磧之累累隆萬之間閹黨擅權既張威福兼富金錢作俑築隄護其田園貽害至今罪直通天十餘年前憲檄連翩催督加徵欲等邱山曾不見高則愈險險必不堅又不知鍾邑之城郭倉庫官署民廛不在隄內皆近河干况乎沿江上下東西兩灘萬頃千百萬戶人烟奈何胥棄之而不顧而求保區區南湖之一灣然求保而不可保何嘗永慶乎安全此豈大賢之創垂仁人之遺愛奚必守爲令典而不刊我非言之狂我非見之偏明者審利害權輕重當必太息痛恨於已往極惡之宦官右二作文辭雖未盡美然痛陳弊害垂淚言之以冀當事採納其有功於桑梓者甚大故備錄之子淳邑庠生孫樹敏太學生并能守其家法

高雲路字向五號抱廬邑諸生性狷介卜居遠城市築雨香亭竹木翳翳翳然絕俗

惟與二三老友文字往還工詩善書尤喜掖人才有吳修人以賤工求食於鄉雲路愛其敏慧教以詩詞其人遂以文名雲路詩清削有態吐納自異著有抱廬全集及兼山堂詩集曾孫凌霄乾隆甲午舉人平遠縣知縣

徐孟隆字次山總角能文與楊亦溥同爲荆西道王公所器重魏大壑衛鶴洲輩皆切磋友也學使蔣永修三試三以孟隆冠文名愈盛所著詩古文皆工門人經其指授者輒聞於時

王元垣字雪屏郢上名家子少年折節攻苦博極羣書厭制藝風氣日趨詭異以精粹雅健之文矯而正之家雖席豐而神氣冲淡舉止有則家庭之誼尤周摯以歲貢選雲夢訓導辭不就子二鈞錦俱力學砥行惜皆早卒鈞著有詩集孫宗泗宗漢能守其家學

雷頒制字範周少孤事母孝友愛諸弟尤篤肆力稽古刻苦爲文冥心獨造一掃陳言試輒冠諸生卒不得一第而意氣激昂曾不少挫同學爲梓其制藝行之

胡方明字月山號良齋童子時與胡抑齋宗伯作梅同受知學使文水鄭公目爲雙
璧丰姿都雅而醇樸自守究心經學年五十後始事吟詠居然正始之音人比之
高逵夫以明經終著有延綠堂集

張顯德字子宜郡庠生時方習爲庸熟文顯德獨毅然學古自唐宋上溯秦漢舉業
宗歸唐二家外多不寓目試輒冠軍學使如宜興蔣歸安姚皆器重之家徒壁立
一介不取同鄉語文行卓絕之士指必首屈然卒不遇無子

劉國棟邑諸生勾年應童子試遂安毛會侯在邑署校文大奇之父沒哀慕終身事
王父母養體養志喪葬俱克盡禮兩弟兩妹婚嫁皆一身綜理兄弟同炊二十餘
年弟國楷國模俱慶生與國棟并以孝友稱

張光旭少從衛鶴洲游經術湛深廉隅謹飭一介不苟尤樂引掖後進所成就者甚
衆足不踐公府而見義必爲有孀婦何氏矢志守節豪強逼嫁光旭立白於當事
遂全其節里中稱爲仁者之勇云

何天衢性至孝母鄴病劇割肱和藥以進良已其後父尙明患寒疾復刺肱血和藥飲之疾亦尋愈天衢外以刲肱割股療親疾者凡若干人最其至行著於篇旌否未足重輕則一概從略云

黃世堂割中指愈父疾

劉映青諸生割肱愈父疾

盛正朝割股愈母疾

金天泰割股愈母疾

毛祖德割肱愈母疾

龍光煥割肱愈父疾

張維廣兄弟五人維鵬維瑄及某某皆有至性父國將病篤維廣潛割左手二指和藥飲之病良已其後國將復病維鵬刺血書疏文求神佑又割左股和藥以進同治元年其女弟遇賊大罵賊刺以刃委諸路旁維廣急輿歸救治之已成廢疾

維瑄以其事白諸當事真一門孝節也

波宏德祖母曾病篤焚香祝天割肱和藥以進同治三年罵賊而死

王明順縣南人業陶父久病不愈潛剗膀肉和羹以進良已鄉人爲立孝子碑

李國亮字三品縣北李源溝人幼孤貧事節母邱至孝某歲母病割股煎湯以進一服而愈踰歲母再病再割之亦效又踰數歲母患瘟國亮夜半入家廟拜祖先再割股煎以進母聞無藥味知爲股湯堅不服國亮跪至黎明母強飲一口病即大減旋告痊鄉人以其三次割股均未潰亂僉稱孝能感天云

周繼儒字純臣邱家畝人家貧力學補諸生尋食廩餼嘗割股療親疾時年方十五云

孟某佚其名陽春門外人年十八因母病重禱於禹王廟割股和藥以進尋愈

袁恆茂父謹信臥病月餘割膀肉烹湯進之一飲而瘳

邱光發馬公洲農人父邦伍病痢篤光發割股烹湯以進尋瘳

楊志香馬公洲農人光緒丙戌五月母宋氏病危志香於夜深時潛割乳旁肉煎湯以進一飲而愈縣令黃聞其事給錢二十千諭地方刊石以示旌異

彭延珍字輝山出外經商聞母程氏病亟返母病日篤延珍割左臂肉和藥以療宗族稱之

張德臣字炳圭父元坤邑增生母辛氏嘗患痢德臣躬親服侍不稍離歷月餘益危潛割奶下肉和藥以進母病旋瘳

畢元掄邑庠生性純愨事親曲盡其孝親沒泣血哀毀廬墓三年屏妻子拾薪自炊日一粥而已元掄外廬墓者又有王宏緒張迎梅石在明諸人

王宏緒以縫工養親父沒寢墓側風雨泣號三年不歸後遂斷酒肉哀感終身子開禹英年列邑庠人曰天以慰孝子也

張迎梅少業儒父錦先治家有法沒後迎梅廬墓三年里人題其門曰今之純孝弟迎泰亦以孝行著居喪三年不飲酒不茹葷不出戶庭人以難兄難弟稱之又

有作梅者字馥堂母年七十餘患癱瘓作梅親進衣食服勞備至其父愛長女常至婿家作梅輒於所經途翦荆榛以便其行如是十餘年父沒哀痛數日不食云石在明父沒依廬三年兄在昇宅去墓二里許朝夕送飡粥未嘗一日缺孝友一門鄉里稱之

劉品先字敬直快活舖人母死廬墓三年

亢永盛遭母喪葬後廬墓越歲而父又沒永盛乃亥以前守父墓子以後守母墓行之四年如一日事死如此其養生可知矣

張文槐麗陽驛北鄉農人幼失怙每感節母勞苦奉侍維謹及母沒廬墓三年家具亭一一紙一木木供影紙設位夜宿墓門晝仍返舍祇事母遺杖一行必負之坐臥恒置左右無須臾或離年七十餘某夜呼長子起沐浴更衣一噫而終

高華邑諸生父久賈滇南渺無音問華以母不敢離每南望垂涕比娶妻王氏一月知婦能養即白母往尋冒險阻衝瘴癘犯猛虎毒蛇之境屢瀕於危凡三年足跡

幾遍六詔書號夜哭無復生理夢神語其父在某獐夷山中覺後如指求之果得其父乃奉以歸家故貧躬課讀妻紡績以供饋粥越數年父以天年終鄉國推其純孝其後以尋親稱孝者有李熠

李熠邑諸生父厚齋亦諸生性好游久之遂不歸厚齋離家時熠生纔逾歲稍長聞父爲武當山道士即往尋之謂家人曰不見父誓不返矣所至深山窮谷靡不遍訪而卒無蹤劉孝廉學濂賦孝子行以哀其志

辛榮祖幼從孀母蕭氏流徙沔陽母病篤榮祖不忍母卒他鄉遂負歸沿途乞食養母夜則棲宿古寺一夕月下見狼至哀跪求免竟無恙歸里後母尋卒族黨憐其孝歛資助之榮祖外有何四華家東劉么皆至貧極賤而以純孝著尤爲難得

何四少賤無名以傭養其母晨興執炊供母一日需煎茶先買餅餌送母牀頭然後去傭傭歸雖汗勞必取冷水浴或問之答曰恐母愛兒日貯熱湯煩母力也母病瘡由脛上至肩背臭潰不可近便溺皆需人四扶掖浣濯晝夜同起居手匙鋪

錢 補 縣 志 卷 二 二 一 一 三
母歷三年不怠母沒痛哭癩而蹶後每備得食輒哭曰母不嘗矣年三十餘貧不能娶未幾哀瘠而卒

華家東朝宗橋丐者也生而瞽比長其母授以俗所傳二十四孝詞其後母亦喪明家東日負母赴街市歌孝詞以乞食所得熟物先奉母食之乃食自壯至老依依戀母無頃刻置有若孺子然其服勤盡瘁見者皆自愧不及也母卒求人爲殮葬哀痛欲絕當時咸以孝丐稱之

劉么轉斗灣人家極貧父歿兄數人各遠出么獨依依母側恃傭值爲菽水資晝爲人傭夜則夏扇枕冬溫席時母起居而先意承志惟恐其母之稍有未安者其後母老死無以爲殮鄉人憐其孝醵資以葬或有約其出外營生者么以守墓無人未忍遠離歲時恒節傭值贖果品紙燭痛哭墓側歷十餘年如一日也

鄧應祥世傳卜氏之學舉止和順絕無矜持而遇事守正不肯隨俗鄉黨歎乏之歲隨力周濟不以告人年及百歲終其後有魏尙溢孫科之屬凡若干人皆以積德

累仁而享高年其事實無考而年逾八秩者亦附著焉

魏尙溢字仲實北鄉人言行正直爲鄉里所推重年逾九十顧盼自如當途旌之孫科字茂魁河西人性純慤長而孝友雍睦父卒母罹疾手足不仁飲食躬自扶持十餘年如一日母弟異居日過其舍資給不怠里有喪娶無不爲之經營而修建排解之事尤多嘗語人曰吾少不學凡事忠厚存心而已年八十餘卒子孫林立鄉黨稱盛德焉

湯慎修字敦五縣學生性慈厚家頗饒裕乾隆中歲旱出所儲粟食餓者不旬日告罄羣不逞窺其家有財物入其室掠之事聞於官將治之慎修爲言俾盡釋歸衆皆感泣壽九十六無疾而終

王源引字濬川歲貢生性恬淡不苟言笑居家教授生徒謝絕世營蹈道履仁粹然儒者尤善醫術或延請視疾輒應手愈然未嘗受謝也年八十選沔陽州學訓導不言躬行所居自化數載歸年九十餘無疾而終

張起鳳豐樂鎮力作人也性謹順孝親愛弟輕財讓產與同里梁舞鳳急公好義均享高年

張正芳字錦園性端正處事直而和年九十餘卒子時俊字特士亦九十孫洲八十三曾孫家桂年七十八玄孫諸生兼元年八十餘世臻稟壽尤爲鄉人稱羨不置云

李琇字蘭階生平廉謹以孝友稱年九十一子孫繁衍五世同堂同時舒登雲年八十九亦五世同堂

楊廷珍字石樵通篆法有九如圖百壽圖諸印譜傳於世七十後自爲生壙題曰樂鷗老人之墓卒年八十餘

周卜鼎字在章豐樂鎮人幼學章句獨誦孝經不置謂孝爲百行之原非熟此書不足以爲人長而好義鄉里多所周給貧業肩挑者歲暮尤賴之年八十餘卒遠近皆垂涕焉

李士珍性忠厚好施予壽登百歲賜八品職銜

陳繼早歲失怙克自成立母年逾九十曲盡歡心繼亦享年九十餘

王學順家貧好善鄉里稱忠義老人年九十餘

賴修來性孝友慷慨仗義鄉人有不足稱貸助之年九十餘

艾如滋積學不售精通醫術所著有脉訣辨同等書年九十餘

左崇典字徽五三河鄉人性沉毅以地方治安爲己任髮捻之亂崇典年甫冠倡修堡砦鄉人得免於難民初籌辦學校不遺餘力充保衛團團長勞怨有所不辭卒年八十八

王化正字以中石鼎區人慷慨好施以正直負鄉里重望嘗聯區內六廟爲一模範鄉督辦鄉團除莠安良終其身境內無犯賭犯盜者年九十三

曾桂彥熊家橋人勤儉治家義方訓子年九十二

宋洪元字和亭精堪輿慷慨好施鄉人多加敬禮年八十五

梅占魁諸生馬頭寨人秉守禮教言行不苟課子孫有法行年八十猶健步且能作蠅頭小楷某歲賓興欲赴鄉試未果自知末日沐浴更衣皆自爲之命子焚香祭告端坐而逝年八十四

范咸績縣西人有子五多業儒其名鑄金者爲諸生學行爲鄉里所重人稱其教子有方年八十二

戴光裕字吉昌少孤貧同治末與邑紳樊健菴東漢三等業木商樊陳主內光裕則濟漢涉湘專任採辦之責公直無私樊陳等重之光裕兼習土木工程之學縣中有大工作如府廟試院魁閣皆光裕董其役知縣鍾桐山賞錄其功請獎以從九品鄉里榮之性儉樸好施予終身不衣裘年八十二

周士春縣西人爲諸生樹森之父慷慨正直年八十二

羅安貢字象鼎芹菜河羅家嶺人性耿直不輕然諾粵匪之亂鄉人推爲團主遇事一言而決有妹適某姓者早寡撫遺腹子顯壽耕織爲生族人或生覬覦安貢

迎至家界宅以居至顯壽受室始買田宅他徙壽八十三

鄭克佑克類克啟光祥光秀顯德住大河鄉鄭家灣兄弟父子祖孫俱享年八十餘歲

譚君重芹菜河人平生與人無爭年八十二無疾而終

劉文适字仲達號隲堂白口人年二十九喪偶終身不再娶遇人無城府惟以書史自娛白口泰山廟照壁南無阿彌陀佛六字長六尺餘爲文适八十歲時所書現年八十二精神矍鑠與鄉人談聲如洪鐘見者皆以百歲卜之子一孫二長孫樸生商科大學畢業

蔡家昌字熾皆性孝友居鄉恂恂人稱長者年八十二子馨官甘肅法官

黃以敦字子厚馬公洲人少貧以勤儉起家樂善好施歲凶輒耗重金購衣食以給鄉里之凍餓者前後活人無算晚年尤熱心公益自興學令下凡公私立學校需款不貲以敦捐助本鄉祖師殿國民學校石碑兩等小學校及本縣傳習所計

共三千餘緡全縣士子多蒙其惠年八十四有子五人長踐之季文中皆列邑庠
孫曾繁衍能世其家

彭耀聰雲霧團人性樸實有古風訓子孫以耕讀爲本遇鄉鄰子弟必規以道德
仁言藹如人皆樂就之享年八十四其配高氏亦登上壽詳列女傳子祖華性純
孝白髮侍養宛如兒時年八十時爲匪所擄遇救而歸驚悸成疾越二年卒夫婦
父子俱享遐齡鄉人傳爲美談云

邱大仁字靜山邱家壩人幼攻儒業長習國術性剛毅見人過失必呵責之二子
一耕一讀年五十失偶不續娶於地方公益事挺然任之日凡二食不飲酒不賭
博雖遇年節見有酗酒聚博者亦再三勸戒謂不可染此惡習鄉人咸敬憚之年
八十無疾而終

曾楚美石牌曾家垵人父子兄弟皆享年八十餘歲一家人瑞人豔稱之

此外事實未詳而年齡可紀者若周明字劉厚戴全烈年皆百歲全烈配蓋氏亦

百歲別見列女傳吳必發周玉林皆九十九歲徐登山古必豪皆九十七歲楊靜
安郭憲成九十三歲邵正坤黃金滿龔典章皆九十二歲黃宏信陳克謙吳福科
皆九十歲其八十以上者若夏學貴八十九歲毛忠臣趙學鑑劉化南八十八歲
吳正魁宋錕何志清彭宗珩皆八十七歲劉玉樹譚輝緒邵啟印周義興皆八十
六歲陳遜齋曾廣德李祖榮李紹典程蔭三董廷鑑金自樂皆八十五歲梅先春
周德茂曾紀壽劉綬金純安蔣成休楊子耀張正隆皆八十四歲徐朝堯劉廣
元彭祖勳胡啟敏鄭國斌陳玉清楊廷珂胡烈揚夏家浦皆八十三歲張道亨彭
志超王亮采李紹典黃文葵劉白川高天錫陳傳相李秉舉鄭國順楊向離韓錫
桓羅輪先皆八十二歲張霽雲李宗德楊步雲李承彩陳世材劉記祖劉青皆八
十一歲鄭先敏李秉鈞金彭祖李鍾愷皆八十歲至現年九十八歲者曰吳本仁
王市東鄉人九十五歲者曰楊謙白口人八十九歲者曰黃家美八十七歲者曰
李發桂城南人與妻某氏齊眉八十六歲者曰徐朝舜即徐登山之少子曰董春

英八十四歲者曰孫安旭八十三歲者曰高心清八十二歲者曰劉純昌曰彭明揚曰傅錫珍曰嚴正章北鄉胡家集人曰陳延安陳家庄人八十一歲者曰朱秉權胡家集人曰楊志良曰陶履吉陶家榜人曰劉文國曰侯國正皆白口人曰鐵廷才八十歲者曰王培曰黃家元蒼德碩齡據採訪所得備著於篇以識一縣人瑞云

鍾祥縣志卷之二十二

先民傳四

樊龍光陰行善事見廟宇頽敗橋樑道路傾仄不惜捐貲修理且躬自督率與傭工雜作人或謝之即艷然不悅蓋不欲人知也自奉甚儉束子弟各守其分不使稍溢謹厚持家郢中童媪無不樂稱樊善人者子兆臣

兆臣字萃友能紹父志修橋樑甃道路賑贍故舊衆曰善人復見矣晚年耽嗜內典閉關兀坐年八十一卒孫世祜

世祜號靜齋嘉慶戊午舉人初世祜以拔萃貢成均任宜都訓導會曰蓮教亂作防堵有功特簡分發廣東補番禺縣令粵故多獞獠好鬪健訟最稱難治世祜蒞任日征獠清驛平獄訟鉏豪強克舉其職所著有味餘書屋文集藏於家數傳後有清印者以行誼著於鄉里

清印字玉稜候選縣丞關懷桑梓遇公益事引爲己任同治初續修縣志清印始

終其事勞怨不辭里人稱之

系

樊之鐸字省齋號誨斯雍正元年恩貢生選授房山教諭父維堵遭明末流寇之變奉父母避亂山峒中獲免著有樊氏祠堂碑記之鐸精醫學使薄有德按臨患病延之鐸診視立愈薄書仁者三字匾額贈之其詩文哀然成集卒年九十六子四瀨歲貢生大治訓導次溥次潤次深皆諸生

繼聖字睿甫號雲軒潤子性坦夷弱冠恬於進取嘗慕陶靖節林和靖之爲人日夕擁琴書自娛而尤邃於易兼攻岐黃之術築小齋舍旁顏曰寄軒每闔扉挑燈獨坐吟哦其中所時相過從者惟杜光德虹山虹山故邑名宿嘗跋寄軒云浮生如寄又云視一切皆可如寄此樊子之所以名軒也好扶乩與乩仙倡和詩甚衆年八十一卒著有周易匯參十二卷醫學會心八卷孫昌運

昌運字德菴歲貢生博學彊識試輒冠其曹秋闈屢膺房薦某科已掄元以主試者齟齬仍被黜落遂輟進取寄懷詩酒與二三友人相倡和文采風流傾倒一時

著述多散佚其曾孫克莊哀錄遺稿得詩古文百餘篇皆可傳之作孫國楷

國楷字筱蓑少承家學工文善書兼擅吟詠有聲巽序間性和藹喜清談遇友朋
爭論間以諧語調之壯歲設教里門生徒從游者歲近百人一時稱爲極盛光緒
季年衡陽彭太守覺先重建郡學延國楷監修國楷方遜謝未遑彭授意李廣文
永貞再三敦促仍堅辭其有守如此子克莊能傳其學

黃浩字方侯邑庠生其先世有得明者乏嗣嘗捐腴田五十畝爲族中讀書資有明
一代舉孝秀者後先踵接至清益盛其詳具載黃氏學田碑浩性端恪長益以學
愈和藹周至平生無忤於人人亦無悔之者事親孝父卒有弟四俱幼飲食教誨
以次成立先人遺宅四區浩先自置宅移居家具奴婢一無所攜諸弟分受遺宅
安享其成有讓之寔而泯其迹田產分隸鍾靈兩邑謂諸弟曰汝輩初立家力恐
不給鍾邑田近汝等悉取之京邑遠界段非我不悉當均分之其寔京田瘠於鍾
田數倍浩不言也壯年失偶義不再娶居平尤善處人骨肉間戚黨倫理偶乖或

鎮神縣志 卷二十一
婉諭或直責罔不即時冰釋捐館時里閭輿隸皆垂涕蔣翔于有詩哭之云無言屬後日有意喪斯人子如柏如楹最著

如柏字友徠邑諸生幼喪母事父晨昏惟謹飢飽寒燠必熟察雖有僮僕不敢委之父喜過友人談至夜燭而逆之立戶外每夜深風雨掖行代杖值大寒必抱父足而眠父沒遺弟妹教育之以次成立後與諸弟析產四弟如楷已後叔父仍均分之五弟如楹官永寧通判致仕後每語人曰吾以疾歸不及邀覃恩贈我伯兄爲生平第一恨事言已輒淚涔涔下聞者以爲知本

如楹字覺甫乾隆庚寅副貢任粵東理徭同知有惠政徭民頌之能操琴喜吟詠著有粵游草

如梯浩從子字雲階號月峯邑諸生少負氣校藝輸人一籌憤至數日不食苦心績學卒不遇然居心直諒朋友信之

适浩族子字景南別號石城父河清旱卒受學叔父叔父以其孤恒寬視之适深

自刻勵乾隆壬午副貢赴南學肄業期滿得教職選通城教諭迺學粹品端著勤
儉忠厚四箴自儆即以勸其子孫嘗謂凡事不足對父母兄弟妻子者皆不當爲
世居邑北鄉兄弟析箸田產推讓兩兄移居縣東門外授讀爲業子元齊元篤能
守其傳至孫曾而益大其家云

本敬字丹吉元齊長子元齊早卒本敬事母以孝聞教養兩弟皆成立取科第創
立義田二所爲宗族讀書資以優貢生選江夏訓導監江漢書院大吏以品端學
裕教士克勤保薦崇陽鍾人傑之亂委修省垣事竣推爲城工第一年八十九卒
祀鄉賢著有理學規一卷邑人咸稱爲能講程朱之學也

本敏字修來號春農元齊次子少孤從兄本敬學嘉慶癸酉優貢道光辛巳舉人
選枝江縣學訓導尋告歸主講河南問津蓮花及荊門龍泉各書院昌明正學學
者宗之本敏貌樸性和善誘循循工詩歌尤長儷體所著詩文稿藏於家

塤原名本敦字念堂號季默元齊第三子少孱弱苦學不輟工文詞道光壬午進

金華縣志卷之二十一
士補河南封邱知縣植河決度地勢開大濠二長數里以殺水患封邱永賴之封邱質肆鹽棧歲有季規有壽儀墳悉屏弗受官中市物舊有官價墳仍從民價內堂自署聯云不公不明開口難言民父母自作自受回頭恐累我子孫其清介可知旋以母老告歸主講問津及鹿門書院多士以爲矜式墳與兒本敬本敏用儒術取科第並爲時所推許鄉人艷稱之蓋其學行寔有出於人人云

自瑄字宣臣墳子歲貢生少隨宦封邱凡事關民瘼者多贊助施行嗣復侍世父江夏學署與張悅卿制軍胡筱泉侍郎互相切劘學益進世父極鍾愛之鄉試屢躋遂閉門授徒不問外事從游者多掇巍科以去生平無一日去書晚歲課諸孫讀手錄四字鑑引及唐人詩歌皆作楷書無一筆或懈子姪或請稍爲休息曰吾之樂此不疲者以補蹉跎亦借以銷歲月也嘗錄先世遺稿署曰拾遺雜著彙存備覽其自作則稱聊復拾遺雜纂卒年八十餘

自炳字筆臣自瑄族弟嘗從自瑄受學稱爲入室弟子弱冠後設帳里門諸生自

遠方至歲嘗數十人光緒甲午舉人以州同候補安徽

翥先字西春本敬孫少有神童之目博學工文名噪一時咸豐壬子以優行貢成均鄉人以克繩祖武稱之蓋黃氏自本敬本敏兩獲優選翥先繼之誠一門佳話也翥先識時務諳將略而於西北形勝尤爲熟悉咸同年間客左文襄公宗棠戎幕時參機務文襄稱其才大心細凡重要章奏多出其手累官至秦州直隸州嘗捐資興銀一千兩士林稱之後卒於官

金秉祚字琢齊號漳山雍正己酉拔貢初仕溧陽縣丞署南匯知縣賑海漲災有循聲治儀徵勵清操邑有廉吏陸公師祠祭且誓之曰秉祚承公後有一出一入不可對人者神殛之移吳縣歷山陽恤災理獄徹夕不寐或規以節勞太息曰環伺待命者若而人忍一夕安耶擢徐州知府開奎河一百二十里以通商旅郡民利之署淮徐海道所至重農興教待民以慈馭吏以嚴而賑災一事尤精力畢注嘗曰爲能吏易爲廉吏難爲循吏尤難後卸事臥病公寓聞徐屬災猶爲家人言賑

金 市 鼎 記 卷 二 一 一 四
務甚悉憊倦不已生平篤友愛自貧賤及華仕兄弟寢食不忍一日相違也卒年六十五子維岱

維岱字紫峯號曉堂乾隆壬申進士入翰林爲文根柢經術力矯浮蔓在翰林時劉文正公傾注尤深既而乞歸養母家居孝愛楊勤恪公督漕淮上延主淮陰講席陶甄士類成名進士者廿餘人登鼎甲者一人嗣是歷主蘭臺鹿門宛南各書院凡經訓提者詞章一歸於純雅年六十九卒於家著有慎餘齋集十卷詩話四卷子繩孫乾隆己酉舉人

杜理字炳文號敬菴竹山人父世英官安陸府學訓導居鍾祥久後遂隸籍理由拔貢中乾隆庚午鄉榜性至孝早年喪母痛哭傷嗌不能食幾殆朔望必奠而哭漬袖皆血父哀其意雖壯年不忍繼室事父晨供櫛沐晚手衾履每授讀積館穀悉進之父佐饘本支無絲毫入己也父歿再從兄弟近百人皆竭力扶助男女婚嫁各遂其時垂老弗衰及病從兄弟輩來問以目視床隅而頤授之蓋友人所饋藥

金也兄弟輩分持乃暝卒年七十六子官德光德

官德字輔長號懋齋亦號霍麓少爲竹山諸生績學工文乾隆乙丑進士授吏部文選司主事歷考功司郎中諳練部務長官多倚裁決甲戌外授江安督糧道遷江蘇按察使旋擢浙江布政使制府楊公心重之稱爲光明丈夫先是官德秉臬江蘇有汪七病狂以逆詞捕誅株連數百人官德察其誣一朝悉縱之有識者服其仁而有勇後爲上官分過去職楊制府調任陝甘奏帶隨辦軍需總局卒於蘭州時年四十三

光德字普齋號虹山少習父兄之業博綜典墳究心著述不屑屑科舉業壯游四方益廣交有聞之士縱筆爲文千言立就乾隆末年知縣張琴延光德纂修縣志成書二十卷經之以事緯之以詞軌之以道與法鄉邦文獻寔攸賴之

左逢源字會一雍正乙卯拔貢爲文有光氣良金美玉人爭寶之故所投輒合乾隆丙辰中順天鄉試丁巳成進士授五河知縣致仕歸指授兒童尺度森然也

金 補 縣 志 卷 之 一 一
吳椿字鶴年性淳和於人無忤讀書幾傷命擲堂鞭心寒暑不輟學成沛然乾隆壬申春恩科舉於鄉是秋聯捷成進士未仕客死江南年三十二

彭志傑字毓圃乾隆田午與昆季名志岷者同膺鄉薦由內閣中書出宰烏程十年有惠政志傑賦吟詠擅風雅撫字之餘時借詩章自遣以五言爲尤工錢梅溪履園叢話摘錄斷山雲爲補淺澗月能添竹翠搖新影溪流沒舊椿雙鶴去不返孤雲還幾時古樹含雲潤新花借月明等聯稱爲名句惜全集久佚未獲窺其全豹也子慶長字五雲官四川鹽經歷亦能詩梅溪嘗書題裙室三字贈之

彭鑽字允升石牌人性謹厚循循處鄉里人推長者先是石牌市面寥落鑽滙漢水招客以信義客嚮之舟車漸集其後貿易繁盛地方殷足爲縣南鉅鎮鑽之力居多子述禹字奠九亦爲人所推重

曾景向字則山事親極孝篤於兄弟學行爲李石臺所重以廩貢任穀城訓導殫心厥職作心銘四章以儆諸生子先年七歲在穀署植母病聞其祖文璠嘗有剖股

愈母事遂潛割臂肉以療其親事聞殺邑宰題額旌之曰大孝始基

陳其蘊邑庠生學務實行事父母極孝有弟五人仲其纁季其紀皆諸生父歿時惟其纁受室餘皆幼其蘊督家政疏食布衣謀耕讀次第爲諸弟妹畢婚嫁罔不中禮同居數十年內外歡洽迨各子女林立至不能容乃析箸其田產續爲己道者悉入於公鄉黨咸服焉

高萬年字西離邑諸生母早卒侍其父荃進飲食布衾枕如僮僕每思其母輒嗚咽不勝哀一聞父聲則拭淚痕不欲父見之觸傷也及父歿臥草伴柩三年雖疾病不遷事繼母尤孝謹家事無大小必稟命乃敢行每應試百里外必時遣人問安已遣則不時翹首得安報良喜繼母憐其質弱省攻苦爲援例貢成均然終不輟咿唔也年三十一卒繼母哭極慟亦旋卒

沈堂字林菴邑庠生性至孝出告反面冬則溫被夏則扇席凡親製衣穢器必手浣滌年屆六十親稍不怡猶作稚子啼客至待親側終日不怠客見子亦高年敬愛

彌著輒太息而去

趙立言字賓賢父正秉邑庠生早卒時立言甫九歲僅讀四子書而天性純孝母劉患惡瘡立言吮癰出毒即愈母老病臥床難起輒以手承便滅終身孺慕日在左右年三十喪偶不更娶妻父母衰乏皆終養之姑母雷姓者甚貧每加周恤死爲營葬女適張早寡遺子女乳臭攜歸親爲撫育以全其節

黃世基邑貢生年十三入庠弟雲鵬雲鶴俱早孤世基撫教之旦夕勤劬提命維嚴家甚裕綜理出入一粟不私甫踰三十卒雲鵬哀如親喪偕弟雲鶴益肆力於學雲鵬亦年十三入邑庠由歲貢任興山訓導家事悉遵世基遺則秩然怡然逮諸侄年俱垂老始析箸焉其後多以詩書世其家人以爲積厚所流云

周邦治字東陝邑諸生才氣雋上落筆軒然有不可羈勒之態字畫俱工傾倒一時惜早卒

李根仙字聃武邑庠生家貧喜爲詩詞旨紛葩頗造工麗同時有王運昌者字亘山

琢句奇警有詩名又世家子楊行方字潔修擅徐庾體三人俱偃蹇科目鬱鬱而終

李雲鴻字東石試冠童子軍入庠才性敏給拂紙成文偕同志鄧夢龍講古文之學頗有所得所作傳記疏宕可喜夢龍字二田潛心索解必循規矩爲學使朱公繡所激賞顧皆阨於場屋學將成相繼卒又閻剛字近菴從江夏危魯野先生游有馱馱千里之目旣而文瀾益老卓有典型以明經終每歎曰命慳一第不無耿耿也

郭治錦舉步不忘善行如拾瓦礫惜螻蟻必求有濟於物逢人化導刻嘉訓暨良方遍送有童子戲弄火鎗殺其外孫婿女大閩治錦從中勸諭事遂寢

周浩浩弟璜及從父兄弟縣學生清廩貢澄縣學生純並敦行孝友肆力詩書一門百口五世同堂雍雍如也縣令竇某贈以詩有同牢物也知和順中饋人皆習禮儀之句道光丁亥學使王表其閩曰陳鄭遺風

王行方字介然少時從李拙菴學博游以績學勵品爲本爲人溫和與人無忤鄉里稱爲長者

楊學隆母杜氏寡而貧學隆傭酒家間歸省必携甘旨以獻五十後筋骨漸衰力不能備日樵於野以養母母年七十餘卒哀痛臻至其後無疾而終

盧灼字俊三九歲失怙性篤孝母病痰終夜侍寢不解帶者四年鄉黨賢之

陳會遠事父母以孝聞祖遺良產母意欲歸季子及母歿兄弟析居會遠體母意遂推讓受薄田數畝子萬宣亦至孝母瞽目且有足疾萬宣左右扶持十餘載母甚安之

胡靖國字賓華石牌人祖元善父瑾皆有陰德昆弟五靖國爲中子性孝友父沒奉母終身孺慕以服賈起家義聲達遠近周困濟乏視力所至乾隆己亥歲大饑官請賑猶待報靖國捐數千石糾同里有力者設粥廠先食餓人所全活甚衆又嘗捐二千金於泗水港鈎連建八橋復募衆資以讓其名靖國又善則歸親每有義

舉皆稱奉母命而行兩兄不問家事兩弟悉聽指揮數十年無纖芥之隙歿後姪文理有雋才早世文法文智綜理家務子弟翕然守遺訓焉自靖國外以樂善好施著聞鄉里者凡若干人依類編次以誌仁厚之俗云

吳晟字西平號樸村石牌人幼喜讀已而棄儒往來江漢間所爲貿遷有無之術務適物情不爲險刻乾隆戊戌暨丙午歲飢蠲困捐金全活無算每值大比縣人士赴鄉試者必察其寒窘者資給之杜虹山徐子千皆知名士各以事困漢上傾囊濟之遂得脫歸子邦彥諸生之芮邦萱承遺訓均能世其家

鄒佳荃字方澤少以幹才起家性豪俠好施予每歲莫風雪懷金而出金盡而返日以爲常雖家人不知所給爲誰垂老益廣惠施鄉人德之喜騎射教諸生爲有用之器長孫開運乾隆庚辰武舉授都閩次開第乾隆辛卯武舉能詩早世陳秉乾好施予值歲大稔罄篋中金分給閭里捐腴地以瘞流亡

歐忝陰行善事每除夕以錢米周貧困有負債迫欲自盡者得其助乃解他善舉

人不盡知也

周巨源豐樂鎮人樂善好施擇文昌閣西偏建義學數楹捐田畝爲膏火資同時有閩商謝蓮池捐資千餘緡置房舍每歲所得租亦以助教讀無力子弟多賴之羅啟玉家中產篤善行嘉慶甲戌歲飢米價昂啟玉質私田平糶全活甚衆

王采南字素允邑諸生以孝聞性好施歲除必分惠鄉鄰貧苦孤寡無依者多賴之子啟椿爲衛陽丞寄聯以箴之曰恪遵父訓方爲子曲體民情乃作官其懿行多類此

王萬舉家無中人產多善舉鄉鄰有鬪者不惜捐資財爲解紛就兩造細剖曲直衡情準理婉言以勸雖悍者亦爲帖服族子祥達幼訂婚張姓貧不能娶萬舉代爲完婚終無德色親族稱貸者視親疏以爲分不計息子孫林立人以爲忠厚之報云

彭顯西字紹文性好學初甚貧窶以勤儉植其家其祖廟地甚狹顯西不與族人

謀獨竭資擴之聞人有沒而未殮者方盛寒時輒解己衣以贈

周煥字有章邑諸生家雖貧財不苟取得百錢斗粟輒以與人

周祖仁字茂林貢生好善樂施與物無忤每朔望必肅衣冠詣鄉里拜賀終身不
忘

周有章諸生道光壬辰大水有章減餐以周困乏拯濟甚衆平生清苦自持不預
公事人亦鮮知之者

張之昂字愚谷候選府經歷道光壬午王家營隄潰長灘小河淤塞之昂鬻田出
資募人疏濬河道兩岸田得播種如故

常元懷號秉乾性嚴毅不苟言笑好施捨遇同人修梵宇培孤墳治道路戒殺放生靡不樂爲歲除無親疏皆周卹之鄉鄰有婚喪不能成禮者必盡力資助道光
十二年沔陽大水元懷出粟拯濟全活數百人年七十八無疾而終子珠能繼其
志

王鸞賓喜施予道光中多歉歲親黨寄食其家賴以全活者衆鄉里以善人稱之
陳善策性正直好行陰德道光壬辰癸巳間歲大飢途多餓莩善策爲收葬又出
粟米以賑之一日夜坐聞兒啼聲謂家人曰此必衣食艱難忍棄其子者速止之
與之粟卒賴以全

徐如琳字楚珩慷慨好施鄉里推重有博者爲長老斥逐羞憤投水如琳救之諭
以義卒爲善士子世秀能繼志道光間隄潰流亡載道世秀嘗稱貸周之

張鳳儀字韶九道光間人苦飢困鳳儀傾家周之及卒子取源甫五歲妻徐撫孤
成立同治初粵賊掠境取源奉母命率族人防禦一方得保無虞節義兼全人尤
重之

毆士璞字玉亭力農桑致富道光間河岸居民歷遭水患致難舉火士璞駕小舟
載薪藁餼糧按戶分送人咸德之子耀廷颺廷郡增生翔廷例貢生翊廷武舉人
輔廷兵部差務

傳惟肖字築亭縣學生力文學喜施予道光間歲大侵捐田八十畝設立義倉擇鄉人公正者司出納冬發秋歛立法甚善鄉里便之

侯精一好施予咸豐六年歲旱米昂貴隨州趙邦碧倡亂人心惶恐精一傾粟四十餘石以濟飢民一鄉皆安

劉天待家小康生平不知書而多義舉有不能喪娶者必竭力扶助凡利於人者毅然爲之中年艱嗣息後生子人皆謂爲善之報云

楊天衢性任俠自少宦游粵陳頗著義聲鄉人游粵者恒賴之吳伯世韓子健先後卒於粵天衢爲備棺歛權厝他所久之天衢以年老作歸計僱舟載吳韓櫬隨行及至湖南值亂舟不能前天衢間道歸兩櫬竟以道梗厝於湖南某會館天衢每念及時引爲餘憾云

吳大棟京山人其先世嘗就郡城韓家街設典肆遭亂歇業遺宅價可數千金清季興學大棟乃商其族人捐作女子學校時有租戶數家無論有無押金皆予以

移家費并僱工匠修理一新誠義舉也

李德榮字春圃少爲吏以長厚爲鄉里所推重光緒間衆議設同善堂由鄉紳黃毓恩捐銀二千兩及各善士捐款存本生息公推德榮經理德榮悉心經營先後置田地至八百餘畝四民無告者胥賴之北門外地富孔道舊有橋久圯德榮建復以濟行人前太守張履春題爲雙稀橋時德榮及配某氏同慶七十移稱觴之費以建斯橋故以名晚充商會會長卒年八十餘

李士琳字玉堂縣學生性孝友喜施予某歲盛夏父患痢家人畏穢有願而吐者士琳取廁踰親滌之累數月如一日與弟析產善推讓從子曰明未彌月喪母恩如已出民十大水出穀數百石賑之居旁橋圯易木以石糜金萬餘無吝色有洋行經理某博負百金無償諸博徒逼之某詣士琳泣求以家有老母爲詞士琳且責且憫爲代償某始得歸他善舉多類是遠近皆以善人稱之

田禮耕字鑄九縣北九華若人弱冠補諸生處鄉恂恂田叟村童皆樂爲親就然

遇地方利害事則毅然引爲己任九華某住持僧竊岩產三百餘畝契約潛逃禮耕呈縣追還勒石垂示興學令下禮耕督工修建初等小學於賈家集規模宏整以積勞病故然其後由初小而高小而初中皆賴九華公產爲基礎其有造於鄉井者實大家素饒濟困扶窮善舉甚多在禮耕特爲餘事無俟一一數也

邵志漢字廣川雙河邵家台人好濟人急鄉里多賴之於同族尤竭力維持從弟仙川病癱瘓不能養母志漢迎其母張至家生養死葬又時時分惠仙川俾資調養族弟某有兩女及笄貧不能嫁志漢爲備奩遣歸以是人皆稱爲長者

邵維定字靖菴邵家台人監生家素豐歲出所餘以濟族黨貧者多賴之咸豐丙辰光緒戊子兩次苦旱散粟輸欵全活尤衆舅氏柯某有孫名揚貧而瞽不能祭爲置田三十餘畝作爲拜掃之資勒碑永禁典賣族某以游蕩毀家將割產他姓特厚值畀之令其自種時加約束某旋改行仍以田給還不索原值至於修橋梁設私塾與其他種種善行蓋未易枚舉也

薛三河西人家貧傭工爲生性好善遇人急困輒傾囊以助終歲勤勞恒無隔夜之儲桐木嶺東有小橋爲往來要衝每值山洪暴發橋輒圯薛三思易木以石度需費三十元獨修苦無資募修又以身賤名微慮無應者籌維再四誓每年必積十元歷三歲果得洋三十元遂購石鳩工而橋以成行者永利賴之共名其橋曰僱工橋

潘啟字字輔齋原籍沔陽以經商寄居縣南張公菴遂爲鍾祥人張公菴爲往來石牌要道光緒己丑五月商人游某由游家集攜資赴石牌購貨經輔齋宅適遇大風不能渡因寄資輔齋處而去無何襄水暴漲張公菴附隄危甚居民爭遠避輔齋匆匆出他物未遑計及獨攜游某寄欸以行越時全數交還游某願以半謝輔齋曰欸幸未失還君宜也受謝非宜也子協同留學東洋民初歸國歷充參謀等職現任本省測量局局長

劉乙炳字嗣豐諸生縣南龍家集人樂善好施本於性生嘗夜行田畔間見人有

盜其禾者乃隱靜僻處俟盜者遠去始出久之盜者竊向人言人始知之其生平隱德多類此乙炳譜名思鎬鎬音近好一鄉皆稱爲好先生年七十七無疾而卒呂調元縣學生事繼母以孝聞撫兩弟課讀綦嚴遇年荒出穀貸飢人將死悉取藏券焚之

張盛舟爲人謹愿有叔父一人舅氏三人從母二人皆貧老無依爲其父母所哀憐者盛舟先意承志與兄弟贈金餼粟數十年無稍怠其他周濟困乏推惠於鄉人者亦時時有之

蕭汝新字德修石牌人幼從塾師讀聰慧異凡童塾師器之無何父母相繼歿乃習貿荆門久之用商務起家初汝新父月樓與石鎮復升典肆貿易來往簿計時有贏縮月樓旣沒復升以汝新幼無人清理遂置之然汝新已微知其事旣復升歇業荆門有永聚質肆與復升同一居停汝新訪知乃託永聚代爲調查按簿計虧欠數目本息償還父老習其事者皆曰月樓可謂有子矣汝新姊妹各一皆貧

而寡汝新隨時資給俾免凍餒之憂其於救災恤患則尤竭力以圖光緒戊子歲大旱嘗就荆門楊樹店設倉捐穀數百石託地方紳董擇無食者貸之由是得免流亡他善舉多稱是鄉里僉以善人稱之卒年六十八子炳南邑庠生

袁國興字讓卿以農務起家置有上產田千餘畝雅重儒遇佳子弟絕艷羨之生子四皆令就學當興學之初經費時有困難國興輒量力仗助并將所置田四百畝捐入勸學所作學產基金其諸子所受產返不逮焉急公好義鄉人稱之

李士富性樸誠以孝友稱家僅中人產而好施予嘗捐三百金助修塘港大橋及爛泥湖橋小道溝渠疊石以便行旅歷六十餘年不倦卒之日乞人有歛資入弔者其從兄士榮事繼母至孝母所需用無不躬親雖子孫侍立不使代人謂一門二難云其後感及乞丐者又有張玉

張玉性仁厚喜施予宅旁有古樓流民棲宿其上玉常食之粥值大水人多漂溺呼舟救之各予錢數十得無死後將往宜城道經璞河有丐數十遮留之馬不得

行共贖錢具飲食歛於旅舍縣令李聞之旌其廬曰樂善好施

楊至道麗陽驛人粗識文字持齋好善有田二十餘畝刻苦自勵歲儲所餘以食餓者遇清明前後率其子某修孤墳瘞露骨有募築橋梁或寺觀者首先捐助而不肯書名碑碣民十七亢旱市設火災保險會各置桶戶外貯水以防不測然市乏井挹水甚遠至道竊查水淺者夜分率其子擔水潛益之居人咸詫爲奇久乃知至道父子所爲其爲善不求人知率類此

何鏗字石菴業儒不售轉習醫盡發各名家醫書讀之遂得神解某歲大疫徧施藥多所救治最篤友誼有同庚生病危往診之歎曰斯人甲子貧病無嗣皆予同今病不可藥予亦當與同視殯殮畢哭拜歸因屬已後事尋卒其後有蔣之傑等以

醫名

涉

蔣之傑博設羣籍閉門自娛究心醫理以本草爲主治疾用藥一二品有奇效姪魯山嗣其傳有時名著有醫學楷梯

蕭裕全字純玉早喪父母事兄如父同居無私財宗族中孤負無依者收養生成並爲婚嫁尤善醫術遇貧苦者則施藥調治著有明仁論奇症篇及樵雲詩稿藏於家

歐芳字會園縣學生性靜穆究心醫術得其精妙延請者日踵其門率應手效遇不治之症必預告其家人無不驗者

庾詮例貢生好施濟精醫術遠近求診者踵相接詮方藥兼施應手愈然未嘗受謝也

徐常吉字香泉精醫術每赴鄉治病預置各種藥品携之以往遇貧者不取值鄉人德之子文熙孫開鏞世其業

何增榮字景五少習醫精脉理遇症以脉爲斷尤善治疫每夏秋時疫盛行求診者絡繹於途往往至中道要之性好施歲終於三黨貧乏者量給薪米著有傷寒問答子鍾麟邑庠生能繼其業

彭元灝字漢卿諸生縣北雲霧團人家貧力學性淡泊不苟言笑幼多疾屢瀕於危由是究心醫術學日進每值疫症流行他醫多泥守傷寒之說元灝獨排衆議以溫病方治之皆脫手愈遠近求診者雖酷暑嚴寒未或辭也

陳念祖字幼卿縣北虎峪口人少孤母令讀書兼習醫多澈悟某歲有道員蕭某赴川省任阻亂避居馬頭寨見念祖頗爲激賞及啟行約念祖偕念祖得楊栗山所著寒溫條辨讀之頓悟以傷寒治病之非越十餘年歸里知縣徐嘉禾命從子世綱師事之敬禮特隆徐遷荊門延與俱行念祖悉心教授世綱卒得其傳

朱本善字性皆精醫術尤善治痘患痘者雖瀕於危本善治之輒有奇效

張鼎字雲陔光緒壬寅舉人以知縣分發河南鼎革後懸壺京師求診者頗衆性爽直遇人無城府有所得輒侃侃言然於病者則極爲審慎遇險症不輕作張皇之色若決其不可治退即告其家人無弗驗者某歲忽走辭京師故人曰吾將歸理家事遲恐弗及也時精神健甚衆以爲戲言耳歸數月卒衆皆服其神子中達

教育部主事亦精醫

鄧錫齡字鶴塘歲貢生祖先培早卒父穎光遺腹生祖母吳苦節撫育既長敦行誼鄉里重之錫齡少承家學性至孝居母喪泣血三年不茹葷獨居以禮法自持晚歲築似園讀書課子不問外事園內饒水木龔大萬贈詩有似園恣賞處消受百年身之句諸達官貴人或式閤或請謁報以一刺而已子秉仁嘉慶庚申副榜秉繩歲貢生

豫亨字悅生秉繩子歲貢生經明行修後進爭游其門黃讓卿觀察元善黃澤臣方伯毓恩皆其入室弟子豫亨文字有典型尤工駢體子甫丹諸生早卒次毓湘毓湘字吉聯增生年十六遭父喪家無恒產弱冠後仍倚授徒爲生擁皋比數十年從游者日益衆內行純篤事母孝兄甫丹早世乏嗣事寡嫂以禮命長子成佑承祧與嫂氏同居共爨白迄首無間言子成熙

成熙字鴻卿歲貢生敦行誼重交游弱冠後仍以課徒爲生循循善誘一遵先世

成法所造就者甚宏鄉人以爲無忝家風云

爲霖字良甫成佑子成佑卒時爲霖甫五歲性聰慧弱冠有聲庠序間嘗赴日本留學鼎革後任甘肅法官以母老告歸旋被選省議會議員時局倏擾居恒鬱鬱二十年秋赤匪撲縣城肆意蹂躪爲霖仰天痛哭服毒而死聞者哀之

張履墀性慷慨好施予遇公事力能獨任者傾囊爲之創建大小石橋二十餘所費累萬金鄉里稱爲善人張氏世居洋梓鎮先是履墀從兄弟有名履德者登乾隆乙卯鄉舉任竹谿訓導名履泰者道光辛巳副榜以直州判候選遂以詩書世其家爲縣北望族其子孫蟄蟄繩繩咸克守厥家法云履墀有子二開濟開治開濟號平川監生性和靄敦孝友與世無爭樂成人美父履墀稱鄉里善人凡志所未逮者開濟皆力成之

開治字琴軒幼值乃祖寢疾昕夕侍湯藥牀席污穢必親拂拭長承父志完治橋梁道路而於親族孤貧者周卹尤至

開宏字有聲號寔菴履墀從子廩貢生某歲以決科冠軍受知巡撫張某張委署武昌教授嗣轉漢陽教諭漢陽故轄漢口多富商凡商籍入庠者例送學師八百金開宏辭不受入服其廉在籍時修譜建祠并修魁閣文昌閣及敖陽書院以繼先志工詩文遠方求者踵相接與常汝舟明經濟名常每推開宏爲先云

梁舟性誠慤善事父母生平陰行善事不欲人知常爲人講說古事以示興廢之由見不謹於行者不惜反覆引譬以期其悟里中有所營建量力助之鄉人稱孝義者必推梁舟爲首云

源澄開濟長子崇樸實樂施濟遇橋梁圯壞輒爲修治族黨有飢寒者常調卹之值水災所拯尤多

清瑞字秋澄開治子兄弟八人二兄源浚署來鳳訓導四兄源泉署四川壁山筠連蓬州等州縣均有聲清瑞次居六邑諸生就訓導職回翔桑梓遠跡城市然賢聲爲郡縣所重間陳邑中利弊萍鄉李有棻守郡尤契重之時詔舉篤行樸學之

士李以清瑞言於高學使釗中遂登剡章奉旨獎其通達治體爲守兼優准以教諭選用嗣選武昌訓導與教諭李春門相得以正風化興學校爲務接引諸生訓誨不倦咸愛而敬之調咸寧亦如之性孝友昆仲多宦學四方清瑞獨侍親里門左右致養依依如孺子慕其兩季需次皖贛旅費家用皆以一身擔之居家開拓商務其業日懋凡有利於桑梓者必繼先人之志見諸施行晚歲嘗捐鉅款增修洋梓隄以捍水災僉謂利在百年云子七其名愷者留學日本官教育部主事源溱字汝南開治第七子同治丁卯舉人由內閣中書赴大挑以知縣分發安徽授南陵知縣有惠政子炳耀安徽貴池知縣小南江蘇候補知縣炳權農科畢業生獎舉人歷充農商部科員

國楨字東之開治第八子同治甲子科副榜江西建昌知縣

建遠字雲鵬開濟孫光緒乙酉拔貢署宜都教諭選蘄水教諭性爽直於地方利弊知無不言光緒季年開辦學堂諸所擘畫悉能得其要領守令胥倚重焉

金 示 集 卷 一 一 一 一
明遠字實生建遠異母弟敦品績學劬苦過於寒素以博聞彊識爲時所推終艱
一第鄉人惜之

中鈞字文衡開宏曾孫民二十三畢業英國利物浦地學院得碩士學位以著論
文應博士考患神經亂自經於英先是中鈞持論文見駐英郭大使泰祺開卷書
有請公使給以毒鳩就此自盡等語及談話間語多悲觀且無倫次郭使反復開
諭堅詢所以均不能答郭深憂之派祕書劉某隨同防護劉請移寓同居中鈞謂
即須反利物浦取行李再回倫敦買舟作歸計且出來回車票作證詎未成行而
翌辰即以自縊旅舍聞矣事後詳加推究斷爲讀書用腦過度遂致神經衰弱陷
入悲觀檢其遺書知對於其母之存亡極爲懸念而桑梓之災禍種種亦足以促
其厭世也其論文爲中國郡縣制度沿革論極爲指導教授英人某所嘉許嗣由
中鈞英國同學某君向日內瓦中國國際圖書館刊行經指導教授代爲校正而
郭大使亦作序言以弁其首

劉鵬起字搖扶縣學生性耆學尤精方書人以疾請者無風雨寒暑必往視又益備藥物稽薪芻器之屬以給諸貧無力者使即其家煎飲之所利益甚衆時人爲之語曰欲得活劉公藥著有徙南文集有子四詳誼詩詢

誼字宜菴嘉慶庚辰進士歷官至宗人府府丞早歲爲學以踐履爲先慷慨有大度急人之難若飢渴之于飲食儼然負一鄉之望及釋褐年四十餘矣泊乎有以自守由戶部主事轉御史章凡數十上皆朝廷大計畫其最爲當時所傳誦者如四川邊防請屯田練勇之疏實得一勞永逸之計略云自古邊防莫不以屯田收效誠以厚集兵力則有勞師糜餉之嫌兵力單薄則有顧此失彼之慮惟屯田一法無事則耕有事則戰最爲邊防要策查前代或以兵屯或以民屯果能仿其遺意措置有方賢於十萬師遠矣此即漢臣趙充國所謂罷騎兵以省大費坐得必勝之道者也即如湖南鎮筵各廳嘉慶年間苗匪滋事卒以屯田練勇奏功至今彈壓鎮撫數十年相安無事其明效大驗也迺者四川馬邊峨邊雷波等處夷

情不靖臣以爲宜令四川總督行文湖南調取該鎮設立屯田練勇一切章程仿照辦理自足以資控禦而靖邊圉以爲經久之計惟一時恐未能就緒宜先設換防兵丁以資防守此項兵丁即在本省挑取一年一代臣聞該夷匪每當出巢滋事不過數百餘名查看情形量爲調戍相其地勢分據要隘務令聲勢聯絡一有警報即先斷其歸路四面兜勦勿令聞風逃遁以示懲創至該換防兵丁仍令照舊食餉只須酌給薪水一俟屯田練勇事宜辦理完竣即將換防兵丁裁撤如此次第舉行似屬用力省而成功多於邊防不無裨益又請籌備積儲以裕民食疏云某日奉上諭琦善奏豫籌民食請暫免商船米稅一摺直隸地方雨未沾足糧價漸昂全賴商販米船以資接濟所有奉天河南山東三省米船來至直隸售賣均着於過關時免其納稅以平市價而廣招徠等因仰見皇上軫念民依之至意竊維民食攸關籌備之道宜豫變通盡利轉移之權在人臣聞三江兩湖河南等省接年大熟米價甚爲平減每石價值約計制錢二千有零爲數十年所未有能

趁此時廣爲收買以此省之有餘補彼省之不足酌盈劑虛於倉儲民食不無裨益查順天府捐賑案內存剩銀十六萬六千餘兩直隸藩庫亦存有各州縣解交倉糧價值銀兩臣愚以爲當此米價昂貴之時莫若將前項存貯銀兩飭順天府尹直隸總督委派委員解赴江南河南等省會同該地方官按照時價量加採買一轉移間則倉儲有備遇有緩急可資接濟云云至其他彈劾諸疏必廉得其實然後據事上聞從無恩怨之見上知其忠實屢遷出於特旨於職事無秋毫見譴以榮名終其大節昭灼者如此年六十八卒祀鄉賢子兆璜兆璠

詩字古愚號松坪道光壬午進士以知縣發甘肅補兩當縣旋擢洮州廳同知署平涼府知府以疾致仕歸詩少承父兄之業刻志勵學苦資鈍不能記憶每讀書取一紙糊之案上朝夕哦誦至漫滅不可讀乃更一紙有所遺忘輒自扶其手攻苦如此及爲吏甘肅歷署臯蘭平羅狄道諸州縣所至稱治調署巴燕戎格廳通判地故接邊徼土番雜居號難治詩上書總督那公謂制馭之策莫如募熟番從

事以省追捕之難勒蒙古精銳以補防守之缺那公隲之及補兩當遇他繁劇難
治理者大吏輒檄詩前往嘗署山丹供億過境王師徭役芻糧事集而民不擾署
寧夏時值水利同知某借渠工漁利幾釀巨變詩單騎曉諭得弭患未然至前後
蒞兩當九年治崇簡靜民以乂安其循績尤爲卓著子四輩乾尤知名

詠字南樓鵬起從子幼讀書能守先世遺訓偕兄詮同貢成均同治乙丑大府檄
續修縣志縣令許光曙延詠主志局事丙寅赴西鄉採訪得風疾歸遂卒

兆玉詳子嘉慶戊寅與叔詩同登鄉薦官恩施教諭

兆璜字幼磻道光辛丑進士由工部主事授徽府知府咸豐庚申金陵潰賊越徽
圖杭兆璜治器械繕城郭所以籌之者甚至一日賊糾衆撲城兆璜躬自督戰卒
以兵單援絕被陷夫人呂氏抱弱女投井以殉幼子舟生亦爲賊所戕事詳列女

傳

兆璠字菊溪道光癸卯舉人歷署桐柏南召等縣鄧州知州實授固始縣以直隸

州候補兆璠恂恂所至無赫赫名而琴鶴之操凜然嘗貽書所親曰身家事小名節事大非分之財譬彼盜泉水一掬一污也以故歷任十餘年輒不能自給卒後無喪之資諸大吏廉其貧各賻以金其子始得扶櫬歸

鞏乾字雲簷光緒辛卯舉人性耆學於書無所不窺治算術尤有心得壯歲奮志學醫嘗謂吾先世以醫活人不可自吾身而失其傳遂遍讀方書融會貫通取諸家之長而悉祛其偏鄉人有求診者必詳加探詢視脉至再始立方或甫開一二品旋塗去往往易數紙而方始定嘗曰醫雖小道生死所關未敢以輕心掉之也以故所治者無不立效膺鄉薦時年逾五十榜出匝月卒於會城人皆惜之

兆瑛字修五詮子詮以恩貢充文昌書院山長爲士林矜式卒年八十兆瑛寢苦枕塊一遵古禮鄉人稱其孝少好學尤工書法弱冠補諸生其石刻文昌書院楹聯云青簡文成三篋秘紫泥書映五雲多見者頗爲激賞年亦登八秩以無疾終子鶴齡亦諸生

樹聲字漢閣詩孫少承家學留心經世之務於諸子中尤折中兵醫兩家遭洪楊之亂遷徙無常遂輟進取援例捐職務職非本志也著有蟲鳥吟詩集及瑞石山房詩草

念慈字晉芝詩孫少孤力學以廩貢選通城訓導俸滿以知縣發福建補永安永安故多山林深菁密爲四方逋逃藪念慈寬猛相濟地方賴以少安辛亥秋福州既亂秩序日紊土匪乘間竊發念慈募勇督勦匪負隅抵抗勇多潰散念慈遂被匪擁去索銀幣取贖念慈即間遣人持絕命書歸且曰慎勿來贖以貽羞增累絕粒不食死子先驚畢業東京帝國大學宣統二年應廷試賜農科進士授翰林院檢討

先登字封臣兆玉孫性爽直好排難解紛理屈者往往爲所懾遇人無少長貴賤皆樂與談鄉黨有婚葬事或延先登相助竭力代爲擘畫垂老弗改其常年逾九十卒

培鈞原名先覺字莘田樹聲子未冠補諸生光緒丁酉以拔萃貢成均就直州同分發山東工詩酷好淵明東坡所集陶蘇句甚衆其爲學兼治漢宋無門戶異同之見然最服膺考亭以主敬存誠爲律身處世之準則著有日記數十冊記其言動以資省克晚歲益反躬實踐不慕名利先是徐大令嘉禾宰鍾祥十年培鈞以文字受知與徐氏群從時相往返鼎革後東海旣舉總統其介弟世光世綱皆培鈞舊交多方推轂培鈞來往京津僅以私交酬酢未就一職世皆稱其有操云

黃時榮原名漢文字位東爲吏重信義嘗竭資拯某縣令虧帑之危某縣令深德之嘉慶初教匪滋事縣令周季堂於村民李姓家獲食教人名冊厚寸許適有他事付時榮俟翌日捕治之時榮攜歸展視見纍纍盈萬良民多竄名其中不忍無辜者同受斧鑕因畀諸火坐待旦謁周以不戒于火甘當罪周大怒面發赤同事者咸爲時榮危時榮無懼色久之周乃悟笑謂時榮曰吾智出爾後一大好事爲爾勾當去矣遂縱不問時榮爲吏久益厭苦之屢請於令不許會某縣令開藩楚北

延時榮至賓館盛供張欲處以善地固辭留數月厚爲之禮而歸札至縣爲脫其吏籍所以報也時榮兄弟三夙敦友于旣謝吏事出所有產析爲三與兄弟平分之族黨有貧乏者以時俸助於每歲除日豐其給年六十餘卒子致中有父風孫兆椿亦恂恂守先訓能世其德兆椿子廷珍廷金入翰林

廷珍字席聘強學通才尤篤至行道光壬辰進士授翰林院編修乙未順天鄉試戊戌會試充同考官所錄多知名十尤善爲奏議諫臣言事者往往屬廷珍爲疏稿後遷江南道監察御史未一月卒年甫三十四人以未竟其用惜之子毓全毓奎毓恩

廷金字品三咸豐丙辰進士入庶常散館改工部虞衡司主事簡放江西瑞州府知府政平訟理有漢良二千石之風著有瑞州府志又嘗刻純正蒙求分贈鄉里以端蒙養始基生平篤行誼重交游諸昆多逝世四兄廷綬不樂仕進歲時遣人致金幣奉起居潛江楊明經灑少與廷金共硯席以道義相切劘延入幕府待以

上賓子毓萱毓○

毓全字純臣弱冠補諸生被賊擄僞以商對賊命負重力不支乃以實告賊喜其爲人頗重之久乃授以僞職一日擄一少女至賜毓全爲妻毓全見女淚流滿面知爲世家子詳詢乃吐實因囑女曰若須佯作歡容一如願爲予妻者予將有以全汝之貞否則改配他賊恐不免矣月餘探知女家密遣之毓全亦潛離賊營後以歲貢生充八旗官學教習官雲南某縣知縣

毓恩字澤臣同治乙丑進士授翰林院編修晉侍講充山東鄉試主考外任夔州知府歷官至福建布政使毓恩少孤其舅氏劉幼璠太守兆璜撫爲子遂從劉姓年長始歸黃氏官夔州時嘗捐資興銀二千兩爲邑人春秋試舟車之資又捐銀二千兩同善堂四民無告者尤賴之

毓萱字耀臣貢生官枝江訓導美豐姿善談論隨父兄宦久熟於京朝掌故晚歲杜門里居客至輒娓娓不倦人皆樂就之年逾七十無疾而終

金 順 泉 元 卷 二 十一 一
振鈞字炳卿父毓奎官山東某縣知縣振鈞隨侍任所好學工文試輒冠其曹光
緒丁酉拔貢官河南州同

振鉉字幼丞毓奎季子性和藹與人無忤善詩工琴爲兩湖書院高材生光緒甲
午優貢惜早卒

彭夢龍字在天石牌人幼失怙事母至孝以力雄里閭諸惡少爲人害者皆威服之
石牌商賈輻輳多流娼夢龍一日盡逐境外鄰人張華死其妻劉矢志守節夫族
強劫而嫁於潘婦截髮不從夢龍挈劉弟造潘理斥潘族衆以械環圍夢龍奪械
陪其衆衛劉歸無敢追者乾隆甲午歲大飢夢龍約里中好義者設粥廠拯活甚
衆石牌舊有關廟坍塌夢龍欲修復工繁費鉅募金不足一日不告於家不謀於
衆盡傾其資携千金來不日廟成因而家計困乏不顧也其強毅好善多類此同
時有保全節婦者曰張吉占

張吉占貢生性豁達多豪舉里有節婦倪氏二子在襁褓家極貧而矢志甚堅母

族欲奪其志不可將強之吉占厲聲曰撫孤守節美事也有敢行強暴者吾當擊之議乃息其後婦享高年子亦成立又有鬻妻者呼其夫詰之曰迫飢寒耳吉占給之資俾如初

關濬字文川侯選主簿嘉慶初白蓮教之亂濬以練長督防河濬縣令周季堂查獲城中高貴華爲匪首張漢潮黨羽籍其家有名冊千數密訪所居縛千餘人置諸廟詰且將置重典濬偕弟漣啟縣令出高家屬鞠訊果稱冊中多脅從且屬僞書縣令即毀冊示衆因保釋無辜甚多事平有德之者濬曰彼自無罪我何功保六品職銜固辭不受濬外以辦團或輸資力保衛桑梓者凡若干人以時代先後著於篇

胡正永爲人剛正有膽氣遠近咸服之嘉慶元年教匪之亂共推爲耆長率衆守險賊至開礮擊之礮裂被傷不少挫賊引退正永卒以傷死

陳萬福字梅村教匪之亂鄰耆稔其才推爲耆長萬福多方籌備合耆以安事平授

金 永 縣 志 卷 二 一 一 一
千總及卒子環廬墓三年

曾興宗監生爲人廉平端直教匪之亂偕武生張光斗同修龍尾山砦衆賴以安
又於長湖築隄資灌溉近湖田雖旱無歉歲曾家集河港每值大水歸市者渡涉
維艱興宗創議修長橋行人便之

黃清華字德英與弟清淮相友愛教匪之亂鄉人推爲團首督建堡砦不辭勞苦
歷十餘年

武生夏某居石牌東北驍勇越恒流教匪之亂生奮勢欲往擊賊家人多止之生
曉以大義獨躍馬彎弓馳入賊中所斬獲甚衆力不敵死之

黃居邠字西如縣北馬頭寨人性剛介嘉慶元年正月初二日教匪由香花園竄
縣鄰砦多失守時屆年節民多家居砦內僅五百餘人居邠乃多設疑兵男女俱
登陴以守賊薄砦環攻親發砲擊退之事後將軍明亮嘉其功賞賚有加隨入砦
巡視稱其布置有方欲薦於朝居邠謝之

陳熺邑諸生有膂力善談忠義教匪之亂蹂躪石牌熺冠劍屹立門首賊至手刃數人賊稍却尋賊騎大至熺又殺一人奪馬一匹馳入賊中力戰死賊取其尸焚之入祀昭忠祠

賀大漢失其名軀幹甚偉人因以呼之教匪之亂應募從討賊賊至大漢執旂大呼殺賊衆潰猶奮鬪不已遂戰死

李楚材字樑齋縣北九華砦人道光己酉武舉性溫和有儒者氣象初長河無防堵咸豐三年賊乘間竊入楚材督衆抵禦賊不敢犯隨東趙邦碧霸踞洪山其黨石大磐等由郡城肆虐還楚材中途邀截擒大磐送官焚殺之

尤大藩張良弼毛林漢均河西人咸同間粵捻各匪竄擾河東而河西上自利河口下至馬良一帶輿辦團練分上中下三段以堵河岸尤任上段張任中段毛任下段協力督率日夜不懈匪屢圖渡河終不得逞事平均以軍功保舉知縣

汪灑邑諸生子培蘭謳樂砦人砦北松林寺與隨棗毗連爲賊四竄之路咸同間

髮捻肆擾伏莽竊發灑爲若首竭力防禦培蘭佐之境內安堵鄰若亦倚爲北門鎖鑰云

陳開綱字統萬貢生性端方饒膽略髮捻之亂督辦團練以時訓練人人可用遠近數十里胥資爲保障時京山陳匪盤踞楊家集一帶肆意燒殺居民一空有田家團團長某越境乞援開綱率團勇五百人奮厲前往直撲匪巢斃匪甚多匪以力不支遠竄流徙者乃稍稍還鄉京山裘大令嘉其仗義恤鄰題有勇知方額贈之

陳鳳鳴字桐岡少孤好學屢試不遇援例捐府經歷髮捻之亂嘗聯合紳民修猴兒寨置器械儲餼糧鄉人恃以無恐鳳鳴性慷慨喜周人急遇凶年飢饉設法拯濟尤不遺餘力咸豐丙辰歲大稜節衣縮食以工代賑一方得免流離光緒初河南連歲大旱飢民入境者絡繹於途就門前河灘支草棚兼施粥米活民無算中年後以屢困名場延師課子其二子一孫皆有聲庠序人以爲爲善之報云

周焜南郡增生性方直咸豐初捐資辦團同知汪申請獎給六品軍功固辭不受黃培藩精醫術著有醫方奇驗若干卷性豪爽好談兵咸豐時辦團有功後死於難鄉人惜之

王景羲字雲笙同治壬戌舉人捻匪之亂嘗與貢生王士杰李廷彥等督辦團練有功桑梓景羲後官山西石樓縣

黃履祥字厚卿縣北張家集人張家集與隨棗毗連以大洪山爲界猾黠無賴之徒恒嘯聚其間履祥倜儻有大略家饒於財時出所蓄以周鄉人之困乏於山川阨塞處以時修築往往捐資以爲之倡以故鄉人樂爲所用鼎革以後匪風雖熾張家集以履祥善防而獨完某歲洋梓遭匪患甚鉅其北竄者履祥率團殲滅幾盡匪黨恨刺骨冀得而甘心一日乘間竊發直撲張家集履祥幾不免鄉人出死力脫履祥於危其得衆如此然張家集已成焦土矣

劉芳桂河西人諸生清末開辦自治被選爲陽和鄉鄉董民元以來督辦團練屢

獲逃軍槍械鄉里安寧咸推功芳桂云

毛鴻鈞字槐庭廩貢生慷慨有膽略充康樂鄉區長民四顧匪暴動鴻鈞率隊擊斃匪首餘匪悉潰同時有田日暄充九華保衛團團長值隨棗巨匪竄境設防嚴堵民賴以安

李之芳字書元身材短小頗饒膽略由湖北輜重營轉學兵營歸充保衛團教練員隨匪劉星會率大股擾周家集朝陽寺邵家坨等處爲之芳所扼不得逞嗣復追於紗帽山馬頭砦一帶匪聞風呼爲李矮子兵至皆潰走之芳御下素嚴後爲衛士所害同時有朱繼高者亦以善戰爲匪所憚匪不敢過境用重金賄親近衛士狙擊之繼高高等小學畢業生

周炳武字耀珊縣西魏家集人辛亥戰漢陽鍋底山有功擢管帶代理標統五年考入陸軍講武堂十二年任農商部主事十五年任河南警備稽察官十七年充本縣常練隊大隊長旋卒

呂祥安字康甫初任豐樂區區長嗣任保衛團團總民十七孫匪發祥盤距縣境祥安率師渡河以衆寡不敵竟以身殉祥安性慷慨好儒士某歲政變後學校欸絀嘗捐資維持俾絃誦得以弗輟士林德之

楊德炳縣南楊茂隄人民初嘗獲匪魁斬之地方賴之以安廿一年匪距下洋港一帶窺白口亟德炳率衆戰於白馬廟斬其魁又於周王家場斃匪甚衆後以衆寡不敵遂遇害

鄭雄飛字心田幼業儒名噪甚旋考測會學校辛亥武昌義師起雄飛投筆從戎充管帶駐防漢口九月初八日與馮國璋師接戰奮不顧身以衆寡不敵死之張振聲父自新邑庠生民初振聲官某師營長頗著戰功後駐黃岡倉子舖兵士譁變中彈而死黃岡人每述及輒爲惋惜云

黃道衷亭與亭嘉慶戊午解元官懷遠知縣初白蓮教匪滋事道衷率勇防禦要隘會經官兵痛勦賊奔潰棄所掠子女數百人有欲借以爲利者道衷奮然曰曷敢

爾有如人得吾等子女而爲若所爲於吾等心如何乃細詢里居招其親屬引歸弟德衷嘉慶壬戌進士官溫縣知縣姪家驥家驊

艾南薰郡增生教匪之亂率勇勦賊有功張鎮軍某題請予翰林院孔目銜任江西永豐典史嘉道間艾氏多慷慨好義之士次第錄之

士蓬性仁厚輕財重義道光庚子辛丑間歲大飢士蓬出牟麥賑之家儲不足繼以遠糴人咸稱之

如霖好施予道光壬辰癸巳間民罹水災餓莩載道如霖糾鄉人收埋齧骸出倉積谷三百餘石濟活甚衆子逢訢逢詔監生文金縣學生均能仰承父志道光十五年歲大稔逢訢兄弟出積粟四百餘石以濟飢民縣令陳某嘉其事欲旌以額固辭不受霖歲貢生著有晚晴草堂瑣言及晚晴草堂詩稿

張之昶字曉川嘉慶乙丑進士官山東利津知縣聽訟平允案無留牘捐俸置書院講求經術獎勵士子以目疾告歸

黃培菑字亦香嘉慶丁卯副榜以授讀自給鄉黨寒峻有造者不問束修且飲食而教誨之

蔡燕號貽亭寬厚和平與物無忤善岐黃術施藥濟人數十年如一日遇人有急難非親族亦賑卹之嘗訓其子若孫曰能吃虧是大好事爾等當學吃虧聞者以爲德人之言孫家馨道光己酉拔貢官無爲州知州

沈宏敏字遜菴事親以孝聞爲人忠信篤敬孚於人人創修宗譜垂家規三十二則皆格言也

高騫縣學生性敦樸寡言笑雅尙古道教授生徒終日不出戶庭垂訓以敦本篤行爲要游其門者循循規矩率善記誦人咸稱之曰經書熟高君徒

王可昌少時與弟可治析居可治不事生業所受田售盡旋病歿逾年妻亦亡遺女二子一可昌撫女爲己女又爲其子聘室完婚可昌有五子後以己田俾己子與弟子均分人皆稱之

周崇清邑諸生七齡失怙性方嚴母王氏年逾八十孺慕如一日嘗侍疾不解帶者累旬姊適何姓早寡迎歸同爨代爲撫孤比長分田宅居之

黃居鎬字建西五歲失怙事母胡以孝聞年六十九先母卒死而復甦母泣訣之乃瞑初居鎬年逾三十無子母爲置妾居鎬陰念妾幼欲遣之顧重違母命乃使與己女同宿年餘妻生子遂別嫁焉

毛永昌號東明父振宵兄弟四人析居久母李佐父以勤儉殖其家家資優於諸昆季振宵欲一體衣食永昌皆竭力致之曲全父意父母沒歲時伏臘忌日致奠慟哭流涕如初喪日生平樂善好施遇凶歲尤加意孤貧親串中婚嫁喪祭待以成禮者二十餘人置義田六十畝諭其子勒石垂久遠毋得鬻賣人咸稱之

張文選字梁書弱冠遭父喪家貧諸弟皆幼營葬後兼事懋遷致富嘗因母病祈禱茹素三年撫諸弟皆成立生平歷覽羣書尤講求性理小學喜爲利物濟人事人以是有善士稱

楊醇邑諸生母氏寡醇天性仁孝冬溫夏靖二十餘年如一日

余成貴性孝友伯父生子三成貴無兄弟與從兄弟析居田產多讓焉

李自欽邑廩生家傳孝友自欽尤爲純篤里人有不孝不友者父兄輒舉自欽以爲教

黃鳳鳴路拾遺金囊約百餘兩坐待其人詰以數適符予之辭不受謝子孫頗蕃昌人以爲有隱德云

陳錦字綱尙與弟鐸相友爱家產田廬不爭美惡不計多寡白蓮教之亂匪掠轉斗灣擁鄰人鄒氏女錦見之舉杖擊賊臨以兵不動賊捨女而去

常良才武生其母患中風十載不離床褥凡飲食湯藥及浣濯溲溺皆躬親其役不假手婦子母沒泣血三年里人難之嘉慶甲子舉孝廉方正

王道輔事親孝先意承志弟道峴爲叔父後家貧甚苦歸省父母流涕道輔知爲弟故遂讓田百餘畝父母爲之歡然

高安度字又裴邑諸生年十餘歲操觚爲文鄉先生皆器之及壯屏去舉子業習醫術凡遠近請視疾雖盛暑祈寒必至其困苦者并授以藥資里人稱之

歐立中字造舟恩貢生性瀟灑不修容飾貧而有守清不絕俗親知相周則受之非義非道不取也嘗有友人子不才欲送有司治之立中爲委曲開導俾父子全其恩義焉

張遇郭字西亭郡學生事繼母以孝聞家居課徒其門弟子列學宮領鄉薦者甚衆汪作模性孝友植品端方里有不平事苦口勸之後與姪析居田產任姪取携債務作模自承子鵬亦有父風

鵬字鯤化事母孝嘗齋戒以祈母壽孝養終身不衰通醫術施藥餌居鄉排難解紛里人稱之

張翼象性豪邁事大父母暨父母能養志其外祖尹某無嗣翼象爲立墓碣遇上元清明日躬率子弟往奠歲以爲常朋友告乏亟周之無不如意以去